

Nagami

Eba kiavemageta

Buki de'e i lulu'ivona 'eba velamu faifaina. I veveifufu fwayafwaya bani'odiga i souyeni, tomotoga 'ada 'idewadewa wata me Isileli yadi 'eba velamu faifaina. Buki de'e nageneye nani 'adi 'ailuga bwaikidi faifaidi i veifufu.

- 1) Daba 1-11 i veveifufu Yaubada fwayafwaya wata tomotoga i 'idewadiga faifaina. De'e dabanidi nagedie tomotoga kumekumetadi faifaidi i veveifufu bani'odi Adama, Ive, Keni wata Ebeli. We'e Noa yana tutuye fwayafwaya matatabuna Yaubada i 'u'umi wayagata bwaikina 'wainega. I 'a'avana, tamu tutuya tomotoga vanuga bwaikina wata manamanawena i yogoni i laka abame 'ana wagava Babeli.
- 2) Daba 12-50 i kikiavemagetaga me Isileli 'adi wauma yana 'eba velamu faifaina. De'e 'wainega 'ana fata me Isileli tubudiavo kumekumetadi ta na 'asetadi bani'odi Ebelamo, Aisake wata Iakobo. We'e Iakobo natunavo 'adi 'aila'a 12, 'waidiega wauma Isileli i souyedi.

Buki 'ana tokiluma kebu 'ana wagava i da kilumiga wata i da lu'ivoneyeni 'waideye, we'e Buki Tabu 'ana to'aseti bwaikidi i vo, Buki de'e Mosese 'ana kilukiluma 'alo yana buki."

Kilumanina me Isileli faifaidi, 'wainega i na 'asetai yadi Yaubada i venua'ivinedi taunidi yana

tomotoga wata naninidi i 'i'idewadiga me Isileli faifaidi i na nuanuanidi.

Mosese Buki de'e i kilumi, malamala 1500 bani'odi i 'a'avana mulieta Iesu i tubuga.

'Eba Velamu

¹ 'Eba velamu vauvau 'waineye, Yaubada abama wata fwayafwaya i 'idewadi.

² We'e fwayafwaya bola kebu i da souyeniga wata nage'avana. Dudubala bwaikaotogina malaveta i umai, we'e Yaubada 'Anu'anununa tabwaneamo i lulubewe-vuvueni.

³ Mulieta Yaubada i vo, Mageta i na souyeni," nika mageta i souyeni i awa'ai'aia.

⁴ Yaubada magetanina i 'iseni i awave'atumaieni, mulieta Yaubada mageta i 'idia dudubala 'wainega.

⁵ Yaubada mageta i goleni 'Aiata we'e dudubala i goleni *Lovana*. I lovani i nagoga i 'atai, 'aiata kumekumetana 'ana tugusa.

⁶ Mulieta Yaubada i vo, Malaveta kamwaneye 'awasasa'ava i na souyeni bega ufa i na 'idia, 'ifwaidi tabwaneye i na laka we'e 'ifwaidi dibuneye."

⁷ Nika Yaubada 'awasasanina i 'idewai bega ufa dibuneye wata ufa tabwaneye i 'idia. Yana voneye 'ana mogitana i souyeni.

⁸ Yaubada 'awasasa'ava i goleni *Abama*. I lovani i nagoga i 'atai, 'aiata 'ana veluga 'ana tugusa.

⁹ Mulieta Yaubada i vona i vo, Ufa matatabuna abama 'ayaneye i na ula vi'ai 'aitamogana

'waineye, fwayafwaya lalana i na vemageta.”

Yana voneye 'ana mogitana i souyeni

¹⁰ Yaubada fwayafwaya lalana i golemi
Fwayafwaya we'e ufa i ulaulaga i golemi *Eyaga*
Yaubada i 'iseni i awave'atumaieni.

¹¹ Wata Yaubada i vona i vo, Fwayafwaya i na
uga, mosomoso ma biladi wata 'ai vuavuaga ma
waifeidi i na ve'alatabotabo we'e natudiavo 'adi
'isa'isa bani'odi.” Yaubada yana voneye 'ana
mogitana i souyedi.

¹² Fwayafwaya i uga, mosomoso ma biladi we'e
natudiavo 'adi 'isa'isa bani'odi, wata 'ai vuavuaga
ma waifeidi we'e natudiavo 'adi 'isa'isa bani'odi.
Yaubada i 'isediga i awave'atumaiedi.

¹³ I lovani i nagoga i 'atai, 'aiata 'ana vetonu
'ana tugusa.

¹⁴ Mulieta Yaubada i vona i vo, Mageta i na
souyedi abame bega 'aiata wata lovana i na 'idia,
magetanidi 'asa'aiana tutuya 'adi tugusa 'eba
'isa'inana, tutuya koyova wata tutuya 'aile'wa,
'aiata wata malamala faifaidi.

¹⁵ Magetanidi i na 'awaaiaidi abame bega
fwayafwaya i na magemageseni.” Yaubada yana
voneye 'ana mogitana i souyedi.

¹⁶ Yaubada mageta 'ailuga bwaikidi i 'idewadi,
mageta bwaikina 'aiata i na magemageseni, we'e
mageta sai'afo bwaikina lovana i na
magemageseni. Wata 'ubwana i 'idewadi.

¹⁷⁻¹⁸ Magetanidi Yaubada abame i yatodi bega
fwayafwaya i na magemageseni, 'aiata wata
lovana i na veveimeyedi, nika 'wainega mageta
wata dudubala i na 'idia. Yaubada i 'isedi i
awave'atumaiedi.

¹⁹ I lovani i nagoga i 'atai, 'aiata 'ana ve-4 'ana tugusa.

²⁰ I 'a'avana, Yaubada i vona i vo, 'Aisaya ma yawaidi tulina tulina ufeye wata eyage i na vefueotoga, we'e manuga i na yaveyavega fwayafwaya wata abama 'awasasadie.”

²¹ 'Aisayanidi Yaubada i 'idewadiga i vefue-'afo'afo ufeye wata eyage ma waumidi tulina tulina, wata 'aisaya bwaikaotogidi i miamianiga eyage i 'idewadi. We'e manuga yavoga tulina tulina wata i 'idewadi. Yaubada i 'isedi i awave'atumaiedi.

²² Yaubada i vesauluva-'atumaiedi i vo, 'Wa na venatueva'wa bega 'ami 'aila'a i na vebwaika eyaga nageneye wata manuga 'ami 'aila'a i na vefue fwayafwaya tabwaneye.”

²³ I lovani i nagoga i 'atai, 'aiata 'ana ve-5 'ana tugusa.

²⁴ I 'a'avana Yaubada i vona i vo, Fwayafwayayega 'aisaya ma yawaidi i na souyedi, bani'odi tauvanuga, walawala'ai wata daledaledi fatala tulina tulina.” Yaubada yana voneye 'ana mogitana i souyedi.

²⁵ Yaubada 'aisayanidi i 'idewadi, walawala'ai wata tauvanuga fatala tulina tulina 'waidiega, kumanidiavo i daledale wata i yabayaba fwayafwaya 'waineye. Yaubada i 'isedi i awave'atumaiedi.

²⁶ I 'a'avana Yaubada i vona i vo, Tomotoga ta na 'idewadi 'ida bani'odiga 'ada 'isa'isa, kumanidiavo i na veveimea 'aisaya eyage wata manuga i yaveyavega 'awasasa'aveye. Nani

matatabuna fwayefwayeye i na veveimeyedi,
bani'odi 'aisaya tauvanuga, walawala'ai wata
daledaledi.”

²⁷ Nika Yaubada tomotoganidi i 'idewadi taunina
'ana 'isa'isa bani'odiga.

Taunina 'ana 'isa'isanina bani'odi i 'idewadi,
iavetana wata vevinena i 'idewadi.

²⁸ Yaubada i awave'atumaiedi i vo, 'Wa na
venatuvea'wa bega 'ami 'aila'a i na vebwaika
fwayafwaya 'wa na luvaia wata 'wa na
ve'itulamuyeni. 'Wa na vetoveimea igana eyage,
manuga 'awasasa'avaneye, wata nani ma
yawaidi matatabudi i miamia fwayefwayeye.”

²⁹ Wata i vo, 'Wa na 'isedi. Mosomoso ma biladi
'aitamogana 'aitamogana fwayafwaya
matatabuna 'waineye wata 'ai vuavuaga ma
waifeidi 'aitamogana 'aitamogana a velemini,
'asa'aiana 'ami'ami.

³⁰ We'e 'aisaya fwayefwayeye, manuga
'awasasa'aveye, 'aisayanidi i daledale, naninidi
matatabudi ma yawaidi mosomoso wata welavi
'akonadi a veledi 'waidiega i na 'ani'ani.” Yana
voneye 'ana mogitana i souyeni.

³¹ Yaubada nani 'aitamogana 'aitamogana i
'idewadiga i 'isedi, matatabudi 'adi 'isa
'atumaiaotogidi. I lovani i nagoga i 'atai, 'aiata 'ana
ve-6 'ana tugusa.

2

¹⁻² Side bani'odi abama, fwayafwaya wata
naninidi nagedie taiadi i 'idewa'a'avadi, bega
'aiata 'ana ve-7 'waineye Yaubada bei i veawai.

³ Yana 'idewadewa wata yana folova i ve'a'avaiga, i veawai, begaidi Yaubada 'aiatanina i vesauluva-'atumaieni wata i vetabuya taunina faifaina.

Yaubada tomogo wata vavine i 'idewadewadi

⁴ Side bani'odiga 'AUVEA Yaubada abama wata fwayafwaya i 'idewadiga 'ana veifufu.

⁵ Fwayefwayeye welavi siaidi wata mosomoso bola kebu i da ve'alatabotabo, fai 'AUVEA Yaubada 'wei kebu i da tauyeni fwayafwaya i na tauvebikai, wata fwayafwayanina 'ana tofolova tomotoga kebu.

⁶ We'e fwayafwayayega ufa-luluvuala i sousouyedi fwayafwaya matatabuna i 'i'ivebikadi.

⁷ 'AUVEA Yaubada tomogo i 'idewai fwayafwaya 'aufofoualina 'wainega. I yuvedamani yawaina i luku tomogo kabunineye nika i tovoi ma yawaina.

⁸ Wata 'AUVEA Yaubada bakula i bakuli inala yana 'eba laka Ideni weyaginega, nika tomogonina i 'idewaiga, bei ivemiani.

⁹ 'AUVEA Yaubada welavi tulina tulina i 'idewadi i ve'alatabotabo fwayafwayayega, welavinidi 'adi 'isa 'eba nua'ewa wata vuagidi 'atumaivotogidi 'ani faifaina. Bakulanina kamwaneye Mia-vagata 'ana Welavi wata 'Aseta 'ana Welavi i tovofovoi, 'Atumaina wata Sakoina.

¹⁰ 'Awalawa Ideni 'wainega, ufa i sousouyeni i ivoivo bakula i 'i'ivebikadi, wata ufanina 'aitamogana 'wainega i 'idia 'eto'awadakadakadi 'adi 4 i souyedi.

¹¹ Nimailina kumekumetana 'ana wagava ufa Fisoni, i sousouyeni i ivoivo 'awalawa Avila matatabuna i luvivileni, wata bei golida i veluagai.

¹² Golida 'awalawanina 'waineye 'asa'aiana golida mogitana, vane magaina 'atumaina wata kileu 'avu'avuna 'adi wagava onisi wata bei i veluagadi.

¹³ Nimailina 'ana veluga 'ana wagava Gioni, i sousouyeni i ivoivo 'awalawa Kusi matatabuna i luvivili.

¹⁴ Nimailina 'ana vetonu 'ana wagava Tigilisi, i sousouyeni i ivoivo inala yana 'eba laka weyaginega 'awalawa Asula lilivaneamo. We'e nimailina 'ana ve 4 'ana wagava ufa Iufiletisi.

¹⁵ 'AUVEA Yaubada tomogo i naweni bakula Ideni 'waineye i valovei bega i na veto'isave'avina wata bei i na folofolova.

¹⁶⁻¹⁷ We'e 'AUVEA Yaubada tomogo i voneni i vo, Bakula nageneye welavi fuedi i tovofovoi 'omu yavuyavumu 'waidiega 'u na 'ani'ani siwe *'Aseta 'ana Welavi, 'Atumaina wata Sakoina faifaidi* vuagina kebu 'u na 'aniaga. 'Ai'edi 'u na 'aniaga, 'u na wafaotoga.”

¹⁸ Mulieta 'AUVEA Yaubada i vo, Kebu 'ana 'isa 'atumaina tomogo 'aisena i na miamia, 'ana 'au a na 'idewai 'ana to'aivaita.”

¹⁹ 'Aisaya wata manuga 'AUVEA Yaubada i 'idewadi fwayafwaya 'wainega, matatabudi i miedi Adama 'waineye. Nuanuana i na 'asetai ava'ai wagavaga Adama i na goledi. 'Aisayanidi 'adi wagava Adama i velediga, 'asa'aiana 'adi wagavanidi.

²⁰ Bega tomogo 'aisaya tauvanuga, walawala'ai wata manuga 'awasasa'aveye, 'aitamogana 'aitamogana 'adi wagava i goledi. We'e Adama 'aisena kebu 'ana 'auga i na 'i'ivaiseni.

²¹ Begaidi 'AUVEA Yaubada tomogo i luve'enovi nika i 'enowafa. Tutuyanina i 'eno'eno lumalumana i siyo'ei wata 'awasasana vigonega i yatobodai.

²² Lumalumananina 'AUVEA Yaubada tomogo 'wainega i 'ewaiga bega vavine i 'idewai. I 'a'avana vavine i mieni tomogo 'waineye.

²³ Nika tomogo i vona i vo,
De'e kumanina be'ama yau luluku 'wainega i souyeni,

Wata vigoku 'wainega bani'odi.
'Awaie i na goleni 'ana wagava *Vavine*,
fai tomogo 'wainega i souyeni.”

²⁴ Side lamunanina bega iaveta tamadiavo wata inadiavo 'waidiega i na 'a'awa'ididi, ma'itufa yadi vevinevo taiadi i na luluvetubama nika i na veve'aitamoga.

²⁵ Tomogo ma yana vavine 'adi 'ailuga konekoned i siwe kebu i da bunumayaga.

3

Tomogo wata vavine Yaubada yana veimea i geuya

¹ 'AUVEA Yaubada 'ana 'idewadewavo 'aisaya walawala'ai 'waidiega 'o'olo yana nuauya bwaikina we'e 'aisaya 'ifwaidi sai'afo. Tamu tutuya 'o'olo vavine i velutolieni i vo, Mogitana

Yaubada i vonemu bega welavi matatabudi
'waidiega vuagidi kebu 'u na 'anidiga?"

² Nika vavine i tutula i vo, Yaubada i tauyema
bega welavi vuagidi bakula de'e 'wainega 'a na
'anidi.

³ Siwe wata i vonema i vo, Welavinina i
tovotovoi bakula kamwaneye kebu 'wa na
kiatonoviga wata vuagina kebu 'wa na 'aniaga, i
na nunago 'wa na wafa."

⁴ 'O'olo vavine i voneni i vo, Kebu tamu sai'afo
'wa na wafaga.

⁵ Yaubada i talabodemiga fai i 'asetai
tutuyanina vuaganina 'wa na 'ania nuami i na
magetai nika 'omi Yaubada bani'odiga, 'atumaina
wata sakoina 'wa na 'asetadi."

⁶ Mulieta vavine welavinina i 'iseni, 'ana 'isa
'eba nua'ewa we'e vuagina 'atumaiotogidi 'eba
'ani, nuanuana i na 'ania bega 'aset wata
nuamageta i na veluagai. Begaidi i kadia i 'ania,
nika 'ifwaidi yana lamoga i veleni, wata i 'ania.

⁷ Tutuyanina i 'ani'a'ava nika 'adi 'ailuga nuadi
i magetadi, yadi vekonekone faifaina i
bunumayaga, bega welavi lukudi bababadi i
agilidi, i 'a'avana i ve'wesenedi tomogodi i
velubabaledi.

⁸ Lavilavie, yagi'oya 'ana tutuye, tomogo ma
yana vavine 'AUVEA Yaubada butu'aina i nogai i
mimai. Tomogo ma yana vavine i giva welavi
'awasasadie bakula nageneye.

⁹ 'AUVEA tomogo i goleni i vo, 'Omu ava'aibe?"

¹⁰ I tutula i vo, Yau bakula nageneye butu'aimu
a nogai bega a kololo fai konekoneku nika a giva."

¹¹ 'AUVEA i voneni i vo, Aitoi i vonemu konekonemu? Welavinina a talabodeniga, vuagina 'u 'ania?"

¹² Tomogo i vo, Vavinenina 'u veleku, welavi vuagina i veleku a 'ania."

¹³ Nika 'AUVEA Yaubada vavine i voneni i vo, Awale naninina 'u 'idewai?" Vavine i vo, 'O'olo i vekalieku bega a 'ania."

Yaubada tomogo ma yana vavine i vematavulogidi

¹⁴ 'AUVEA Yaubada 'o'olo i voneni i vo, Fai sauluva sakoina 'u 'idewaiga, 'Aisaya tauvanuga wata 'aisaya walawala'ai matatabudi 'waidiega 'omu 'aisemu 'amu vematavuloga bwaikaotogina a velevelemu. Kamomuyega 'u na 'iu'iula, we'e fwayafwaya 'aufofoualina 'u na 'ani'ania yamu mia tutuya matatabuna 'waineye.

¹⁵ 'Omu wata vavine a na kiavekamogalimi, 'wainega tauni'avami 'wa na vegavia. Wata bani'odi 'omu tubumwavo wata vavine tubunavo taiadi i na vegavia. Tamu 'waidiega 'unu'unumu i na nikei, We'e 'age'edu'eduna 'u na ovai." *

¹⁶ 'AUVEA vavine i voneni i vo, Veviga venatuna 'waineye a na 'ivebwaiki, We'e yamu lamoga 'ana nuanua nuamie i na 'eno'eno siwe i na veveimeyemu."

¹⁷ Adama 'waineye i vo,

3:13: 2 Kol 11:3; 1 Tim 2:14 **3:15:** Ve 12:17 * **3:15:** Wata 'wa na 'iseni 1 Ioni 3:8 **3:17:** Ibu 6:8

- Fai yamu vavine bonana 'u nogai
bega welavi vuagina a talabodeniga 'u 'ania,
'waimuyega fwayafwaya matatabuna i sako
Bega yamu mia matatabuna 'waineye 'u na
vetafewa 'ani'ani 'ana veluaga faifaina.
- 18 Domwa lovelovenidi i na ve'alatabotabo
fwayefwayeye,
siwe 'u na bakubakula, 'wainega 'u na
'ani'ani.
- 19 'U na folova bwaikina, 'u na ibala
bega 'ani'ani 'u na veluagai.
Mulieta 'u na vilamu 'u na vefwayafwaya
bega 'u souyemu.
'Omu fwayafwaya 'aufofoualina, wata
bani'odi 'u na vilamu 'u na vefwayafwaya.”
- 20 Adama yana vavine i goleni Ive fai taunidi
nani ma yawaidi matatabudi inadi.
- 21 Nika 'AUVEA Yaubada Adama ma yana vavine
'adi talauma 'aisaya bunudiega i 'idewadi bega i
ve'wesenedi.
- 22 Mulieta 'AUVEA Yaubada i vona i vo,
'Asa'aiana, tomogo 'akonadi 'ida bani'odi,
'atumaina wata sakoina i 'asetadi. Kebu i da
lubwaineni *Mia-vagata 'ana Welavi* vuagina i na
'ania, i na nunago miamia-vagaina i na veluagai.”
- 23 Begaidi 'AUVEA Yaubada bakula Ideni
'wainega i veugegedi i souyedi, bega Adama
fwayefwayeye i na bakubakula, fwayafwayanina
'wainega Yaubada i 'idewai.
- 24 I veugegediga, ma'itufa anelose toketokedi
'adi wagava Selebimu i yatodi Bakula Ideni
'waineye, we'e yadi kefata 'ala'alaina i luluivila.

Anelosenidi i tovtovoi bakula lilivaneye, we'e inala lakavinega, *Mia-vagata 'ana Welavi 'ana 'eda i na tovtobodai.*

4

Keni wata Ebeli

¹ Adama yana vavine taiadi i veluga nika i veinainage, mulieta kwamana iavetana i tubuga i goleni Keni. Ive i vona i vo, 'AUVEA yana 'aivaita 'wainega kwamana iavetana i tubuga 'waimega."

² Ifwaidi tutuya i 'a'avana, natudi 'ana veluga i tubuga i goleni Ebeli, Keni taina. Natudiavo i taulai, Ebeli 'aisaya sifi 'adi to'isave'avina we'e Keni tobakula.

³ Tamu tutuya 'waineye, Keni 'ani'ani yana bakulayega i miedi bega i na 'anivelenedi 'AUVEA 'waineye.

⁴⁻⁵ We'e Ebeli yana 'aisaya sifi akavau 'adi tubuga 'atumaide wata yafayafadi i miedi i 'anivelenedi 'AUVEA 'waineye. 'AUVEA Ebeli yana 'aniveleni i awave'atumaide, we'e Keni yana 'aniveleni kebu i da awave'atumaide, begaide Keni i nuasako ma yana luvulewa.

⁶ 'AUVEA Keni i velutolieni i vo, Awale 'u nuasako? Maigimu 'ana 'isa ma yamu luvulewa?

⁷ 'Ai'edi yamu sauluva 'atumaina wata magemagetana yau a na awave'atumaide. We'e 'ai'edi kebu, sakona i lulukamata vita i na velema 'wa da vo bani'odi 'aisaya kasikasisina i bodaboda nuanuana tomogo i na luvula'ovi. Sakona nuanuana i na veveimeyemu siwe i lubwainemu 'u na vetoketoke-'iaweni."

⁸ Keni taina Ebeli i voneni i vo, Ta na nago wala'aie ta na yabayaba.” Tutuyanina i le'wa wala'aie nika Keni taina i nikei i wafa.

⁹ Mulieta 'AUVEA Keni i voneni i vo, Taimu Ebeli, ava'aibe bei?” Keni i tutula i vo, Kebu a da 'asetaigna, yau kebu 'ana to'isave'avinaga.”

¹⁰ 'AUVEA i vo, Ava'ai 'u 'idewai? Fwayafwayayega taimu dayagina i taidaida 'waikuye.

¹¹ Tutuya de'e bega i na nagoga 'amu vematavuloga 'u na 'ewai fwayafwaya 'wainega, we'e fwayafwayanina 'waineye taimu dayagina nimamuyega i iloilolo i obuobu, 'wa da vo fwayafwaya 'awana i da o'ei dayaganina i da tononi.

¹² Tutuyanina 'u na folofolova fwayafwayanina 'waineye, kebu 'aile'wa 'u na veluagai. Tomotoga 'omu 'adi gavia bega 'u na yaba-vuvua fwayafwaya matatabuna 'waineye.”

¹³ Keni 'AUVEA i voneni i vo, 'Aku vematavuloga bwaikaotogina, kebu 'aku fata a na tovoieni.

¹⁴ Tutuya de'e fwayafwaya wata yamu 'atumaina 'wainega 'u veugeugeku, wata yaku mia 'u fetoi begaidi a na miayaba-vuvua kebu yaku 'eba mia. 'Ai'edi aitoe i na veluagaku, i na luvewafaku.”

¹⁵ SIWE 'AUVEA i voneni i vo, Kebu. 'Ai'edi aitoe i na luvewafamuga, 'ana vematavuloga tutuya 7 ma 'ana 'imoso'i i na veveluagai.” Wata'AUVEA tamu tugusa i yatoe Keni 'waineye, bega aitoe nuuanuana i na luvewafai, tugusanina i na 'iseni i na baileni.

¹⁶ Bega Keni 'AUVEA yana 'atumaina 'wainega i souyeni i nago 'awalawa Nodi bei i mia, bakula Ideni inala yana 'eba laka weyaginega.

Keni tubunavo

¹⁷ Mulieta Keni yana vavine taiadi i veluaga, nika i veinainage i venatuna Inoki i tubuga. Keni 'atamana bwaikina 'ana to'aiyogona, begaidi natuna 'ana wagavayega 'atamananina i goleni Inoki.

¹⁸ Inoki natuna Iladi, Iladi natuna Meuyaela, Meuyaela natuna Metusaela, Metusaela natuna Lemeki.

¹⁹ Lemeki vevine 'adi 'ailuga i nagidi, tamu 'adi wagava Adai, we'e tamu Saila.

²⁰ Adai i venatuna Ibali i tubuga. Kumanina ma enavo vadavada nagami 'waidie i mia, wata nagami 'aisaya 'adi to'isave'avina tamadi.

²¹ Taina 'ana wagava Iubala, kumanina ma enavo nagami 'eba lauinava gita wata 'umo i 'asetai, 'waidiega i 'wava'wava.

²² Saila natuna iavetana i tubuga, 'ana wagava Tubala-Keni. Tomogonina yana 'aseti bwaikina 'eba folova kainumu wata balonisi tulina tulina 'waidiega i 'i'idewadi. We'e Tubala-Keni novuna 'ana wagava Nama.

²³ Tamu 'aiata 'waineye, Lemeki yana vevinevo i vonedi i vo,

Adai wata Saila, bonaku 'wa na nogai.

Yau Lemeki, yaku vevinevo, 'wa na vainenega a na vonemi.

Yau tomogo 'aku daba i daba a luvewafai,

we'e tamu tubuau veviga i veleku a nikei i wafa.

- 24 'Ai'edi tamu aitoi Keni i na nikeiga, tutuya 'adi 7
'ana vemataavuloga i na veluagai,
we'e yau Lemeki, 'ai'edi i na luwewafakuga,
'ana vemataavuloga i na veluagai tutuya
'adi 77."

Seti yana tubuga

25 Adama yana vavine taiadi i veluaga nika i miana, mulieta i venatuna, kwamana iavetana i tubuga i goleni Seti. Ive i vo, Kwamana de'e Yaubada i velema Ebeli tutulina, kumanina Keni i luwewafai."

26 Seti i vebwaika i nagi, yana vavine i venatuna natuna iavetana i tubuga i goleni Inosi. Tutuyanina 'waineye tomotoga i velamu ma yadi subia 'AUVEA 'waineye i 'odu'odu.

5

Adama tubunavo

1 Adama tubunavo side bani'odi valadi.

Tutuyanina Yaubada tomotoga i 'idewadiga, taunina 'ana 'isa'isa bani'odi.

2 Tomotoga i 'idewadiga, iavetana wata vevinena, mulieta i vesauluva 'atumaina 'waidie i goledi *Tomotoga*.

3 Tutuyanina Adama 'ana malamala 130 i veluagai, nika natuna i tubuga taunina 'ana 'isa'isa bani'odi. Natunanina i goleni Seti.

4 Seti i tubuga i 'a'avana, Adama i mia malamala 800, malamalanidi nagedie 'ifwaidi natunavo iavetadi wata vevinedi i tubuga.

⁵ Adama 'ana malamala 930 i veluagai, nika yawaina i 'a'ava.

⁶ Tutuyanina Seti 'ana malamala 105 i veluagai, nika Inosi i tubuga.

⁷ Inosi i tubuga i 'a'avana, Seti i mia malamala 807, malamalanidi nagedie 'ifwaidi natunavo iavetadi wata vevinedi i tubuga.

⁸ Seti i miamia malamala 912 i veluagai, nika i yawaina i 'a'ava.

⁹ Inosi 'ana malamala 90 i veluagai, natuna Kenani i tubuga.

¹⁰ Kenani i tubuga i 'a'avana, Inosi i mia malamala 815, malamalanidi nagedie 'ifwaidi natunavo iavetadi wata vevinedi i tubuga.

¹¹ Inosi i miamia 905 malamala i veluagai, nika yawaina i 'a'ava .

¹² Tutuyanina Kenani 'ana malamala 70 i veluagai, natuna Malaleli i tubuga.

¹³ Malaleli i tubuga i 'a'avana, Kenani i mia malamala 840, malamalanidi nagedie 'ifwaidi natunavo iavetadi wata vevinedi i tubuga.

¹⁴ Kenani i miamia 'ana malamala 910 i veluagai, nika yawaina i 'a'ava.

¹⁵ Tutuyanina Malaleli 'ana malamala 65 i veluagai, Ieledi i tubuga.

¹⁶ Ieledi i tubuga i 'a'avana, Malaleli i miamia malamala 830, malamalanidi nagedie 'ifwaidi natunavo iavetadi wata vevinedi i tubuga.

¹⁷ Malaleli i miamia 'ana malamala 895 i veluagai, mulieta yawaina i 'a'ava.

¹⁸ Tutuyanina Ieledi 'ana malamala 162 i velugai, natuna Inoki i tubuga.

¹⁹ Inoki i tubuga i 'a'avana, Ieledi i miamia 'ana

malamala 800, malamalanidi nagedie 'ifwaidi natunavo iavetadi wata vevinedi i tubuga.

²⁰ Ieledi i miamia 'ana malamala 962 i veluagai, mulieta yawaina i 'a'ava.

²¹ Inoki 'ana malamala 65 i veluagai, natuna Metusela i tubuga.

²² Metusela i tubuga i 'a'avana, Inoki Yaubada taiadi i veiana malamala 300, malamalanidi nagedie, 'ifwaidi natunavo iavetadi wata vevinedi i tubuga.

²³ Inoki i miamia malamala 365 i veluagai.

²⁴ Inoki Yaubada taiadi i veveiana, mulieta Yaubada i vagavaia i naweni.

²⁵ Tutuyanina Metusela 'ana malamala 187 i veluagai, natuna Lemeki i tubuga.

²⁶ Lemeki i tubuga i 'a'ava, Metusela i miamia 782, malamalanidi nagedie 'ifwaidi natunavo iavetadi wata vevinedi i tubuga.

²⁷ Metusela 'ana malamala 969 i veluagai, mulieta yawaina i 'a'ava.

²⁸ Tutuyanina Lemeki 'ana malamala 182 i veluagai, natuna iavetana i tubuga.

²⁹ Fai 'AUEA fwayafwaya i awavesakoyeni begaidi Lemeki natuna i golemi Noa, * 'ana 'asetanua-to'iveoloolo fai i vo, Yada folova wata veviga 'waidiega nuada i na 'iveoloolodi."

³⁰ Lemeki i miamia malamala 595, malamalanidi nagedie 'ifwaidi natunavo iavetadi wata vevinedi i tubuga.

³¹ Lemeki i miamia 'ana malamala 777 i veluagai, nika yawaina i 'a'ava.

* **5:29:** Vona Ibeliu 'waineye, wagava Noa 'ana nogaya 'wa da vo nuada i na 'iveoloolodi

- ³² Tutuyanina Noa 'ana malamala 500 i veluagai, mulieta natunavo 'adi 'aitonu i tubuga, Semi, Ami wata Iefeta.

6

Fwayefwaya matatabuna sakona i veimeyeni

¹ Tutuyanina tomotoga 'adi 'aila'a i vevebwaika fwayefwayeye, wata natudiavo vevine i vevenatunedi.

² Tomia abama 'ifwaidi* vevine 'adi 'isa 'atumaiddi i 'isedi, bega taunidi yadi venua'ivina 'waidiega i nagidi.

³ Bega 'AUVEA i vona i vo, 'Anu'anunuku kebu a na tauyeni tomotoga 'waidie i na 'eno-vagata, fai tomogodi 'a'a'avididi. Begaidi tutuya de'e 'wainega i velamu i nunagoga, tomotoga 'adi malamala 120 i na veluagai yawaidi i na 'a'ava."

⁴ Tomia abamanidi vevine taiadi i veveluaga i vevenatuna, bega tomotoganidi tovemata'ai'ai wata tolugavia ma'adiwagava tutuya basenadi bani'odi. I golegoledi Nefilimi, tutuyanina 'waineye fwayefwayeye i miamiani, wata tutuya i mimaiga tomotoganidi i na souyedi.

Tomotoga yadi sakona i vebwaika

⁵ 'AUVEA i 'iseni tomotoga yadi sauluva sakoidi i vebwaika-'afo'afo fwayefwayeye. Tutuya matatabuna yadi nuanua wata yadi venua'ivina 'aitamogana 'aitamogana 'asa'aiana sakona-vebogi.

* **6:2:** 'Ana mogitana vona Ibeliu 'waineye, *Yaubada natunavo iavetadi.* **6:5:** Mad 24:37; Luk 17:26; 1 Fit 3:20

⁶ Nika 'AUVEA nuana i 'uvani wata nuafofuna i toke i veviga tomotoga i 'idewadiga fwayefwayeye faifaiddi.

⁷ Bega 'AUVEA i vo, Tutuya de'e tomotoga a 'idewadiga a na 'ewayavuledi fwayafwaya 'wainega, tomotoganidi, 'aisaya bwaikidi, 'aisaya daledaledi wata manuga taiadi, mogitana nuaku a 'uvani a 'idewadiga faifaiddi.

⁸ Siwe Noa 'aisena yana sauluva tonovina bega 'AUVEA i awave'atumaieni.

Noa ifuifufuna

⁹ De'e Noa 'ana wauma ifuifufudi.

Noa yana sauluva 'atumaina wata magemagetana, 'aiseotogina kumanina kebu tamu yana sakonaga tomia fwayafwaya matatabuna 'waidiega, we'e Yaubada i labilabini.

¹⁰ Noa natunavo iavetadi 'adi 'aitonu Semi, Ami wata Iefeta.

¹¹ Tutuyanina 'waineye Yaubada mataneye tomia fwayafwaya yadi sauluva sakoina i vebwaika-'afo'afo wata i vevetalaga-vebogi.

¹² Yaubada i 'iseni 'asa'aiana sakona i veveimea fai tomia fwayafwaya matatabudi yadi sauluva i sako-'afo'afo.

¹³ Bega Yaubada Noa i voneni i vo, Tutuya de'e 'waineye a nuani tomotoga bei a na ve'lovedi wata a na luvela'ovidi fai i veve'inikenike bega fwayafwaya matatabuna 'waineye vetalaga i vevebwaika. 'Asa'aiana, tomotoganidi wata fwayafwaya taiadi a na 'u'umidi.

¹⁴ Bega waka tamu 'u na yogoni welavi saifilos[†] 'wainega, wakanina nagen, dolena wata 'ayana taiadi koluta[‡] 'wainega 'u na dekuya. Tutudaba 'u na bibini bega 'awasasa i na vefue.

¹⁵ Waka side bani'odi 'u na 'aiyogonayedi. 'Ana vemanawe 140 mita, 'ana vebababa 23 mita wata 'ana velaka 14 mita.

¹⁶ Waka 'ana saila'a 'u na tutuya welavi 'wainega wata tutubweka 'u na yatoi waka i na luvivili saila'a dibuneye, 'ana velaka nimamu 'ana tubwa 'ana vemanawe. 'Awa ma 'ana saiboda 'u na 'idewai bibina lilivaneye, we'e talalia 'aitonu 'u na liadi waka nageneye, tamu dibuneye, tamu kamwaneye wata tamu tabwaneye.

¹⁷ 'U na vainenega, tutuya 'ale'usana 'waineye, nani ma yawaidi fwayefwayeye a na luvela'ovidi wayagata bwaikina 'wainega. Nani matatabuna i na ve'alawafawafa."

¹⁸ Wata Yaubada i vo, Yaku veakutagona a na 'idewai 'omu 'waimuye, 'u na dodoga wakeye, yamu vavine, natumwavo iavetadi ma yadi vevinevo taiadi.

¹⁹ 'Aisaya ma yawaidi matatabudi fatala tulina tulina 'waidiega 'ailuga 'u na vedodogidi wakeye. 'Aisayanidi iavetana 'aitamogana wata vevinena 'aitamogana ma yawaidi taiadi 'wa na miamia wakeye.

²⁰ Manuga, 'aisaya bwaikidi, siaidi wata daledaledi 'u na vedodogidi. 'Aisayanidi ma 'adi

[†] **6:14:** Saifilos[†] welavi fa'alina waka 'eba 'aiyogona, kebu yana buta-matayo'oga [‡] **6:14:** I fitai koluta 'wainega nika ufa kebu i na susula i na luku waka nageneye.

'auvo yavoga tulina tulina 'waidiega i na maia,
bega 'u na 'isave'avinidi ma yawaidi i na
miamiani.

²¹ 'U na toke 'ani'ani tulina tulina 'u na 'ewadi, i
na 'a'avana 'u na vedodogidi 'omi wata 'aisaya
'ami'ami."

²² Noa nani matatabuna i 'idewadi ava'ai
Yaubada i voneyeniga.

7

Wayagata bwaikina fwayafwaya i ulai

¹ Nani matatabuna i ve'a'avadina, 'AUVEA Noa i
voneni i vo, 'Omu ma yamu 'aila'avo wakeye 'wa
na dodoga fai 'omu 'aisemu yamu sauluva
tonovina matakuye tomotoga matatabudi
'waidiega.

² 'Aisayanidi a awave'atumaiedi* velomu
faifaina fatala tulina tulina 'waidiega, iavetadi 7
wata vevinedi 7 'u na 'ewadi we'e 'aisayanidi
kebu a da awave'atumaiediga 'ailuga 'ailuga 'u na
'ewadi, iavetadi wata vevinedi.

³ Wata bani'odi manuga, yavoga tulina tulina
'waidiega, iavetadi 7 wata vevinedi 7 'u na 'ewadi
bega 'waidiega i na venatuea'wa fwayafwaya
'waineye bega yavoga tulina tulina ma yawaidi i
na miamia.

⁴ 'Aiata 7 i na 'a'ava, mulieta a na ve'wei. 'Aiata
40 wata lovana 40 nagedie 'wei bwaikina i na
'wei'wei fwayefwayeye. 'Weinina i na nagoga
nani matatabuna ma yawaidi a 'idewadiga
fwayefwayeye a na ve'a'avadi."

6:22: Ibu 11:7 * **7:2:** 'Ana mogitana vona Ibeliu 'waineye,
'aisaya vunavunagidi.

⁵ Naninidi matatabuna 'AUVEA Noa i voneniga, i 'idewa'a'avadi.

⁶ Tutuyanina Noa 'ana malamala 600 i veluagai mwai bwaikina fwayafwaya i ulai.

⁷ Noa ma yana vavine, wata natunavo yadi vevinevo taiadi i dodoga wakeye mwai bwaikina 'wainega i 'ita'ita'iedi.

⁸ Wata bani'odi 'aisaya tulina tulina, 'ifwaidi 'eba 'ani wata 'ifwaidi 'eba velomu, manuga wata 'aisaya siaidi daledaledi matatabuna taiadi i dodoga.

⁹ Yaubada Noa 'ana veimea i voneniga 'asa'aiana bani'odi i vetutuyameni, begaidi 'aisaya 'ailuga 'ailuga i luku waka nageneye, iavetana wata vevinena.

¹⁰ 'Aiata 7 i 'a'ava, mulieta weyagata wata ufa bwaikina fwayafwaya i ulatavutavuni.

¹¹ Tutuyanina Noa 'ana malamala 600 i veluagai, weta'i 'ana veluga 'aiata 17 'waineye, fwayafwaya matatabuna dibunega ufa i vunala wata abamayega 'wei yavaleta ma lufwalufwana i obu.

¹² I 'wei 'wei 'aiata 40 wata lovana 40 nagedie.

¹³ 'Aiatanina 'waineye, Noa ma yana vavine, natunavo 'adi 'aitonu, Semi, Ami wata Iefeta yadi vevinevo taiadi i luku waka nageneye.

¹⁴ 'Aisaya tulina tulina, iavetana wata vevinena, 'aisaya tauvanuga wata 'aisaya walawala'ai, bwaikidi wata siaidi, manuga tulina tulina ma fafedi.

¹⁵ 'Aisaya ma yawaidi matatabuna 'waidiega, 'ailuga 'ailuga i mai Noa 'waineye, mulieta i luku waka nageneye.

¹⁶ Fai bani'odi Noa 'ana veimea Yaubada i voneniga i vetutuyameni, 'aisaya tulina tulina iavetana wata vevinena i luku waka nageneye. Mulieta 'AUVEA waka 'ana 'awa i simawai.

¹⁷ 'Aiata 40 nagedie wayagata i vevebwaika nika ufa fwayafwaya i ulai i veawana, waka i ulalakai i lu'afueni.

¹⁸ Mwai i vebwaika-'afo'afo nika waka i ulalakai ufa tabwaneamo 'atumaina i lulu'afueni.

¹⁹ Fwayefwayeye avinodi 'oya manamanawetogidi, siwe i ula-vuyovuyoidi.

²⁰ Mwai i ula i laka 'oya manamanaweotogidi i ula-tavutavunidi, wata sai'afo i vagalaka 'ana 'etoava bani'odi 7 mita.

²¹ Nani matatabuna fwayefwayeye ma yawadi bani'odi manuga, 'aisaya tauvanuga, 'aisaya walawala'ai, 'aisaya siaidi daledaledi fwayafwaya tabwaneye, wata tomotoga matatabudi i ve'alawafawafa.

²² Nani matatabuna yawayawaidi i miamiani fwayafwafwaya lalana 'waineye, i ve'alawafawafa.

²³ Nani ma yawaidi i miamianiga fwayefwayeye matatabudi 'AUVEA i ve'a'avadi, tomotoga, 'aisaya bwaikidi, siaidi i daledale wata manuga, matatabudi i ve'alawafawafa fwayefwayeye. Noa ma yana 'aila'avo, 'aisayanidi waka nageneye taiadi 'aisedi i luvegalaladi.

²⁴ 'Aiata 150 nagedie wayagata fwayafwaya i ulai.

8

Wayagata i dakwalili fwayafwaya i lala

¹Yaubada Noa wata 'aisayanidi waka nageneye i nuanidi, bega kaukau i butuya fwayafwaya i na yagivelalai, nika wayagata i velamu i na dakwalili.

²Fwayafwayayega ufa i vunavunalaga i kiabodai, wata abamayega yavaleta bwaikina i 'wei'weiga i tova.

³Fwayafwayayega mwai i velamu i 'awalia i obuobu.

⁴'Aiata 150 i 'a'ava weta'i 'ana ve 5 'waineye, wayagata bwaikina i velamuga, wata 'ana weta'inina i veluagai, waka i miabui 'oya Alalati tabwadie.

⁵Weta'i 'ailuga wata 'ana vetonu we'e kamwaneye, wayagata bwaikina i velamu i 'awalia i obuobu, nika 'ifwaidi 'oya tabwa'avadi i vemageta.

⁶'Aiata 40 i 'a'ava, mulieta Noa waka 'ana tutubweka i 'idewaiga i sibaleni.

⁷Nika bwayobwayo i vetunei i nago 'ani'ie wata i vilai mai, i yaveyavega ufa tabwaneamo 'ana tugusa wayagata bwaikina i lala.

⁸Wata bunebune i vetunei i nago i lauala nuanuana fwayafwaya lalana i na veluagai.

⁹Siwe bunebune kebu tamu yana 'eba toa i da veluagai, begaidi i vilai i nago wakeye. Tutuyanina i le'wa, Noa waka 'ana tutubweka 'wainega nimana i 'iyoyoeni nimaneye i toa, i lukuveni waka nageneye.

¹⁰I lulukamata 'aiata 7 i 'a'ava, mulieta Noa bunebune wata i vetunei.

¹¹Lavilavie bunebune i vilai i mai 'waineye, 'awaneye welavi olive lukuna yauyauvina i

'alagagai. Bega Noa i 'asetai, mwai bwaikina 'akonadi i lalala.

¹² I lulukamata 'aiata 7 i veluagai, wata bunebune i vetune-vaitugani. Yana nagonina 'waineye kebu i da vilai.

¹³ Noa 'ana malamala 601 i veluagai, malamala 'ivauna 'ana 'aiata kumekumetana 'waineye, weta'i 'ana ve-10 i 'a'ava, 'ana ve-11 we'e kamwaneye, wayagata wata ufa bwaikina fwayafwayayega i lala. Waka nagenata'uta'ula i sidadei, i 'iseni fwayafwaya 'akonadi i vemageta.

¹⁴ Weta'i 'ana veluga 'aiata 27 'waineye, fwayafwaya matatabuna i lalala.

¹⁵ Yaubada Noa i voneni i vo,

¹⁶ 'Wa souyemi waka 'wainega, 'omu, yamu vavine, natumwavo wata yadi vevinevo taiadi.

¹⁷ Tutuyanina 'u na souyemuga 'aisayanidi matatabuna taiadi, bani'odi manuga, 'aisaya bwaikidi wata siaidi i daledale fwayefwayeye. 'U na veyavulidi i na 'a'avana i na venatuvea'wa nika i na vefue fwayafwaya i na luvaia."

¹⁸ Yaubada i veifufu i 'a'avana, Noa ma yana vavine wata natunavo yadi vevinevo taiadi i souyedi wakayega.

¹⁹ 'Aisaya walawala'ai wata 'aisaya tauvanuga, kumanidiavo i yabayaba wata i daledale, manuga i yaveyavega, nani matatabuna i miamianiga fwayefwayeye ma 'adi 'auvo i souyedi wakayega.

²⁰ I souyedi i 'a'avana, Noa nuanuana 'AUVEA i na subiai bega 'eba velomu i didigi i na velomu 'waineye. 'Aisaya wata manuga tulina tulina

basenadi i awave'atumaiediga* velomu faifaina,
'ifwaidi i miedi bega i velomuyedi i kabunidi
'waineye.

²¹ Magaina 'iwanina 'wainega i sosoana bega
taunina 'waineye i vo, Kebu wata tamu tutuya
fwayafwaya a na vemataavulogi. Avinodi
tomotoga i vevenua'ivina sakona faifaina yadi
tutuya kwamana 'wainega, siwe kebu wata
fwayafwaya a na 'ivesako-vaitugani. We'e
mogitana kebu tamu tutuya nani matatabuna ma
yawaidi a na luvela'ovidi, bani'odi 'akonadi a
'idewai.

²² Fwayafwaya 'asa'aiana i na 'eno'eno, tutuya
koyova wata tutuya 'aiala, tutuya fayowata
tutuya yauryata, tutuya 'aikolu wata tutuya 'idi,
lovana wata 'aiata, tutuyanidi matatabuna kebu i
na 'a'ava."

9

Yaubada yana veakutagona i 'idewai Noa 'waineye

¹ Yaubada Noa ma natunavo i
vesauluva-'atumaiedi bega i vonedi i vo, 'Wa na
venatuvea'wa 'ami 'aila'a i na vebwaika nika
fwayafwaya 'wa na luvaia.

² 'Aisaya bwaikidi, siaidi daledaledi, manuga
wata igana, 'asiau wata tutuya i mimai 'waidie i
na kololoyemi we'e 'omi 'wa na veveimeyedi.

³ Basenadi mosomoso wata 'ai vuavuaga a
velemi yami 'eba 'ani. 'Asiau bega i na nunagoga
wata 'aisaya a tauyemi, 'waidiega 'wa na 'ani'ani.

* **8:20:** 'Ana mogitana vona lbeliu 'waineye, 'aisaya vunavunagidi.
9:1: Nag 1:28

⁴ Siwe kebu 'aisaya dayadayagina 'wa na 'aniaga fai dayaga yawaimi lamuna.

⁵ 'Ai'edi aitoi tamu tomogo i na nikei bega dayagina yana iloilolo 'wainega i na wafa, i lubwaineni to'ainikenina 'ana tutula wata i na wafa. 'Ai'edi tamu 'aisaya tomogo i na ovai i na wafa, 'aisayanina i na nikei i na wafa. Aitoi tomogo iana i na nikei i na wafa, i lubwaineni tomogonina wata i na wafa.

⁶ Yaubada tomotoga i 'idewadi taunina 'ana 'isa'isa bani'odiga.

Begaidi aitoi tamu iana i na nikei i na wafa, i lubwaineni tomogonina wata i na wafa.

⁷ We'e 'omi 'wa na venatueva'wa bega 'ami 'aila'a i na vebwaika fwayafwaya 'wa na luvaia."

⁸ I 'a'avana Yaubada Noa ma natunavo i vonedi i vo,

⁹ Tutuya de'e yaku veakutagona a 'idewai 'omi wata tubumiavo taiadi 'waimie.

¹⁰ Wata veakutagonanina a na 'idewai 'aisayanidi wakayega 'omi taiadi 'wa souyemiga 'waidie, bani'odi manuga, 'aisaya walawala'ai wata tauvanuga.

¹¹ Yaku veakutagonanina side bani'odiga. Kebu wata tamu tutuya nani ma yawaidi a na luvewafadiga wayagata 'wainega. 'Asiau bega i na nagoga kebu wayagata 'wainega fwayafwaya a na luvela'ovi."

¹² Wata Yaubada i vona i vo, De'e yaku veakutagona 'ana 'eba 'isa a na yatoi faifaimi.

'Omi, nani ma yawaidi matatabudi wata lakata i mimaiga taiadi.

¹³ Yaku abavole 'akonadi a yatoi waowa 'waineye, kumanina yaku veakutagona tomia fwayafwaya matatabumi 'waimie 'ana tugusa.

¹⁴⁻¹⁵ Tutuyanina waowa a na mieni fwayafwaya tabwaneye nika abavole 'wa na 'iseni, yaku veakutagona a na nuave'avini 'waimie wata nani ma yawaidi fuedi 'waidie. Side bani'odi. Kebu tamu tutuya tomia fwayafwaya matatabumi wayagatayega a na luvela'ovimi.

¹⁶ Tutuyanina abavole waowa 'waineye a na 'iseni nika a na nuani de'e yaku veakutagona 'eno'eno-vagaina 'ana tugusa, yau Yaubada wata nani matatabuna ma yawaidi i miamiani fwayefwayeye faifaidi.”

¹⁷ Begaidi Yaubada Noa i voneni i vo, E'e, de'e abavolenina yaku veakutagona 'ana tugusa, wata nani matatabuna fwayefwayeye faifaidi a vona'awaufaufa.

¹⁸ Noa natunavo wakayega i souyediga 'adi wagava side, Semi, Ami wata Iefeta. Ami natuna Kenani.

¹⁹ Noa natunavo 'adi 'aitonu 'waidiega, fwayafwaya matatabuna i luvaia.

²⁰ Tutuyanina mwai bwaikina i 'a'ava, Noa bakula i velamu kalefa talagina i bakuli.

²¹ Tamu 'aiata 'waineye oine taunina i 'idewaiga i yemu nuana i lugaugauya, konekonena i 'eno'eno vadavada nageneye.

²² Ami kumanina Kenani tamana, tamana i 'iseni, nika i souyeni tanotanoge enavo i vonedi.

²³ Bega Semi wata Iefeta tamu talauma i 'ewai,
'avaladiega i kiave'avini mulidiega i luku
vadevadeye tamadi konekonena i velu'uvai.
Maigidi i siviviedi bega kebu tamadi i na 'iseni
konekonena

²⁴ Tutuyanina oine yana toketokena i 'a'ava i
tovoi, nika i 'asetai ava'ai Ami yana
tubu-'walaboda i 'idewaiga 'waineye i 'iseni.

²⁵ Bega Noa Kenani i awavesakoyeni,
kumanina Ami natuna i vo,

I lubwaineni Kenani vita bwaikina i da
veveluagai.

I da vetofolova-maimaiga yana 'aila'a
'waidie, taunina bani'odi
tofolova-maimaiga.”

²⁶ Mulieta Noa i vo,

'AUVEA ta na subiai, taunina Semi yana Yaubada.
we'e Kenani i da vetofolova-maimaiga Semi
'waineye.

²⁷ Nuanuaku Yaubada Iefeta yana 'eba veimea i
da 'ivebwaiki,
wata tubunavo 'ai'aiwabu i da veluagai Semi
yana 'aila'a 'waidiega,
we'e Kenani i da vetofolova-maimaiga Iefeta
'waineye.”

²⁸ Tutuyanina wayagata bwaikina i 'a'ava, Noa
i miamia 350 malamala .

²⁹ I miamia 'ana malamala 950 i veluagai,
mulieta yawaina i 'a'ava.

10

¹ De'e Noa natunavo iavetadi Semi, Ami wata Iefeta ifuifufudi. Tutuyanina wayagata i 'a'ava, Noa natunavonidi 'adi 'aitonu ma yadi vevinevo i venatuna nika natudiavo iavetadi i ve'alatubutubuga.

Iefeta tubunavo

² Iefeta natunavo side 'adi wagava.

Goma, Magogi, Madai, Iavani, Tubala,
Meseki, Tilasi.

³ Goma natunavo side 'adi wagava.

Asikenasi, Lifati wata Togalama.

⁴ Iavani natunavo side 'adi wagava.

Ilaisa, Tasisi, Kitimi, Lodanimi.

⁵ Iavani tubunavo kumanidiavo tovenaya waka 'waidiamo i yavula i nagoi 'awalawa tulina tulina 'waidie, taunidi bonadi, 'adi wauma wata yadi sauluva tulina tulina 'awalawanidi 'waidie i miamia.

Ami tubunavo

⁶ Ami natunavo side 'adi wagava.

Kusi, Misilemi, Futi wata Kenani.

⁷ Kusi natunavo side 'adi wagava.

Siba, Avila, Sabeta, Lema, Sabeka.

Lema natunavo side 'adi wagava.

Siba wata Ideni.

⁸ Wata Kusi tubuna Nimiloda, kumanina nagamidiotoga tovemata'ai'ai kumekumetana fwayafwaya matatabuna 'waineye.

⁹ Tomogonina toveyaoga toketokeotogina 'ana wagava tomotoga yadi 'eba vetalatutula 'AUVEA mataneye. Begaidi 'ai'edi tamu aitai 'aisaya walawala'ai kasikasisidi i luvewafadi,

tomotoga i na vona i na vo, Tomogo de'e
Nimiloda bani'odi, kumanina toveyaoga
toketokeotogina 'AUVEA mataneye."

¹⁰ Yana 'eba veimea i yogoni 'awalawa
Babiloni 'waineye, 'atamana 'adi wagava,
Babiloni, Eleki, Akadi wata Kaline.

¹¹ 'Awalawanina i 'iaweni i nago 'awalawa
Asilia yana 'eba veimea nageneye, bei 'atamana
bwaikidi Ninive, Leobota-Ili wata Kala i yogonidi.

¹² We'e Leseni, 'atamananina bwaikaotogina
'atamana Ninive wata Kala we'e kamwadie.

¹³ Misilemi tubunavo 'waidiega side 'aila'anidi i
souyedi.

Me Ludi, me Anami, me Leabi, me Nafitu,

¹⁴ me Fafilusa, me Kasilu, (kumanidiavo me
Filisitia 'waidiega i souyedi), wata me Kafito.

¹⁵ Kenani natuna tulaina 'ana wagava Saidoni,
me Saidoni tubudi. Kenani wata bani'odi
tubunavo me Aiti,

¹⁶ me Iebusaiti, me Amolaiti, me Gegasaiti,

¹⁷ me Aiviti, me Akaiti, me Sinaiti,

¹⁸ me Avadaiti, me Semalaiti, me Amati.

Mulieta me Kenani 'adi wauma i vebwaika i
yavula.

¹⁹ Me Kenani yadi 'eba veimea i vebwaika, i
velamu 'atamana Saidoni 'wainega i nago
'atamana Gelai wata Gasa yavalatayega, we'e
inala yana 'eba lakayega Sodoma, Gomola,
Adema we'e Seboimu Lasa lilivaneye.

²⁰ Side 'aila'anidi Ami natunavo, 'adi wauma
'aitamogana 'aitamogana, bonadi tulina tulina,
yadi 'awalawa 'aitamogana 'aitamogana, wata
yadi sauluva tulina tulina.

Semi tubunavo

- ²¹ Wata Semi natunavo i tubuga, tulaina Iefeta.
Semi tubunavo 'waidiega me Iba matatabudi
i souyedi.
- ²² Semi natunavo side 'adi wagava.
Ilamu, Asula, Afakisadi, Ludi wata Alami.
- ²³ Alami tubunavo side 'adi wagava.
Usa, Uli, Geta, Meseki.
- ²⁴ Afakisadi natuna Sila, Sila natuna Iba.
- ²⁵ Iba natunavo iavetadi 'adi 'ailuga.
Tamu 'ana wagava Feliki, 'ana saivila 'idi, fai
tutuyanina 'waineye tomia fwayafwaya
bonadi 'aitamogana, mulieta bona tulina
tulina 'wainega yadi mia i 'idia. Iba taina
'ana wagava Ioketani.
- ²⁶ Ioketani tubunavo side 'adi wagava.
Alimodadi, Selef, Esamaveti, Iela,
- ²⁷ Adoloma, Usala, Dikila,
- ²⁸ Obala, Abimaela, Siba,
- ²⁹ Ofia, Avila, Iobaba. Tomotoganidi
matatabudi Ioketani 'ana wauma 'wainega i
souyedi.
- ³⁰ 'Awalawanina yana 'eba veimea i velamu
Mesa 'wainega i nago 'atamana Sefali 'oya
siaina 'waineye, inala yana 'eba lakayega.
- ³¹ Side 'aila'anidi Semi tubunavo, 'adi wauma
'aitamogana 'aitamogana, bonadi tulina tulina,
yadi 'awalawa 'aitamogana 'aitamogana, wata
yadi sauluva tulina tulina.

Noa natunavo 'adi 'aitonu 'adi wauma

- ³² Side bani'odi, Noa natunavo 'adi 'aitonu
'waidiega wauma fuedi i souyedi, 'aila'a
'aitamogana 'aitamogana tubulelelegidi

'waidiega. Tutuyanina wayagata wata ufa
bwaikina i 'a'ava, Noa natunavo 'waidiega,'aila'a
tulina tulina i susula fwayafwaya matatabuna
'waineye.

11

*'AUVEA tomotoga yadi bona 'aitamogana i
sivilavilai bona fuedi i souyedi*

¹ Tutuya kumekumetana 'waineye, tomotoga
matatabudi fwayefwayeye bonadi 'aitamogana
'wainega i veveifufu.

² Tutuyanina tomotoga i yaba-vuvua i nunago
inala yana 'eba laka 'wainega, nika tamu laube'u
bwaikina i veluagai 'atamana Sina 'awalawa
Babiloni bei i mia.

³ Bega ma ediavo i veifufu i vo, 'Wa maia, yada
beliki* ta na 'idewadi wata ta na kabunidi i na
fa'alidi."Fai kileu kebu, Begaidi beliki 'wainega i
'aiyogona wata koluta 'wainega i 'idekudeku.

⁴ Matatabudi i veifufu i vo, 'Wa maia, 'asiau
yada 'atamana bwaikina ta na 'idewai wata
vanuga manamanawena ta na yogoni i na laka
abame, nika 'ada wagava i na vebwaika bega
kebu ta na yavula fwayafwaya matatabuna
'waineye."

⁵ Tamu 'aiata, 'AUVEA i obuma 'atamana
bwaikina wata vanuganina manamanawena
tomotoga i yogoyogoniga i na 'iseni.

* **11:3:** Beliki tamu vanuga 'ana 'eba 'aiyogona fwayafwaya
dekudekuna 'wainega i na tutuya, 'ana 'isa 'wa da vo labia 'etobai
'aitamogana bani'odi. Mulieta i na yatoi i na lalana i na kabuni
bega i na fa'alaotogi. Belikinidi 'adi 'eba dekufwatagi koluta bega
yadi vanuga i yogoyogonidi.

⁶ Nika 'AUVEA i vo, E'a, fai 'aila'a 'aitamogana wata bonadi 'aitamogana, begaidi ma 'aila'adi folovanidi i vevelamudi, wata folovanina i nuani i na 'idewaiga, 'waidie kebu vitanaga.

⁷ 'Asa'aiana! ta na obu tomotoga bonadi 'aitamogana ta na sivilavilai i na vetuli bega bona fuedi i na souyedi, 'wainega ma ediavo i na ve'ibavubavu.”

⁸⁻⁹ Kumanina faifaina, 'AUVEA tomotoga i luveyavulidi i nagoi fwayafwaya matatabuna 'waidie, we'e 'atamananina bwaikina i yogoyogoniga i 'ailove. Begaidi 'atamananina bwaikina i goleni Babeli, fai 'AUVEA tomia fwayafwaya bonadi i sivilai bona tulina tulina i souyedi. Sauluvanina 'wainega, i luveyavulidi i nagoi fwayafwaya matatabuna 'waineye.

Semi 'ana wauma 'wainega Ebelamu i souyeni

¹⁰ De'e Semi tubunavo valadi.

Wayagata wata ufa bwaikina i 'a'ava, malamala 'ana veluga 'waineye, Semi 'ana malamala 100 i veluagai, natuna Afakisadi i tubuga.

¹¹ Afakisadi i tubuga, mulieta Semi i miamia malamala 500, malamalanidi nagedie natunavo iavetadi wata vevinedi i tubuga.

¹² Tutuyanina Afakisadi 'ana malamala 35 i veluagai, natuna Sila i tubuga.

¹³ Sila i tubuga i 'a'ava, Afakisadi i miamia malamala 403, malamalanidi nagedie, natunavo iavetadi wata vevinedi i tubuga.

¹⁴ Tutuyanina Sila 'ana malamala 30 i veluagai, Iba i tubuga.

¹⁵ Iba i tubuga, mulieta wata Sila i mia 'ana malamala 403 'waineye, natunavo iavetadi wata vevinedi i tubuga.

¹⁶ Tutuyanina Iba 'ana malamala 34 i veluagai, natuna Feliki i tubuga.

¹⁷ Feliki i tubuga, mulieta wata Iba i mia 'ana malamala 430 i veluagai, natunavo iavetadi wata vevinedi i tubuga.

¹⁸ Tutuyanina Feliki 'ana malamala 30 i veluagai, natuna Leu i tubuga.

¹⁹ Leu i tubuga, mulieta wata Feliki i mia 'ana malamala 209 'waineye, natunavo iavetadi wata vevinedi i tubuga.

²⁰ Tutuyanina Leu 'ana malamala 32 'waineye, natuna Seluki i tubuga.

²¹ Seluki i tubuga, mulieta wata Leu i mia 'ana malamala 207 i veluagai, natunavo iavetadi wata vevinedi i tubuga.

²² Tutuyanina Seluki 'ana malamala 30 'waineye, natuna Naoli i tubuga.

²³ Naoli i tubuga i a'ava, mulieta wata Seluki i mia 'ana malamala 200 'waineye, natunavo iavetadi wata vevinedi i tubuga.

²⁴ Tutuyanina Naoli 'ana malamala 29 i veluagai, natuna Tela i tubuga.

²⁵ Tela i tubuga i a'ava, mulieta wata Naoli i mia 'ana malamala 119 'waineye, natunavo iavetadi wata vevinedi i tubuga.

²⁶ Tela 'ana malamala 70 i veluagai, natunavo Ebelamu, Naoli wata Elana i tubuga.

Tela yana 'aila'a

²⁷ De'e Tela natunavo valadi. Tela natunavo side 'adi wagava, Ebelamu, Naoli wata Elana. Mulieta Elana natuna Lota i tubuga.

²⁸ Bola tamana Tela i miamia, Elana yawaina i 'a'ava 'ana tuvada 'waineye, 'atamana Ula 'awalawa Kalidia nageneye.

²⁹ Bei i miamia Ebelamu wata Naoli i nagi. Ebelamu yana vavine 'adi wagava Selai, we'e Naoli yana vavine 'adi wagava Milika. Vavinenidi Elana natuna, Milika wata Isika tamadi.

³⁰ We'e Salai kakalidi, fai kebu 'adi fata i na veinainage.

³¹ Tamu tutuya 'waineye, Tela natuna Ebelamu, tubuna Lota Elana natuna, lawana vevinedi Selai natuna Ebelamu yana vavine, matatabudi Ula 'awalawa Kalidia 'wainega i tauya. Igodi i tauya i da nago 'awalawa Kenani siwe tutuyanina i le'wai 'atamana Elana, bei i mia.

³² Tela bola i miamia 'atamana Elana, 'ana malamala 205 i veluagai, nika i wafa.

12

'AUVEA Ebelamu i venua'ivineni

¹ Mulieta 'AUVEA Ebelamu i voneni i vo, Yamu 'awalawa, yamu 'aila'avo wata tamamu 'u na 'iawedi 'u na nago fwayafwayanina a na vemuga 'waineye.

² Tubumwavo fuedi a na velemu bega 'amu 'aila'a i na vebwaikaotoga.

A na vevesauluva 'atumaina 'waimuye wata 'Amu wagava a na 'ivebwaikaotogi

bega 'waimuyega tomotoga fueotogidi yadi
'atumaina i na veluagai.

³ Egavo i na vesauluva 'atumaina 'waimuye, yau
wata a na vesauluva 'atumaina 'waidie,

Wata egavo i na vesauluva sakoina 'waimuye,
yau a na vematavulogidi.

We'e tomotoga 'adi 'aila'a tulina tulina
fwayefwayeye yadi mia i na ve'atamai
'omu 'waimuyega.”

⁴ Ebelamu 'AUVEA yana vona i
vematakeyakeni bega i tauya 'atamana
bwaikina Elana 'wainega, taina natuna Lota
taiadi. Tutuyanina 'waineye Ebelamu 'ana
malamala 75 'akonadi i veluagai.

⁵ Ebelamu yana vavine Selai wata Lota i
vagavaidi, yadi kukua 'atumaide, yadi 'aisayavo
wata yadi tofolova-maimaiga i 'ewadiga Elana
'waineye, matatabudi Elana 'wainega i tauya i
nagoga i le'wa 'awalawa Kenani 'ana tugusa
'waineye.

⁶ Ebelamu ma yana 'aila'avo 'awalawanina
nageneamo i nagoga 'ana tugusa 'atamana
Sekemu i souyeni. 'Atamananina 'waineye tamu
welavi bwaikina wata tabutabuna i tofotovo
'ana wagava Mole. We'e me Kenani i miamiani
'awalawanina 'waineye.

⁷ Mulieta 'AUVEA i souyeni Ebelamu i voneni i
vo, Tubumwavo 'waidie side fwayafwayanina a
na veledi.” Fai 'AUVEA i souyeni 'waineye begaidi
Ebelamu kileu i didigi 'eba velomu 'AUVEA 'ana
subia faifaina.

⁸ I 'a'avana 'atamananina 'wainega i vaganago 'oya siaidi 'waidie, 'atamana 'ailuga Bedeli wata Ai kamwadie yana vadavada i tufeni, Bedeli inala yana 'eba inivayega we'e Ai inala yana 'eba lakayega, bei tamu 'eba velomu i didigi bega i 'odu 'AUVEA 'waineye i subiai.

⁹ We'e 'atamananina 'wainega Ebelamu i tauya i yaba-vuvua i nunago 'awalawa Negevi weyaginega.

Ebelamu i nago Itifita

¹⁰ Tutuyanina 'waineye loka bwaikina i souyeni 'awalawanina 'waineye, begaidi Ebelamu i tauya i obu Itifita bei i na yogomia fai loka bwaikaotogina.

¹¹ 'Akonadi i velilivana sai'afoga i na luku Itifita, yana vavine Selai i vonedi i vo, A 'asetami 'omi 'ami 'isa 'atumaotogina.

¹² Tutuyanina ta na le'wa me Itifita i na 'isemi i na vo, No'o yana vavine, 'nika yau i na luvewafaku we'e 'omi i na 'ewami.

¹³ Begaidi 'wa na vonedi 'wa na vo, Yau novuna, 'nika 'omi faifaimi yau i na veianeku ma yawaiku a na miamia."

¹⁴ Tutuyanina Ebelamu i le'wa, me Itifita Selai i 'isedi vavine 'adi 'isa 'atumaotogina.

¹⁵ Kebu tutuya manamanawenaga Felo* yana toveimea bwaikidi Selai i 'isedi, i nago Felo 'waineye vavinenidi i awave'atumaiedi bega i mai Selai i vagavaidi i nawedi Felo yana vanuge.

¹⁶ Felo Selai faifaidi Ebelamu ma'itufa i veianeni bega nani fuedi i veleni bani'odi sifi,

bulumakau, kameli, doniki iavetadi wata vevinedi, wata yana tofolova-maimaiga iavetadi wata vevinedi, naninidi matatabuna i 'anivelenedi Ebelamu 'waineye.

¹⁷ Siwe Ebelamu yana vavine Selai faifaidi, 'AUVEA viga sakoidi wata toketokedi Felo wata yana vanuga 'ana tomia matatabudi i veledi.

¹⁸ Nika Felo i veimea Ebelamu i mieni 'waineye bega i velutolieni i vo, Awale 'u vesauluva sakoina 'waikuye? Awale kebu 'u da vonekuga vavine de'e yamu vavine?

¹⁹ Awale 'u vo, Selai novuku?' Faifainanina a vagavaia a mieni yaku vavine. Siwe 'asa'aiana, yamu vavine side, 'asiauotoga 'u na vagavaidi taiadi 'wa na tauya 'wa na nago."

²⁰ Bega Felo yana tofolovavo i luimilidi Ebelamu i veugeugeni, yana vavine wata yadi kukua matatabuna i kwekwedi taiadi i nagoi 'edeye i valovedi.

13

Ebelamu wata Lota i 'idi

¹ Tutuyanina 'waineye Ebelamu yana vavine Selai wata Lota taiadi yadi kukua matatabuna i 'ewadi Itifitayega i tauya i nagoga i le'wa 'awalawa Negevi.

² Ebelamu i ve'ai'aiwabu bwaikina kukua fuedi 'waidiega bani'odiga siliba, golida wata 'aisaya tauvanuga.

³ Negeviaga i tauya i nagoga i le'wa tumala tuatuaaina 'waineye bagase bei yana vadavada i tufeni, Bedeli wata Ai kamwadie.

⁴ 'Awalawanina 'waineye 'eba velomu kumekumetana basenadi i didigiga, nika bei Ebelamu i 'odu 'AUVEA 'waineye i subiai.

⁵ We'e Lota, kumanina Ebelamu taiadi i yabayaba wata ma yana 'aisayavo sifi, goti, wata bulumakau we'e yana tomotogavo fueidi taiadi.

⁶ Ebelamu wata Lota yadi 'aisayavo fueotogidi we'e mosomoso yadi 'eba 'ani kebu bwaikinaga begaidi 'adi 'ailuga kebu 'adi fata 'awalawanina 'waineye i na mia.

⁷ Ebelamu yana 'aisayavo 'adi to'isave'avinavo wata Lota yana 'aisayavo 'adi to'isave'avinavo taiadi i ve'ikwayekwayega. We'e 'awalawanina 'waineye me Kenani wata me Felesi i bei i miamiani.

⁸ Bola i veve'ikwayekwayega bega Ebelamu Lota i voneni i vo, 'Ida dayaga 'aitamogana, kebu i da lubwaineda ta na ve'ikwayekwayega, wata bani'odi yamu tofolovavo wata yaku tofolovavo.

⁹ Bega 'asiau a vevelu'uiemu 'waikuyega 'u na mia'idi. 'Awalawa matatabuna yavuyavuna 'waimuye 'u na venua'ivina. 'Ai'edi 'amu 'atagiega 'u na nagoga, yau 'amu wamayega a na nago, we'e 'ai'edi 'amu 'eliega 'u na nagoga yau ma'itufa 'amu 'atagiega a na nago."

¹⁰ Lota i 'isadaba Ufa Iolidani laube'una i vetonovi i nagoga Soa weyaginega, i 'iseni 'awalawa 'atumaina ufa fueidi wata mosomoso 'atumaide, 'wa da vo 'AUVEA yana bakula Ideni 'alo 'awalawa Itifita. We'e tutuyanina 'waineye 'AUVEA bola Sodoma wata Gomola kebu i da luvesavovolidi.

¹¹ Tomotoganidi 'adi 'ailuga i mia'idi, Lota nuanuana Iolidani laube'una bega i obu i nago inala yana 'eba lakayega.

¹² Ebelamu 'asa'aiana 'awalawa Kenani bei i miamia, nika Lota i tauya i obu Iolidani laube'uneye 'atamana bwaikidi 'waidie, we'e Sodoma lilivaneye i vebae'wa.

¹³ Me Sodoma yadi sauluva sakoidi, 'AUVEA mataneye i sakosakona-vebogi.

¹⁴ Lota 'akonadi i tauya, mulieta 'AUVEA Ebelamu i voneni i vo, Bei 'u tovofovoiga 'u na 'isadaba 'u na 'isanago yavalatayega wata bolimanayega, inala yana 'eba lakayega wata yana 'eba inivayega.

¹⁵ Fwayafwayanina matatabuna 'u 'ise'iseniga a na velemu tubumwavo taiadi 'wa na ve'itulamuyeni yami 'eba veimea i na 'eno-vagata.

¹⁶ Tubumwavo fueotogidi a na velemu, wala'ai 'ana 'ilukulukuta bani'odiga, kebu tamu aitoi 'ana fata i na lu'iawawadi.

¹⁷ 'Amu 'anivelena fwayafwayanina 'waikuyega, 'u na nago matatabuna 'u na vai'ali 'ana vebababa wata 'ana vemanawe."

¹⁸ Mulieta Ebelamu ma yana tomotogavo i tovoi i nago 'awalawa Ebiloni, tamu tomogo 'ana wagava Mamile 'ana welavi bwaikidi wata tabutabudi lilivadie i vebae'wa nika bei 'eba velomu i didigi 'AUVEA faifaina.

14

Ebelamu Lota i 'ita'ita'ieni

¹ Tutuyanina 'waineye, kini 'adi 4 i veveimea inala yana 'eba laka 'wainega, side 'adi wagava, Amilafele 'awalawa Sina 'ana toveimea, Alioki 'awalawa Elasali 'ana kini, Kedolaoma 'awalawa Ilamu 'ana kini wata Kini Tidila 'awalawa Goimu 'ana 'ana toveimea, ma yadi tolugaviavo i va'auta i na vetalaga 'adi gaviavo taiadi.

² 'Adi gaviavo side 'awalawanidi 'adi toveimeavo, Kini Beila 'awalawa Sodoma 'ana toveimea, Kini Besa 'awalawa Gomola 'ana toveimea, Kini Sinaba 'awalawa Adema 'ana toveimea, Kini Semeba Seboimu 'ana toveimea wata Kini Bela 'awalawa Soa 'ana toveimea.

³ Kininidi 'aila'a 'ana veluga ma yadi tolugaviavo i maia ediavo taiadi i luvetubama Laube'u Sidimu 'waineye, tamu 'ana wagava Laube'u Eyaga Wafana.

⁴ Basenadi malamala 12 nagedie me Isileli i vetofolova Kini Kedolaoma 'waineye, we'e malamala 'ana ve-13 'waineye i vedumwe'ai'aieni.

⁵ Malamala 'ana ve-14 'waineye, Kini Kedolaoma 'ifwaidi kini taiadi i luvetubama bega 'aila'a 'ifwaidi taiadi i lugavia i vetoketoke-'iawedi. 'Aila'anidi side, me Lifani 'awalawa Asitoleta-Kanaimu 'waineye, me Susaiti 'awalawa Ami 'waineye, me Emeli 'awalawa Save-Kiliataimi 'waineye,

⁶ wata me Owa 'atamana 'oya tabwaneye 'awalawa Seli 'waineye, wata i vaganago 'awalawa Eli-Felani sali'avu'avu lilivaneye, matatabuna 'awalawanidi taiadi i lugavia we'e i vetoketoke-'iawedi.

⁷ Mulieta i viladi i nagoi 'awalawa Eni-Misifati, tamu 'ana wagava Kadesi, me Amalakaiti yana 'eba veimea matatabuna wata bani'odi me Amolaiti, kumanidiavo i miamiani Asasoni-Tamali 'atamana 'waineye, matatabuna i tala'avui.

⁸ Tutuyanina 'waineye Sodoma 'awalawa 'ana kini, Gomola 'awalawa 'ana kini, Adema 'awalawa 'ana kini, Seboimu 'awalawa 'ana kini wata Bela 'awalawa 'ana kini, 'atamananina tamu 'ana wagava Soa, ma yadi tolugaviavo i tovoi i nagoi Laube'u Sidimu 'waineye, i 'idewadewa vetalaga faifaina.

⁹ Bega Kini 'adi 5 i i vetalaga kini 'adi 4 ma yadi tolugaviavo taiadi. Toveimeanidi side, Kini Kedolauma 'awalawa Ilamu 'wainega, Kini Tidila 'awalawa Goimu 'wainega, Kini Amilafele 'awalawa Sina 'wainega, wata Kini Alioki 'awalawa Elasali 'ana toveimea.

¹⁰ Laube'u Sidimu 'waineye, ovu fueotogidi nagedie koluta i 'eno'enovi, Sodoma wata Gomola yadi kini yana tolugaviavo taiadi i ve'aladegadega, 'ifwaidi i ve'alaonoonoga ovu nagedie, we'e 'ifwaidi i ve'aladegadega i nagoi 'oya siaidi 'waidie.

Ebelamu Lota i 'ita'ita'ieni

¹¹ 'Ifwaidi tutuya i a'ava, kini 'adi 4 ma yadi tolugaviavo taiadi i nagoi Sodoma wata Gomola i tala'avuidi bega yadi kukua wata 'ani'ani i vetuadi.

¹² Ebelamu taina natuna Lota, Sodoma bei i miamiaga, tolugavianidi i 'ive'avini nani matatabuna taiadi i 'ewadi i nawedi.

¹³ We'e tamu Lota yana tomotoga 'waidiega i dega i mai Ebelamu kumanina tomogo Ibeliu 'waineye, gavianina faifaina i lu'ivona. We'e tutuyanina 'waineye Ebelamu i miamia Mamile tomogo Amolaiti yana welavi bwaikidi wata tabutabudi lilivadie. We'e Mamile ma tainavo Esikoli wata Aneli Ebelamu taiadi i veiana. Yadi veiananina 'wainega gavia 'ana tutuya 'waineye i luluvetubama nika ma fuedie i vevetalaga.

¹⁴ Ebelamu yana tolugaviavo 'adi 'aila'a 318, matatabudi i tubuga wata i vebwaika yana vanuge. Tutuyanina vala i nogai, Lota 'ana gaviavo i 'ive'avini, yana tolugaviavonidi i goleva'augidi bega mulidie i tala'wavinedi i nagoga 'ana tugusa Dani.

¹⁵ 'Akonadi i lovani, Ebelamu yana tolugaviavo i 'ididi yadi 'aila'a tulina tulina 'waidie bega 'adi gaviavo taiadi i vetalaga nika i vetoketoke-'iawedi. Siwe 'ifwaidi i dega bega i lusogiedi i nagoiga 'atamana Oba 'waineye, 'atamananina Damasiko yavalatayega.

¹⁶ Naninidi 'adi gaviavo i 'ewadiga, matatabuna Ebelamu i veviladi, Lota, yana kukua, vevine wata 'ifwaidi tomotoganidi i yogonidiga taiadi.

¹⁷ Tutuyanina Ebelamu i vetoketoke-'iawediga, i vilai i mimai Sodoma 'ana kini i souyeni i yogo'ede'edeni, Laube'u Save 'waineye. 'Atamananina tamu 'ana wagava Kini yana Laube'u.

¹⁸⁻¹⁹ Mulieta Salema 'ana kini, taunina Yaubada Bwaikaotogina yana tovelomu 'ana wagava Melekisadeki beledi wata oine i miedi, bega

Ebelamu i vona-nuakalikalieni i vo,
 Yaubada Bwaikaotogina,
 Abama wata fwayafwaya 'adi to'idewadewa
 I da vevesauluva 'atumaina Ebelamu 'waimuye.

²⁰ Yaubada Bwaikaotogina ta na subiai fai
 Kininidi 'adi 4 ma yadi tolugaviavo i
 'anivelenedi nimamuye, 'u leodi.”

Mulieta Ebelamu kukuanidi i 'ewadiga i 'idia
 'etokwau 10 i yatodi we'e kwau 'aitamogana
 Melekisadeki i veleni.

²¹ Sodoma 'ana kini Ebelamu i voneni i vo,
 Yaku tomotoga 'ama gaviavo i 'ive'avinidiga, 'u
 na veviladi 'waikuye, we'e kukua matatabuna i
 na 'eno'eno taunimu faifaimu.”

²² Siwe Ebelamu i vona Sodoma 'ana kini
 'waineye i vo, Yau a vona'awauaufa 'AUVEA
 Yaubada Bwaikaotogina mataneye, abama wata
 fwayafwaya 'adi To'idewadewa, kebu tamu nani
 'a na 'ewai 'waimuyega.

²³ Avinodi uya 'aitamogana 'alo 'amu
 'ageyafayafa, siwe kebu i da lubwaineku a na
 'ewadi, kukuanidi matatabuna 'omu faifaimu.
 'Ai'edi a da 'ewadiga, 'ako 'u da vo, Yau kumaniku
 Ebelamu a 'ive'ai'aiwabuya.’

²⁴ We'e 'ani'aninidi yaku tolugaviavo
 tubuvauvaudi 'akonadi i 'aniga a tauyedi, wata
 tomotoganidi taiadi a nago vetalaga faifaina,
 Aneli, Esikoli wata Mamile 'adi veuveuta a
 tauyedi 'u na veledi we'e 'ifwaidi nani 'asa'aiadi.”

15

*'AUVEA yana veakutagona i 'idewai Ebelamu
 'waineye*

¹ Tutuya 'ifwaidi i 'a'avana, Ebelamu i 'isa'isa nika 'AUVEA i souyeni 'waineye i voneni, 'wa da vo bani'odi i da 'enoneganega i vo, Kebu 'u na kololo vita bwaikidi 'waidie fai yau yamu babala wata 'amu to'ita'ita'i, 'awaie 'amu tutula bwaikaotogina a na velemu.”

²⁻³ Siwe Ebelamu i tutula i vo, E'e 'AUVEA Yaubada, tutulanina bwaikina 'u na velekguga, siwe ava'ai 'ana 'atumaina fai yau kebu natukuga, 'awaie a na wafa yaku tofolova Eliesa tomogo Damasiko tutulanina i na 'ewadi i na veimeyedi. 'AUVEA 'u na nuani, kebu tamu natuku 'u da velekguga, yaku tofolova-maimaiga kukuanidi 'waikuye matatabudi i na 'ewadi wata i na veimeyedi.”

⁴ Nika wata 'AUVEA i veifufu 'waineye i vo, De'e tomogonina yamu tofolova-maimaiga kebu tutulimuga, we'e bola taunimu natumu iavetana i na tubuga 'waimuyega, kumanina 'omu tutulimu.”

⁵ 'AUVEA Ebelamu i vagavaia i souyedi 'atamane i voneni i vo, 'U 'isalaka abame, 'ubwana 'u na 'isadewadi nika 'u na lu'iawawa-wayogedi. 'Asa'aiana 'awaie tubumwavo 'adi 'aila'a fueotogidi, lu'iawawa-wayoga.”

⁶ Ebelamu i vetumagana 'AUVEA yana vona 'waineye, yana vetumagananina faifaina i awave'atumaieni i vo, Yana sauluva matatabuna tonovidi matakuye.”

⁷ Wata 'AUVEA i vo, Yau 'AUVEA, kumaniku me Babiloni yadi 'awalawayega we'e 'atamana Ea 'wainega a vagavaimu 'u mai, de'e

fwayafwayanina a na velemu 'u na vetoniwakeni.”

⁸ Siwe Ebelamu i vo, 'AUEA Yaubada, mogitana bani'odi a na munega fwayafwayanina a na 'asetai bega a na vetoniwakeni?”

⁹ Bega Yaubada i voneni i vo, Nuanuaku bulumakau vevinena, goti vevinena, sifi iavetana, matatabudi 'adi malamala 'aitonu 'u na miedi 'waikuye, bunebune wata kabututula manu-vauna.”

¹⁰ Bega Ebelamu 'aisayanidi matatabuna i luvewafadi. Mulieta 'aitamogana 'aitamogana i tutuvotagidi i 'a'ava, 'ewadi i lelega vi'ai 'ailuga 'waidiamo, we'e manuga kebu i da bobodi.

¹¹ Mulieta manuyausibosibo i obuma 'aisayanidi bobobodi i da 'ani, siwe Ebelamu i sogiedi.

¹² 'Akonadi inala ininiva, Ebelamu matana i duduna-'afo'afo, i 'ufobala i 'enowafa, nika dudubala 'eba kololo i obuma i 'avuseni.

¹³ I lovani 'AUEA i voneni i vo, 'U na 'aseta-'atumaia fai 'awaie tubumwavo i na vewakawaka tamu 'awalawa 'waineye bei i na vetofolova-maimaiga, we'e vitanidi bwaikidi i na veveluagadi malamala 400 nagedie.

¹⁴ Siwe tomotoganidi i na veimeyediga bega i na vetofolova-maimaiga, yau a na vematavulogidi, mulieta tubumwavo yadi tauya 'waineye 'ai'aiwabu bwaikina i na 'ewadi i na souyedi.

¹⁵ We'e 'omu 'u na ve'auvea 'amu malamala i na vefueotoga mulieta ma yamu nuaniwalova 'wainega yawaimu i na 'a'ava i na ve'ufamu.

¹⁶ Tutuya de'e me Amolaiti bei i miamianiga kebu a na lu'wavinediga, nagamidi yadi sakona i na vevebwaika 'ana tugusa yaku 'etowava i na veluagai nika a na vematavulogidi. We'e 'omu tubumwavo i na miamiani tamu 'awalawa 'waineye, lakata 4 i na 'a'avana tubumwavonidi a na veviladi i na maia me Amolaiti yadi fwayafwaya i na 'ewai.”

¹⁷ Tutuyanina inala i niva, nika i dudubali, Ebelamu i 'iseni lufwa bwaikina i sousouyeni 'ai 'eba leva 'ana nau 'wainega, wata dukala magetana i 'awaiaia 'aisayanidi bobobodi 'awasasadio i le'wa i nago.

¹⁸ Tutuyanina 'waineye 'AUVEA yana veakutagona i 'idewai Ebelamu 'waineye i voneni i vo, Tubumwavo faifaidi fwayafwaya de'e a 'a'aniveleneni 'waimuye, i velamu Itifita 'ana 'eda bala 'wainega i nago ufa bwaikina Iufiletisi 'waineye.

¹⁹ Fwayafwayanina 'akonadi me Kenaiti, me Kenisaiti wata me Kadimoni,

²⁰ me Aiti, me Felesi, me Lifani,

²¹ me Amolaiti, me Kenani, me Gegasaiti wata me Iebusaiti i luvaia.”

16

Selai wata Ega

¹ Tutuyanina Ebelamu i miamia 'awalawa Kenani, yana vavine Selai kebu tamu kwamana i da venatuneni, we'e Selai tamu yadi

tofolova-maimaiga vavine Itifita 'ana wagava Ega.

² Selai Ebelamu i voneni i vo, 'AUVEA kebu i da tauyema 'a na venatuna, bega nuanuama 'u na nago yama tofolova Ega taiadi 'wa na veluaga, mulieta i na venatunaga, kwamananina 'asa'aiana 'a na 'ewai.” Selai yadi nuanuananina Ebelamu i nogai nika i awave'atumaieni.

³ Ebelamu i miamia Kenani malamala 10 nagedie, i 'a'avana Selai yadi tofolova Ega i vagavaia i 'aniveleneni yadi lamoga Ebelamu 'waineye, tamu yana vavine, we'e Ega kumanina vavine Itifita.

⁴ Ebelamu Ega taiadi i veluaga bega i veinainage, siwe tutuyanina Ega 'akonadi i 'asetai i miana ma yadi fwausa Selai i awavesakoyedi.

⁵ Bega Selai Ebelamu i voneni i vo, Vekali matatabuna i souyeniga, 'asa'aiana 'omu 'waimuyega. Fai yama tofolova-maimaiga 'a velemu, siwe 'akonadi i miana ma'itufa i awaobuobuyema. 'AUVEA i na veda aitoi mogitana yana sakona, 'omu 'alo yau.”

⁶ Ebelamu i vonedi i vo, Vavinenidi yami tofolova-maimaiga, ava'ai 'wa nuani 'ami laubwaina, 'wa na 'idewai 'waidie.” Begaidi Selai ma yadi nuasako i vevesauluva sakoina Ega 'waidie, faifaina 'waidiega i dega.

⁷ 'AUVEA yana anelose Ega i veluagadi ufa-luluvuala lilivaneye sali'avu'avu 'waineye, ufanina Sula 'ana 'eda i nunago we'e lilivaneye.

⁸ Anelose i velutoliedi i vo, Ega, 'omi Selai yadi tofolova-maimaiga, ava'aiega 'wa mai wata

ava'aibe bei 'wa na nago?" Ega i tutula i vo, 'Ama to'isave'avina Selai 'waidiega 'a degadega."

⁹ 'AUVEA yana anelose i vonedi i vo, 'Wa na vilami 'ami toveimea 'waidie, bega yadi nuanua matatabuna 'wa na vematatyakeyakeni."

¹⁰ Wata anelose i vonedi i vo, A vona mogitana 'waimie, 'ami wauma a na, 'ivefuei lu'iawawa-wayoga."

¹¹ Wata 'AUVEA yana anelose i vonedi i vo, 'Omi 'akonadi 'wa miana, natumi iavetana 'wa na venatuneni. 'Ana wagava 'wa na golemi Isimeli, 'ana 'asetai fai 'YAUBADA yami 'we'wela i nogai'.

¹² Natumi 'awaie bani'odi doniki walawala'ai, tomotoga taiadi i na vevetalaga wata matatabudi i na vedumwe'ai'aieni, wata enavo matatabudi i na lu'idieni."

¹³ Bega yadi nuanua i vo, Vona mogitana bola ma yawaimeye Yaubada 'a 'iseni!" Bega Ega tamu 'AUVEA 'ana wagava i 'inanai i vo, 'Omu Yaubada kumanimu 'u 'ise'isema."

¹⁴ Begaidi ufanina i golemi Bia Lai Loi, 'ana saivila, *Kumanina Miamia-vagaina i 'ise'isema. Ufanina bola i 'eno'eno, 'atamana Kadesi wata Belidi 'adi 'edabala nageneye.*

¹⁵ Bega Ega Ebelamu natuna iavetana i vetubugi, mulieta tamana 'ana wagava i golemi Isimeli.

¹⁶ Ebelamu 'ana malamala 86 i veluagai mulieta Ega i venatuna, Ebelamu natuna i golemi Isimeli.

17

Yaubada yana weakutagona 'ana tugusa

¹ Tutuyanina Ebelamu 'ana malamala 99 i veluagai nika 'AUEA i souyeni 'waineye i voneni i vo, Yau Yaubada Toketokeotogiku.* Yaku veimea 'u na vevematayakeyakedi wata tutuya matatabuna 'u na vevesauluva-'atumai matakuye.

² Yaku Weakutagona a na kiavefa'ali, yau wata 'omu 'waideye, 'amu 'aila'a a na 'ivebwaikaotogi.”

³ Nika Ebelamu ma yana ve'ililibu i lumata'afufu fwayefwayeye. Yaubada i vo,

⁴ 'U na nuanuani. Yaku weakutagona 'waimuye side bani'odi a vo, 'Omu 'waimuyega 'aila'a fueotogidi wata bwaikidi i na souyedi.’

⁵ Nagamidi 'amu wagava Ebelamu, 'asiau ma'itufa 'amu wagava a sivedamaneni bega a na golemu Ebelamo† fai a venua'ivinemu 'omu 'aila'a fuedi wata bwaikidi tamadi.

⁶ Yaku toketokena 'wainega 'u na venatuvea'wa nika tubumwavo 'adi 'aila'a i na vefueotoga wata i na vebwaika-'afo'afo we'e 'waidiega kini fuedi i na souyedi.

⁷ Yaku weakutagona a na kiavefa'ali 'waimuye wata tubumwavo lakata fueotogidi i mimai 'waidie i na 'eno-vagata. Yau yamu Yaubada wata 'awaie tubumwavo yadi Yaubada.

* **17:1:** 'Ana mogitana vona Ibeliu 'waineye, wagavanina *El Shad-dai*. **17:5:** Lom 4:17 † **17:5:** Ebelamu 'ana 'asete *Tama Bwaikina wata ma 'ana ve'ililibu we'e Ebelamo 'ana 'asete 'Aila'a fuedi wata bwaikidi Tamadi*. **17:7:** Luk 1:55

⁸ 'Awalawa Kenani 'asiau bei 'u miamiaga 'omu 'u vewakawaka, siwe fwayafwayanina matatabuna a na velemu bega tubumwavo i na vetoniwakeni yadi 'eba veimea i na 'eno-vagata we'e yau yadi Yaubada."

⁹ Wata Yaubada Ebelamo 'waineye i vo, We'e 'omu, yaku veakutagona 'u na vevematayakeyakeni, 'omu wata tubumwavo lakata 'aitamogana 'aitamogana i mimaiaga taiadi.

¹⁰ Yaku veakutagonanina side 'omu wata tubumwavo taiadi 'wa na nuanuani iaveta 'aitamogana 'aitamogana bunu 'aibobo i na 'ewa'ewai.

¹¹ Bunu 'aibobo 'wa na 'ewa'ewai fai kumanina veakutagona yau wata 'omu 'waideye 'ana tugusa.

¹²⁻¹³ 'Asiau i velamu i na nagoga lakata 'aitamogana 'aitamogana 'waidie, kwamana iavetana 'aitamogana 'aitamogana i na tubuga, 'aiata 'ana ve-8 'waineye bunu 'aibobo i na 'ewai. Veimeanina 'omi yami 'aila'a faifaimi, yami tofolova-maimaiga i tubuga yami vanuga 'waidie faifaidi wata kumanidiavo 'wa kimwanedi wakawaka 'waidiega, matatabudi bunu 'aibobo i na 'ewai.

¹⁴ 'Ai'edi aitoi iavetaga siwe kebu bunu 'aibobo i na 'ewaiga, tomogonina yana 'aila'a 'wainega 'wa na 'ewayavuleni fai yaku veakutagonanina i geuya."

¹⁵ Wata Yaubada Ebelamo i voneni i vo, Nagamidi yamu vavine 'adi wagava Selai, 'asiau

kebu wata Selai 'u na golegolediga we'e 'adi wagava Sela.

¹⁶ Yau Sela a na vesauluva-'atumaiedi i na veinainage bega natumu iavetana a na velemu 'waidiega. Yaku nuakalikalina 'wainega 'aila'a bwaikidi wata fuedi i na souyedi 'waidiega we'e 'adi wauma 'wainega kini fuedi i na vetoveimea.”

¹⁷ Ebelamo i 'odu i lumata'afufu i namaga-tumula yana nuanua 'waineye i vo, 'Akonadi a ve'auveaotoga 'aku malamala 100, we'e Sela 'akonadi i vemo'aiotoga 'adi malamala 90, kebu 'ana fata kwamana 'a na veluagai.”

¹⁸ Wata Ebelamo Yaubada 'waineye i vo, Isimeli yamu nuakalikalina i da 'ewai.”

¹⁹ Nika Yaubada i vo, Kebu, Sela kumanidi yamu vavine mogitana i na venatuna, kwamana iavetana i na venatuneni 'ana wagava 'u na goleni Aisake. Yaku veakutagona a na yato-vagaseni 'waineye wata tubunavo i mimai 'waidie i na 'eno-vagata.

²⁰ We'e Isimeli faifaina 'akonadi bonamu a nogai bega mogitana wata a na vesauluva-'atumaina 'waineye, natunavo fuedi a na veleni nika 'waidiega tubunavo 'adi 'aila'a i na vebwaikaotoga. Isimeli 'ana wauma 'wainega tamu 'aila'a bwaikina wata toketokena i na souyeni, wata to'edakumeta bwaikidi 'adi 12 i na tubuga i na vetoveimea.

²¹ We'e yaku veakutagonanina a na yato-vagaseni Aisake 'waineye, kwamananina Sela i na venatuneni 'waimuye. Weta'i 12 i na 'a'avana sino malamalanina 'waineye, bei kwamana i na tubuga.

‡17:22-27 Scripture Forge, NOT Reviewed

²² Tutuyanina Yaubada Ebelamo taiadi i veifufu i 'a'ava, i 'iaweni.

²³ 'Aiatanina 'waineye, Ebelamo natuna Isimeli, iaveta kumanidiavo vanuganina 'waineye i tubuga wata kimwakimwanedi, matatabudi Yaubada yana veimea i vematayakeyakeni bunu 'aibobo i 'ewai.

²⁴ Tutuyanina Ebelamo 'ana malamala 99 i veluagai, bunu 'aibobo i 'ewai,

²⁵ wata 'aiatanina 'waineye, Isimeli 'ana malamala 13 i veluagai.

²⁶ 'Aiatanina 'waineye Ebelamo wata natuna Isimeli Yaubada yana veimea i vematayakeyakeni, bunu 'aibobo i 'ewai.

²⁷ Wata bani'odi yana vanuga 'ana tomia, iaveta tulaidi wata kwakwama, kumanidiavo bei i tubuga, 'alo i kimwanedi vetofolova-maimaiga faifaina, matatabudi bunu 'aibobo i 'ewai, Ebelamo taiadi.

18

Ebelamo 'ana ulatauvo 'adi 'aitonu

¹ Tamu 'aiata Ebelamo i miamia Mamile 'ana welavi lamudie, welavinidi bwaikidi wata tabutabudi. Utukamwana, inala yana luyauyauta 'ana tutuye, yana vadavada 'ana 'eba luku 'waineye i miabui nika 'AUVEA i souyeni 'waineye.

² I 'isalaka tomotoga 'adi 'aitonu i 'isedi i tovoovoi. Ebelamo yana vadavada 'wainega i tovoi i lilide i yogo'ede'ededi, ma yana ve'ililibu i 'odu maigina i obu fwayefwayeye.

³ I vona i vo, Yaku 'auvea, yau yamu tofolova.
'Ai'edi 'atumaina 'waimuye kebu 'u na
yogo-vagata, we'e side bei 'u da veawai.

⁴ 'Wa da maia welavi de'e 'ai'wa'uneye 'wa na
veawai nika ufa siaina a na mieni 'age 'ilekoa
faifaina.

⁵ Fai 'wa maia yaku vanuge, nuanuaku tamu
ava'ai siaina a na 'idewai, 'agemie 'wa na yatodi
'wa na vetoketoke nika 'wa na tauya."

Bega i tutula i vo, 'Atumaina, ava'ai nuanuamu
'u voneyeniga 'u na 'idewaimo."

⁶ Ebelamo i 'abiwalowaloga i luku vadevadeye,
Sela i vonedi i vo, 'Wa na 'abiwalowaloga, falawa
'atumaivotogina ta'ula 'aitonu bwaikidi 'wa na
'ewadi, 'wa na viladi bega beledi 'wa na
kabunidi."

⁷ I 'a'avana i lilide i nago yana luvadabaweye,
bulumakau veve'anina tubuvauvauna wata 'ana
tubuga 'atumaina i 'ewai yana tofolova i veleni
bega i 'idewadewa-matayo'oi nika i vetagovi.

⁸ Tutuyanina 'ani'ani i 'idewadewa'a'ava,
Ebelamo 'aisaya susudi, susu vebi'wabi'wana
wata 'aisayanina i vetagoviga i 'ewadi i nawedi
'ana ulatauvo i ve'anidi. Welavi lamudie
ulatauvo i 'ani'ani we'e Ebelamo i
mimia-kamatadi.

⁹ I 'ani'a'avana, tomotoganidi i velutoli i vo,
Yamu vavine Sela ava'aibe?" Ebelamo i tutula i
vo, Sino vadavada nageneye."

¹⁰ Tamu iadi 'waidiega, 'asa'aiana 'AUVEA,
Ebelamo i voneni i vo, A vona mogitana
'waimuye, weta'i 12 i na 'a'avana sino
malamalanina 'waineye, nika a na vilaku a na

mai we'e Sela kwamana iavetana i na venatuneni." Sela vadavada 'awana lilivaneye i miabui Ebelamo mulineye i vavainenega.

¹¹ Tutuyanina 'waineye Ebelamo 'akonadi i ve'auvea-'afo'afo wata Sela i vemo'aiotoga bega yadi weta'i i 'ailove kebu wata i da 'ewa'ewadiga.

¹² Begaidi Sela i nogai i namaga-tumula yadi nuanua 'waineye i vo, Yau 'akonadi 'a vetubusako bunu 'ana sosoana i mwea 'waimeye wata 'ama toveimea i ve'auveaotoga bega kebu 'ana fata wata 'a na veluaga-vaitugani."

¹³ Nika 'AUVEA Ebelamo i velutolieni i vo, Awale Sela i namaga wata i vo, Yau 'akonadi 'a vemo'ai-'afo'afo kebu 'ama fata 'a na venatunaga.'

¹⁴ I lubwainemi 'wa na 'asetai, kebu tamu nani vitanaga yau 'AUVEA 'waikuye. 'Akonadi a vonemu, weta'i 12 i na 'a'avana sino malamalanina 'waineye nika a na vilaku a na mai we'e Sela kwamana iavetana i na venatuneni."

¹⁵ Sela i kololo begaidi i ve'ewa i vo, Yau kebu 'a da namagaga." Siwe 'AUVEA i tutula i vo, E'e mogitana 'wa namaga."

Ebelamo i velu'ui Me Sodoma faifaidi

¹⁶ 'Ani i 'a'avana, tomotoganidi 'adi 'aitonu i tovoi i tauya, Ebelamo taiadi i nago 'edeye i na valovedi, we'e i nagoga i le'wa 'eba vematayagina 'atumaina 'waineye bega 'adi fata i na 'isaobu Sodoma weyaginega.

¹⁷ Nika 'AUVEA nuaneye i vo, Ava'ai sai'afoga a na 'idewaiga, kebu a na giveni Ebelamo 'wainega.

¹⁸ Ebelamo 'ana wauma i na vebwaika wata i na vetoketoke, tomia fwayafwaya 'adi 'aila'a tulina tulina yadi mia 'ana 'atumaina i na veluagai 'wainega.

¹⁹ Fai kumanina a venua'ivineni bega natunavo wata yadi 'aila'avo i na awave'ede'ededi bega yau 'AUVEA i na vevematayakeyakeku yadi sauluva 'atumaidi wata tonovidi 'waidiega, nika ava'ai a vona'awaufeufeniga Ebelamo 'waineye a na 'idewai."

²⁰ 'AUVEA Ebelamo i voneni i vo, Me Sodoma wata me Gomola yadi sakona 'eba bunumayaga 'ana vona-vaitugana bwaikaotogina a nogai.

²¹ A na obu tomotoganidi yadi sauluva a na 'isedi bega valadi a na 'asetadewai, mogitana i vevesauluvasako 'alo kebu."

²² Tomotoganidi 'adi 'ailuga i tauya i nunago Sodoma weyaginega we'e 'AUVEA 'aisena Ebelamo taiadi i miamia.

²³ Nika Ebelamo i vaganago 'AUVEA lilivaneye i velutolieni i vo, Nuanuaku a da 'asetai, mogitana tomotoga 'atumaidi 'u na leodi tosakona taiadi?

²⁴ 'Ai'edi tomotoga 'atumaidi 'adi 'aila'a 50 i na miamia 'atamananina 'waineye, tomotoganidi matatabudi taiadi 'u na leodi? 'Ana fata tomotoganidi 'atumaidi 50 'adi 'ita'ita'i faifaina, 'atamananina 'ana tomia matatabudi taiadi 'u na bailedi?

²⁵ A nuani kebu tamu sai'afo bani'odi 'u na vesauluvayediga, kebu tomotoga 'atumaidi wata tomotoga sakoidi taiadi 'u na vematavulogidi wata kebu taiadi 'u na luvewafadiga. 'Omu kebu yamu sauluva bani'odiga. 'Omu tomia fwayafwaya matatabuma 'ama Tovevonayavuga,

'omu 'aisemu yamu veimea tonovidi wata magemagetadi.”

²⁶ 'AUVEA i tutula i vo, 'Ai'edi tomotoga 'atumaidi 'adi 'aila'a 50 Sodoma 'waineye i na miamiaga 'atamananina a na baileni kebu a na luvela'oviga tomotoganidi faifaidi.”

²⁷ Ebelamo i tutula i vo, Yau nani-'avo'avovo wata kibwaku. Yaku 'Auvea, 'ai'edi ma yaku venuafoufa'ala a na veveifufu-vaitugana 'waimuye 'u da nuatavuniku.

²⁸ 'Ai'edi tomotoga 'adi 'aila'a 45 'atumaidi we'e 50 kebu. 'Ai'edi tomotoga 'atumaidi 'adi 5-nidi kebu 'u na veluagadiga, 'atamananina bola 'u na luvela'ovi?”

'AUVEA i tutula i vo, Kebu 'atamananina a na luvela'oviga 'ai'edi tomotoganidi 'adi 45 'atumaidi.”

²⁹ Ebelamo wata i vo, 'Ai'edi 40 tomotoga 'atumaidi bani'odi?”

'AUVEA i tutula i vo, 'Ai'edi tomotoga 'atumaidi 'adi 'aila'a 40, kebu 'atamananina 'a na luvela'ovi.”

³⁰ Ebelamo i vo, Kebu 'u na nuasakoyekuga 'Auvea, nuanuaku wata 'a na veifufu-vaitugana 'waimuye. We'e 'ai'edi tomotoga 30 'atumaidi bani'odi?”

'Auvea i vo, 'Ai'edi tomotoga 'adi 'aila'a 30 'atumaidi kebu a na 'idewaiga.”

³¹ Wata Ebelamo i vo, Nuanuaku yaku venuafoufa'ala faifaina 'u da nuatavuniku, a na veveifufu-vaitugana 'waimuye. Yaku 'Auvea, 'ai'edi tomotoga 'adi 'aila'a 20 'atumaidi, bani'odi yamu nuanua?”

'AUVEA i vona i vo, Kebu 'ana fata 'atamananina a na luvela'oviga 'ai'edi tomotoga 'atumaidi 20 bei i na miamiani.”

³² Ebelamo i vo, 'Auvea, kebu 'u na nuasakoyekuga, de'e yaku veifufu 'eba ve'a'ava 'waimuye, 'U da nuani, 'ai'edi tomotoganidi 'adi 'aila'a 10 'atumaidi, ava'ai 'u na 'idewai 'waidie?”

'AUVEA i vo, Kebu 'atamananina a na 'ivesakoi 'ai'edi tomotoganidi 'atumaidi 'adi 'aila'a 10 i na miamianaga.”

³³ Tutuyanina i veifufu'a'avana nika 'AUVEA i tauya, we'e Ebelamo i vilai i nago yana vadavada 'waineye.

19

Lota anelose 'adi 'ailuga i tayegidi yana vanuge

¹ Tamu lavilavivau 'waineye anelosenidi 'adi 'ailuga i maia 'atamana Sodoma, we'e Lota i miabui i miamia 'atamananina 'ana 'eba luku 'waineye, nika i 'isanago i 'isedi bega i tovoi i nago 'waidie. Ma yana ve'ililibu i 'odu 'waidie maigina i obu fwayefwayeye.

² I 'a'avana i vonedi i vo, Yaku 'auveavo, yau yami tofolova-maimaiga. 'Wa maia ta i nago yaku vanuge. 'Agemi 'wa na lekoadi i na 'a'avana de'e bei 'wa na 'eno. I na 'atai 'awa'awaiogose 'wa na tovoi nika 'wa na tauya.”

Siwe Lota yana vona i tutuli i vo, Kebu, 'asa'aiana side bei 'a na 'eno 'atamana fouye.”

³ Lota i lukakada-vaivaituganedi nika i nogayeni, Lota taiadi i nago yana vanuge. Lota beledi yalayalana i kabunidi wata 'ani'ani 'iwanina i 'idewadewadi 'ana ulatauvo faifaidi.

Tutuyanina i 'idewadewa'a'avadi nika i ve'ala'ani.

⁴ 'Ani i 'a'ava mulineye 'ana ulatauvo sai'afoga i na 'ufobala 'eba 'eno 'waidie, nika me Sodoma iaveta i maia Lota yana vanuga i siffineni. Iaveta matatabuotogidi 'atamananina 'wainega, tulaidi wata tubuvauvau i maia Lota yana vanuge.

⁵ Matatabudi i vegolegole Lota 'waineye i vo, Ava'aibe tomotoganidi i maiaga 'waimuye taiadi 'wa miamiaga? 'U na vonedi taiadi 'wa na souyemi 'waimeye, 'ima me Sodoma nuanuama taiadi 'a na 'eno.”

⁶ Lota i souyeni i na vonedi we'e yana vanuga 'ana saiboda i sibodai mulineye.

⁷ I vonedi i vo, Ekwavo a vevelu'uiemiga, kebu de'e sauluvanina sakoina wata 'eba bunumayaga 'wa na 'idewai 'waidie.

⁸ 'Wa na nogai. We'e yau natukwavo ne'e'elidi 'adi 'ailuga kebu iaveta taiadi i da veluaga. A na miedi 'waimie bega ava'ai nuanuami 'wa na 'idewai 'waidie. Siwe kebu tamu nani 'wa na 'idewai de'e tomotoganidi 'waidie, fai kumanidiavo yau 'aku ulatauvo yaku vanuge i maia, bega i lubwaineni a na 'isave'avinidi wata a na 'ita'ita'iedi.”

⁹ Siwe matatabudi i voneni i vo, 'Omu wakawaka, kebu yama 'awasasa 'u na tovibodai. Aitoi veimea i velemu bega 'u tatalabodema. 'Omu 'a na 'ivekokovimu we'e tomotoganidi ma'itufa sai'afo.”

Lota i bifeleni mulidie i nago nika i laka igodi vanuga 'ana saiboda i na tutubaia.

¹⁰ Siwe tomotoganidi 'adi 'ailuga Lota i yo'ei i lukuveni we'e vanuga 'ana saiboda i simawai.

¹¹ Nika Lota 'ana ulatauvo tosakonanidi matatabudi matadi i kiavedudubalidi bega vanuga 'ana saiboda i yayaisamula-wayogeni.

Lota Sodoma 'wainega i dega

¹² Bola tosakonanidi i vevetafewa 'atamane, we'e tomotoga 'adi 'ailuga Lota i voneni i vo, 'Ai'edi yamu 'aila'avo de'e bei i na miamianiga, bani'odi natumwavo iavetadi wata vevinedi 'alo lawamwavo wata 'ifwaidi yamu tomotogavo taiadi 'wa miamiaga 'atamana de'e 'waineye, matatabumi 'wa na souyemi 'wa na dega.

¹³ 'Wa na 'abiwalowaloga fai 'atamana de'e 'a na luvela'ovi. 'AUVEA 'akonadi tomotoganidi yadi sakona 'eba bunumayaga 'ana vona-vaitugana bwaikaotogina i nogai, i vetunema Sodoma 'a na luvela'ovi."

¹⁴ Lota natunavo vevinedi veveakutagonidi nagi faifaina bega Lota i nago iavetanidi i vonedi i vo, 'Wa lilide ta na souyeda 'atamana de'e 'wainega, 'AUVEA i na 'ivesakoi wata i na luvela'ovi." Siwe tomotoganidi yadi nuanua i vonaga 'ako Lota i da sasaidibi.

¹⁵ Tutuya 'akonadi i kilikililia anelose 'adi 'ailuga Lota i luneuneni i voneni i vo, 'U lilide, yamu vavine wata natumwavo ne'e'elidi 'adi 'ailuga taiadi 'wa miamianiga 'u na vonedi walogayega 'wa na souya-matayo'oyemi nika kebu yawaimi 'wa na tawedi tutuyanina 'AUVEA 'atamana i na 'u'umi."

¹⁶ We'e Lota bola i 'ivogavogana nika anelose

'adi 'ailuga, Lota wata yana vavine, natunavo 'adi 'ailuga ne'e'elidi taiadi nimadie i 'abi i 'abiwalowaloga i souyedi 'atamananina 'wainega. Fai 'AUVEA to'isanuakalikali begaidi 'ita'ita'i i veluagai.

¹⁷ Tutuyanina i souyediga, tamu anelose i vonedi i vo, Yawaimi 'wa na degedi. Kebu 'wa na sivilami wata kebu 'wa na 'ailove laube'u de'e 'waineye. 'Wa na dega 'oya 'waidie, i na nunago i na bewemi.”

¹⁸ Nika Lota i vonedi i vo, Yaku 'auveavo, kebu.

¹⁹ 'Omi mogitana 'wa 'isanuakalikalieku bega 'wa 'ita'ita'ieku, yami 'aivaita bwaikina 'waikuye. Siwe kebu 'aku fata a na vaganago 'oya weyaginega i na nunago 'ako a na veilagi vitanina i na 'edafeleku nika 'edeye a na wafa.

²⁰ 'U da 'isanago 'atamana siaina sai'afo lilivadeye. Nuanuaku bwaikina 'u da tauyeku a da nago 'atamananina siaina 'waineye, 'ana fata 'ita'ita'i bei a na veluagai.”

²¹ Anelose i voneni i vo, 'Atumaina, a tauyemu bei 'u na nago, we'e 'atamananina siaina kebu a na luvela'ovi.

²² Siwe 'u na 'abiwalowaloga 'u na dega, we'e kebu 'aku fata tamu ava'ai a na 'idewaiga 'ana tugusa 'u na le'wa 'atamananina siaina 'waineye.” Begaidi 'atamananina 'ana wagava i goleni Soa, 'ana saivila *'Atamana Siaina*.

Sodoma wata Gomola Yaubada i luvela'ovidi

²³ Inala 'akonadi i vulaoga bega i lakalaka, tutuyanina 'waineye Lota i le'wa 'atamana Soa.

²⁴ Kebu tutuya manamanawenaga 'AUVEA munafagila 'ala'alaidi abamega i vemavugidi i obuma, Sodoma wata Gomola i leodi wata nani matatabuna i luvela'ovidi.

²⁵ 'Atamananidi wata 'atamana 'ifwaidi laube'unina 'waineye i leodi, tomotoga bei i miamiani, wata naninidi i tabotaboga fwayafwayanina 'waineye, matatabuna i 'u'umidi.

²⁶ We'e Lota yana vavine mulineye i nunago siwe i siviladi i 'isanago nika i vekileu eyaga i da fa'aliga 'ana 'isa'isa bani'odiga.

²⁷ Bola awa'awaiogose Ebelamo i lilide i nago 'eba vematayagina 'atumaina, nagami bei 'AUVEA taiadi i veifufuga 'waineye.

²⁸ Nika i 'isaobu Sodoma wata Gomola weyaginega, laube'unina matatabuna 'wainega lufwa bwaikaotogina i lakalaka 'wa da vo libi ta da tunuya i da 'ala'alata.

²⁹ Siwe Yaubada Ebelamo yana velu'ui Lota faifaina i nuave'avini, tutuyanina 'atamananidi i luvela'ovidiga Lota i 'ita'ita'ieni 'ai 'ala'alata 'wainega, nika laube'unanina bei i miamiaga i degalovei.

Lota wata natunavo vevinedi

³⁰ Lota i kololo, begaidi 'atamana Soa i 'iaweni natunavo 'adi 'ailuga taiadi i dega i nagoi 'oya 'waidie ovuye i mia.

³¹ Tamu 'aiata vavine tulaina iana siaina i voneni i vo, Edavo 'aila'a i naginagi, tomia fwayafwaya yada sauluva bani'odi, we'e 'ida kebu 'ada fata ta

na nagi, fai de'e bei iaveta kebu. Tamada tutuya 'ale'usana wautogane i na 'abi, we'e kebu tamu natunaga.

³² 'U mai oine ta i veyemuya nuana i na lugaugauya, bega taiadi ta na veluaga. Nika 'eda'edanina 'wainega, 'ana fata tamada 'wainega 'ada 'aila'a i na vebwaika.

³³ Bega lovananina 'waineye oine toketokena i veyemuya nuana i lugaugauya, mulieta tubu'edakumeta i luku tamana taiadi i veluaga. Tutuyanina vavine tulaina i luku tamana taiadi i 'enoga, tamana kebu i da 'asetai, wata natuna i tovoi i souyeniga, kebu i da 'iseni.

³⁴ I 'atai tubu'edakumeta taina i voneni i vo, Bogi lovane tamada taiadi a 'eno. Wata 'asiau lovane oine ta na veyemu-vaitugani, bega 'u na luku taiadi 'u na 'eno. Nika tamada 'wainega, 'ada 'aila'a i na vebwaika.

³⁵ Bega lovananina 'waineye, wata oine i veyemuya nuana i lugaugauya bega vavine siaina i luku taiadi i veluaga. Wata bani'odi, vavine siaina i luku tamana taiadi i 'enoga, tamana kebu i da 'asetai wata i tovoi i souyeniga, kebu i da 'iseni.

³⁶ Fai maiana yadi nuanua bani'odi, begaidi tamadi taiadi i 'enoga, mogitana i veinainage.

³⁷ Tutuyanina vavine tulaidi i venatuna, natudi iavetana i tubuga i goleni Moabe. Kumanina 'awalawanina 'ana tomotoga tubudi, 'asiau i golegoledi me Moabe.

³⁸ Bwasiona i venatuna, natudi iavetana i tubuga, i goleni Beni-Emumi. Kumanina

'awalawanina 'ana tomotoga tubudi, 'asiau i golegoledi me Emumoni.

20

Ebelamo Abimeleki i vekalieni.

¹ Ebelamo ma yana 'aila'avo i tauya i nagoi Negevi tutuya 'ale'usana i mia, 'atamana Kadesi wata Sula 'awasasadie, mulieta i nagoi 'atamana Gelai, bei i mia.

² Ebelamo yana vavine Sela faifaidi i veifufu i vo, Vavinenidi yau novuku.” Bega Gelai 'ana Kini Abimeleki vala i vetunei Sela i na maiedi yana 'eba veimea nageneye.

³ Tamu lovana 'waineye, Yaubada 'enoneganegayega i souyeni Abimeleki 'waineye i voneni i vo, 'Omu tomogonimu wafamu, fai vavinenidi 'u 'ewadi taiadi 'wa miamiaga, nagingagidi.”

⁴ Tutuyanina 'waineye, Abimeleki bola kebu Sela tomogodi i da 'abitonovi, begaidi i vo, Ie 'Auvea, yau kebu yaku sakona, begaidi a vevelu'ui 'waimuye, kebu yaku 'aila'a taiadi 'u na luvela'ovima.

⁵ Ebelamo taunina i voneku, vavinenidi novuna wata taunidi bani'odi i voneku i vo, Ebelamo novudi' Yaku venua'ivina 'asa'aiana tonovina, fai kebu tamu sauluva sakoina a da 'idewai 'waidie.”

⁶ 'Ana ve 'waineye Yaubada i voneni i vo, E'e, i 'asetai kebu 'u da vekali, yamu venua'ivina 'asa'aiana tonovina. Begaidi a ve'isabodebodemu kebu 'u na sakona matakuye, wata kebu a da tauyemu vavine 'u na 'abitonovidi.

⁷ 'Asiau vavine 'u na veviladi yadi lamoga
'waineye, fai taunina tamu yaku tolu'ivona,
Yaubada iana magemagetana, i na velu'ui
faifaimu bega kebu 'u na wafaga, ma yawaimu 'u
na miamia. Siwe 'ai'edi kebu 'u na veviladiga, 'u
na 'asetai 'omu wata yamu 'aila'a matatabumi
'wa na wafa."

⁸ I 'atai 'awa'awaiogose, Abimeleki i tovoi yana
tofolovavo matatabudi i goleva'augidi i lu'ivona
'waidie, naninina i souyeniga 'waineye faifaina.
Tutuyanina yana veifufu i nogai, tomotoga
matatabudi i kololo.

⁹ Abimeleki vala i vetunei nuanuana Ebelamo i
na mieni 'waineye. Tutuyanina i le'wa,
Abimeleki i velutoli i vo, Awale nani vitaotogina
'u 'idewai 'waimeye? Kebu a da vekaliemuga,
siwe yau wata yaku 'aila'a taiadi 'a sakona
bwaikina. Begaidi naninina 'u 'idewaiga Sauluva
sakoitogina, kebu i da lubwaineni tamu aitoi i
na vetutuyameni."

¹⁰ Wata Abimeleki Ebelamo i velutolieni i vo,
Nani de'e 'u 'idewaiga, yamu lamuna mogitana
ava'ai?"

¹¹ Ebelamo i tutula i vo, Nani de'e a 'idewaiga,
fai a vo 'ako 'awalawanina 'waineye Yaubada
'ana ve'ililibu kebu, wata yaku vavine 'adi nagi
faifaina yamu tomotogavo i na 'ikasikasisi i na
luvewafaku.'

¹² Vavine de'e 'asa'aiana mogitana novuku, fai
tamama 'aitamogana, we'e inamavo tulidi. Siwe
taiadi 'a nagi.

¹³ Tutuyanina Yaubada i goleku tamaku yana
vanuga a 'iaweni a nago 'awalawa 'aitamogana

'aitamogana 'waidiamo, yama yaba faifaina a vonedi a vo, Ava'ai 'atamanaga 'waineye ta na le'wale'waga, nuanuaku bwaikina yami 'isanuakalikali faifaiku 'wa na nuanuani. Tutuyanina tomotoga i na 'ise mi faifaimi i na vevelutoliga, 'wa na vonedi 'wa na vo, Yau Ebelamo novuna.' ”

¹⁴ Bega Abimeleki yana sifi, 'ifwaidi goti, bulumakau, yana tofolovavo iavetadi wata vevinedi i 'ewadi i 'aniveledi Ebelamo 'waineye, wata yana vavine Sela i veviladi yadi lamoga 'waineye.

¹⁵ Wata Abimeleki i vo, 'U na 'isanago yaku fwayafwaya 'u na 'iseni, ava'aibe bei nuanuamu bei 'u na mia.”

¹⁶ Wata Abimeleki Sela i vonedi i vo, 'Wa 'iseku, novumi a veleveleni kileu siliba 'ana vebwaika 1,000 'aila'a matadie. De'e 'ami tuveobu a 'idewai, 'ai'edi ava'ai sauluvaga sakoina a na 'idewaiga 'waimie, faifaina. Wata velomu de'e a 'idewaiga, 'omi wata yau 'awasasadeye vita 'ana 'ewayavulagi faifaina.”

¹⁷ Mulieta Ebelamo i velu'ui Yaubada 'waineye, nika Yaubada Abimeleki yana vavine wata yana tofolova-maimaiga vevinedi 'adi vita i safaila, bega 'adi fata i na venatuna.

¹⁸ Fai basenadi naninina i souyeni Ebelamo yana vavine Sela 'waidie, vevine matatabudi Abimeleki yana vanuga 'ana tomia 'AUVEA yana veimea 'wainega i kakala.

21

Aisake yana tubuga

¹ 'AUVEA Sela i vesauluva 'atumaina 'waidie nika ava'ai 'AUVEA i vona'awaufeufeniga 'ana mogitana i veluagai.

² Ebelamo 'akonadi i ve'auvea we'e Sela i veinainage, i venatuna Ebelamo natuna iavetana i tubuga, Yaubada i vona'awaufeufeniga 'ana mogitana i souyeni.

³ Ebelamo natuna 'ana wagava i goleni Aisake.*

⁴ 'Aiata 'ana ve-8 i veluagai Ebelamo Aisake bununa i boboi, bani'odi Yaubada i voneni.

⁵ Tutuyanina Aisake i tubuga, Ebelamo 'ana malamala 100 i veluagai.

⁶ Bega Sela i vo, Yaubada 'akonadi i kiavesosoanima bega a sosoana. Tomotoga matatabudi valama i na nogaiga, wata taiadi a na sosoana.

⁷ Kebu tamu aitoi 'ana fata Ebelamo i na voneni i na vo, Sela kwamana i na vesusuya.' Avinodi Ebelamo i ve'auvea siwe natuna a venatuneni.”

Ega ma natudi Isimeli Ebelamo i veugeugedi

⁸ 'Akonadi Aisake i tulai, 'aiatanina 'waineye Sela i na dabai Ebelamo sakali bwaikina i 'idewai.

⁹ 'Aiatanina 'waineye Sela i 'iseni Isimeli Aisake i veve'oyaneni. Isimeli tamana Ebelamo we'e inana Ega, tamu yana vavine Itifita 'wainega.

¹⁰ Bega Sela Ebelamo i voneni i vo, Nuanuama vavine ma natudi 'u na veugeugedi, kebu nuanuama kwamananina tamu veuveuta i na 'ewai tutuyanina yawaimu i na 'a'ava. Nuanuama natuku Aisake 'aisena veuveuta matatabuna i na 'ewadi.”

21:2: Ibu 11:11 * **21:3:** Aisake 'ana 'aseti i namanamaga.

21:4: Nag 17:12; Fol 7:8 **21:10:** Gal 4:29,30

¹¹ Vonanina Ebelamo i noganogai, nuana i vita bwaikaotogina fai Isimeli yana tubu'edakumeta.

¹² Siwe Yaubada Ebelamo i voneni i vo, Kebu nuamu i na vita kwamana ma inana faifaidi. Sela yadi nuanuanina 'u na 'idewai fai Aisake 'wainega 'amu 'aila'a i na souyedi.

¹³ We'e kwamananina Ega natudi wata 'omu natumu yamu tubu'edakumeta, begaidi kwamananina 'wainega tamu 'aila'a bwaikina i na souyeni."

¹⁴ I 'atai bola 'awa'awaiogose Ebelamo 'ani'ani i 'idewadewai wata ufa i koia 'aisaya bununa 'waineye Ega i veolidi, i 'a'avana ma natudi i vetauyidi i nago sali'avu'avuyeamo 'awalawa Biasiba 'waineye.

¹⁵ Tutuyanina ufa 'ana ba'ala 'waineye i 'a'ava, kwamana i naweni tamu welavi 'ai'wa'uneye bei i ve'enovi.

¹⁶ Mulieta sai'afo i vaganago ta na tawe 'atagida 'ana vemanawe bani'odiga, i miabui i vevenua'ivina i vo, Kwamana yana wafa kebu nuanuama a na 'iseni," nika i velamu i taibwaubwau i lumatageu.

¹⁷ Yaubada 'akonadi kwamana yana 'we'wela 'wainega bonana i nogai, begaidi Yaubada yana anelose abamayega i vegole Ega 'waidie i vo, Ega, ava'ai faifaina 'wa venuafouviga? Kebu 'wa na kololo. Kwamana 'eno'enovinega i 'we'wela bei Yaubada bonana i nogai.

¹⁸ 'Wa tovoi 'wa nago kwamana 'wa silakai nuana 'wa 'iveolooloi, fai bola 'ana 'aila'a a na

'ivebwaika, bega 'ana wauma 'wainega tomotoga 'adi 'aila'a tulina tulina i na souyedi 'wainega.”

¹⁹ I 'a'avana, Yaubada Ega matadi i kiavemagetai ovu alaalana ufa nageneye i 'iseni, i nago yadi ba'ala i veliliwai i adaga mulieta kwamana ufa i veleni i yemu.

²⁰ Sali'avu'avuye kwamana i taulai Yaubada yana 'aivaita wata yana 'isave'avina 'wainega. We'e yana 'eba mia sali'avu'avuye wata yana 'aseta bwaikina tufu faifaina.

²¹ Tutuyanina i miamia Felani vi'ainina 'waineye, nika inana tamu vavine Itifita 'wainega i vagavaia i mieni taiadi i nagi.

Ebelamo yana veakutagona i 'idewai Kini Abimeleki taiadi.

²² Tamu 'aiata 'waineye, Kini Abimeleki wata Faikoli, yana tolugaviavo yadi to'edakumeta, i maia Ebelamo 'waineye i veifufu i vo, A 'asetamu 'omu Yaubada 'amu 'weabu, nani matatabuna 'u 'i'idewadiga i 'i'ivaisemu.

²³ 'Akonadi a vesauluva 'atumaina 'waimuye, bega 'u na vona'awaufaufa Yaubada 'ana wagavayega kebu tamu tutuya 'u na vekalieku, natukwavo 'alo tubukwavo taiadi 'waimeye. Yau a vevesauluva 'atumaina 'waimuye, begaidi 'asiau 'omu 'u na vona'awaufaufa yau 'waikuye wata 'awalawa de'e 'ana tomotoga 'waidie, fai 'omu wakawaka taiadi ta miamia.”

²⁴ Ebelamo i vo, A vona mogitana, begaidi a vona'awaufaufa 'waimuye.”

²⁵ Mulieta Ebelamo i vona-vaitugana Kini Abimeleki 'waineye, yana tofolovavo ma yadi nuasako ufa i alai i 'ewai 'waidiega faifaina.

²⁶ Siwe Kini Abimeleki i vo, Nani de'e i souyeniga yau kebu a da 'asetai aitoi i 'idewai. 'Asiauotoga 'u veveifufuyeni 'waikuye nika bei a 'aseti."

²⁷ Begaidi Ebelamo yana sifi, goti wata 'aisaya 'ifwaidi i 'anivelenedi Abimeleki 'waineye, 'adi 'ailuga yadi veakutagona i 'idewai wata i kiavetoketokei.

²⁸ We'e Ebelamo sifi natudiavo vevinedi 'adi-7 i nawedi wata i yato'idiedi.

²⁹ Abimeleki i velutoli Ebelamo 'waineye i vo, Awale sifi 'adi-7 'u yato'idiedi 'ifwaidi 'waidiega?"

³⁰ Ebelamo i vo, Sifi natudiavo 'adi 7 a tauyedi 'omu yamu 'eba 'isa ufa faifaina, yau kumaniku ufa de'e a alai."

³¹ Nika bei 'atamana Biasiba 'ana wagava i goleni, wagavanina 'ana 'aseti fai tomotoga 'adi 'ailuga yadi veakutagona i 'idewai ufa faifaina.

³² Tutuyanina yadi veakutagona 'ana folova i 'a'ava Biasiba 'waineye, Kini Abimeleki yana tolugavia 'adi to'edakumeta Faikoli taiadi i viladi i nagoi yadi 'atamane, 'awalawa Filisitia 'waineye.

³³ Mulieta Ebelamo tamu welavi tamalisiki i bakuli 'atamana Biasiba 'waineye. Bei wata i 'odu yana 'AUVEA 'waineye i subiai, fai taunina Yaubada Miamia-vagaina.

³⁴ Ebelamo kumanina wakawaka, tutuya manamanawena yana 'aila'avo taiadi i miamia 'awalawa Filisitia nageneye.

22

Ebelamo 'ana saitonova

¹ Tamu tutuya 'waineye Yaubada Ebelamo yana vetumagana i sitonovi, bega i vegole 'waineye i vo, Ebelamo!" Nika i tutula i vo, Yau side."

² Wata Yaubada i voneni i vo, Natumu yamu tamogana Aisake, kumanina 'u nuakalikalieni bwaikina, 'u na vagavaia 'wa na nago 'awalawa Molia. Tamu 'oya a na vemu, bei 'u na velomuyeni 'u na kabuni 'waikuye."

³ Bola 'awa'awaiogose Ebelamo i tovoi yana doniki i 'idewai, yana tofolova 'adi 'ailuga i vagavaidi natuna Aisake taiadi. Welavi i keia velomu faifaina i vedodogidi doniki kwavuneye nika i tauya i nunagoi 'awalawanina Yaubada i voneyeniga 'waineye.

⁴ 'Aiata 'ana vetonu 'waineye Ebelamo 'ani'ieyega 'oyanina i 'isanaweni.

⁵ Ebelamo yana tofolovavo i vonedi doniki taiadi i na miamia we'e i vo, Yau wata kwamana taiadi sai'afo 'a na vaganago bega 'a na 'odu Yaubada 'waineye wata 'a na vilama 'a na mai 'waimie."

⁶ Ebelamo welavi keikeina ma 'itavina velomu faifaina natuna i vevai, we'e taunina 'ai 'ala'alaina wata 'ilama i 'ewadi nika 'adi 'ailuga i tauya i nago.

⁷ Aisake i sivilai tamana i velutolieni i vo, Tamaku?" Ebelamo i vo, Natuku, yau side 'u veifufu." Aisake i vo, 'U 'iseni, 'ai 'ala'alaina wata 'ilama 'u 'ewadi, we'e ava'aibe sifi siaina ta na velomuyeni ta na kabuni Yaubada faifaina?"

⁸ Ebelamo i tutula i vo, Natuku, Yaubada taunina sifi i na veleda bega ta na velomuyeni

wata ta na kabuni faifaina.” Nika ma natuna i tauya i nagoi.

⁹ Tutuyanina i le'wa 'awalawanina Yaubada i voneyeniga 'waineye, Ebelamo 'eba velomu i didigi wata welavi i lubayai, nika natuna Aisake i yogoni tabwaneye i ve'enovi.

¹⁰ Nika Ebelamo 'ilama i 'ewai natuna i da luwewafai bega i da velomuyeni.

¹¹ Tutuyanina 'waineye 'AUVEA yana Anelose i vegole abamega, i vo, Ebelamo! Ebelamo!”

Ebelamo i tutula i vo, Yau side.”

¹² Anelosenina i vo, Kebu natumu 'u na luwewafai wata kebu tamu ava'ai 'u na 'idewai 'waineye. 'Asiau a 'asetai 'omu mogitana ma yamu ve'ililibu Yaubada 'u kololoyeni, fai kebu natumu yamu tamogana 'u da ve'o'oleniga yau 'waikuyega.”

¹³ Ebelamo i 'isanago sifi iavetana i 'iseni alana i lu'eweni welavi siaidi 'waidie. I nago sifi i 'ewai i velomuyeni i kabuni Yaubada 'waineye, yana 'anivelena-maimaiga natuna tutulina.

¹⁴ Bega Ebelamo 'atamananina i goleni 'AUVEA *To'anivelena, begaidi tutuyanina 'wainega i maiga 'asiau tomotoga yadi 'eba vetalatutula i vo, 'AUVEA yana 'Oya bei i 'a'anivelena.*”

¹⁵⁻¹⁷ Nika 'AUVEA yana anelose i vegole-vaitugana abamega Ebelamo 'waineye i voneni i vo, 'AUVEA yana vona side i vo, Fai 'omu 'u ve'ililibuyeku bega natumu yamu tamogana kebu 'u da ve'o'oleniga, yau 'AUVEA a vona'awaufaufa tauniku 'aku wagavayega

mogitana a na vesauluva 'atumaina 'waimuye.
 'Amu wauma a na 'ivefuei, lu'iawawa-wayoga
 wala'ai 'ana 'ilukulukuta bani'odi wata 'ubwana.
 We'e 'amu waumanina 'adi gaviavo i na
 vetoketoke-'iawedi wata yadi 'atamana i na
 tala'avuidi.

¹⁸ Fai 'u vematayakeyakeku, 'amu wauma
 'wainega tomia fwayafwaya matatabuna 'adi
 'aila'a tulina tulina yadi 'atumaina i na veluagai.”

¹⁹ Ebelamo ma natuna i viladi i maia yana
 toflovavo 'waidie, bega i viladi i nago Biasiba,
 bei Ebelamo i miamiaga.

²⁰ Tutuya 'ifwaidi i 'a'avana, tamu tomogo
 Ebelamo i voneni i vo, Taimu Naoli yana vavine
 Milika, natudiavo matatabuna 'adi 8 iavetadi i
 tubuga 'waidiega.”

²¹ Tubu'edakumeta kumanina 'ana wagava
 Usa, mulineye Busa, Kemueli kumanina 'wainega
 me Alami i souyedi,

²² Kesedi, Asao, Filidasi, Idigafa wata Betueli.

²³ Betueli natuna Libeka kumanina tamadi.
 Milika kwakwamanidi i venatunedi 'adi 8
 Ebelamo taina Naoli 'wainega.

²⁴ Naoli tamu yana vavine 'adi wagava Leoma
 natudiavo 'adi 4 i venatunedi, side 'adi wagava,
 Teba, Gaiamu, Tasi wata Maka.

23

Sela yawaidi i 'a'ava wata i ve'ufadi.

¹ Tutuyanina Sela 'adi malamala 127 i veluagai,

² Nika Sela yawaidi i 'a'ava 'atamana
 Kiliati-Alaba, 'atamananina tutuya de'e 'ana

wagava Ebiloni, 'awalawa Kenani nageneye. Bei Ebelamo i vevemogai wata i 'we'wela ma yana nuavita yana vavine faifaidi.

³ Mulieta Ebelamo yana vovo lilivadie i tovoi i veifufu me Aite yadi to'edakumetavo 'waidie i vo,

⁴ Yaku vavine yawaidi i 'a'ava, bega a vevelu'ui 'waimie, tamu yami fwayafwaya 'wa da tauyeni a da kimwanei, nika bei a da ve'ufadi."

⁵ Siwe me Aite Ebelamo yana vona i tutuli i vo,

⁶ Yaku 'auvea, 'omu tamu toveimea ma 'amu ve'ililibu taiadi ta miamia. Nuanuama taumata 'atumaina 'u na venuma'ivinini bega yamu vavine 'u na ve'ufadi. Tomotoga matatabudi de'e bei i miamia, kebu tamu aitoi 'ana fata i na talabodemu 'adi ve'ufa faifaina."

⁷ Ebelamo i vona'a'ava nika ma yana ve'ililibu i 'odu me Aite matadie.

⁸ I vona i vo, 'Ai'edi nuanuami 'wa na 'ivaiseku yaku vovo 'ana ve'ufa faifaina, nuanuaku 'wa da veifufu 'aku wagavayega Efiloni 'waineye taunina Soa natuna,

⁹ bega Ovu Makifela i da tauyeni a da kimwanei, fai tanoganina yana 'eba veimea. 'Wa da voneni i da vekimwaneyeni 'waikuye 'ana tutula taiadi bega a da kimwanei, yaku taumata yaku 'aila'avo taiadi faifaima."

¹⁰ Efiloni tomogo Aite i miabui 'ifwaidi yana 'aila'avo taiadi, kumanidiavo i maia 'atamananina a na 'awa 'eba luku 'waineye, Efiloni yana veifufu 'waineye i vivinenegeni. Efiloni i vo,

¹¹ Kebu yaku 'auvea, yaku nuanua 'u na vinenegeni. Yaku 'aila'avo matadie tanoganina

wata ovu taiadi a na velemu. Bega 'u na nago yamu towafa 'u na ve'ufadi.”

¹² Ebelamo i tovoi 'awalawanina 'ana tomotoga matadie ma yana ve'ililibu i 'odu 'waidie.

¹³ Tomotoga matatabudi i vivinenega nika Ebelamo Efiloni yana vona i tutuli i vo, Kebu, yaku nuanua 'u da nogai. Nuanuaku fwayafwaya a na kimwanei 'waimuyega. Tanoganina 'ana tutula mogitana 'u da voneku 'a da tutuli, mulieta yaku vovo a da ve'ufai.”

¹⁴ We'e Efiloni Ebelamo i voneni i vo,

¹⁵ Yaku 'auvea, a na vonemu. Fwayafwaya 'ana tutula kileu siliba 400 bani'odi. We'e 'omu 'ima taiadi ta veiana. 'Asa'aiana 'u na nago yamu towafa vovodi 'u na ve'ufai.”

¹⁶ Ebelamo Efiloni yana tutula i awave'atumaieni bega kileu siliba 400, 'ana 'etowava bani'odi 'eba sivedavedamana 'wainega i tutuli. Tutuyanina 'waineye me Aiti to'edakumetavo 'au'auveadi matadie.

¹⁷ Bega Ebelamo fwayafwayanina i kimwanei Efiloni 'wainega, 'awalawa Makifela we'e Mamile lilivaneye. Fwayafwayanina Ebelamo i kimwaneiga tanoga, ovu, wata welavi fuedi 'edabala 'waineamo i veve'alatovoi.

¹⁸ Tutuyanina 'waineye ma'itufa Ebelamo 'eba veimeanina i 'ewai i vetoniwakeni. 'Atamana bwaikina 'ana 'eba luku 'waineye me Aiti 'au'auveavo matadie fwayafwayanina i 'aniveleneni Ebelamo 'waineye.

¹⁹ Mulieta Ebelamo yana vavine Sela i ve'ufadi 'awalawa Kenani 'waineye, ovu Makifela

nageneye Mamile lilivaneye tamu 'ana 'eba
'ainana Ebiloni.

²⁰ Nika tanoga fwayafwayanina 'waineye wata
ovu i 'anivelenedi me Aiti 'waidiega i nago
Ebelamo 'waineye, kumanina yana taumata
wata yana 'eba veimea.

24

Aisake Libeka taiadi i nagi

¹ Ebelamo 'akonadi i ve'auvea-'afo'afo wata
'AUVEA i vesauluva 'atumaina 'waineye nani
matatabuna 'waidiega.

² Tamu tutuya Ebelamo i veifufu yana tofolovavo
yadi to'edakumeta 'waineye, kumanina yana
vanuga 'ana to'isave'avina i voneni i vo,
Nuanuaku nimamu 'u na yatoi 'abi'abiku
dibuneye, yamu vona'awaufaufa 'u na 'idewai
'waikuye.

³ Bega yamu vona'awaufaufa 'AUVEA 'ana
wagavayega 'u na 'idewai mataneye. Kumanina
abama, fwayafwaya yadi Yaubada wata 'adi
toveimea. Kebu natuku me Kenani natudiavo
vevine 'u na tauyedi taiadi i na nagi.

⁴ We'e mogitana 'u na nago 'aku tuvada 'waineye
wata yaku 'aila'avo 'waidie, bei natuku Aisake
yana vavine 'u na vagavaia."

⁵ Bega tofolovanina i velutoli i vo, Bani'odi a na
munega 'ai'edi vavine ne'e'elina a na veluagai
siwe kebu nuanua taiadi a na maiga? 'Ana fata
Aisake a na vagavaia taiadi 'a na nago,
'awalawanina 'wainega 'u maiga 'waineye i na
mia?"

⁶ Ebelamo i vo, 'U na 'asetai, kebu tamu sai'afo natuku a da tauyeni bega 'u na naweni.

⁷ 'AUVEA Yaubada abame i vagavaiku tamaku yana 'eba mia wata 'aku tuvada 'wainega, i vona'awaufaufa 'waikuye i vo, De'e fwayafwayanina matatabuna i na 'aniveleneni tubukwavo 'waidie.' Wata 'AUVEA yana anelose i na vetunei i na kumeta awasasadie i na miamia nika bei natuku yana vavine 'u na vagavaia.

⁸ 'Ai'edi vavinenina kebu nuanuana taiadi 'wa na maiga, 'omu 'akonadi yavuyavumu vona'awaufaufanina 'wainega. Siwe kebu tamu sai'afo natuku a da tauyeni taiadi 'wa na vilami 'atamananina 'waineye.”

⁹ Bega tofolovanina yana vona'awaufaufa i kiavetoketokei, 'ana toveimea Ebelamo 'abi'abina dibuneye i yatoi bega yana vona'awaufaufa i 'idewaiga i na vematayakeyakeni.

¹⁰ Mulieta tofolovanina Ebelamo yana kameli 'adi 10 i 'ewadi, nuakalikali 'adi tutula bwaikidi tulina tulina 'ana toveimea i veleni kameli kwavudie i vedodogidi. I 'idewadewa i 'a'avana nika i tauya i nago Alami-Na'alimi, bei Ebelamo taina Naoli i miamia.

¹¹ 'Akonadi i lavia bega Ebelamo yana tofolova, 'aisaya kameli 'agedi i vetufano'uyedi ufa lilivaneye. Tutuyanina 'waineye vevine i mimaia ufa koi faifaina.

¹² Mulieta tofolovanina i velu'ui i vo, 'AUVEA, 'omu 'aku toveimea Ebelamo yana Yaubada, 'asiau ava'ai a na 'idewaiga 'u da 'ivaiseku wata 'u da vevesauluva 'atumaina 'aku toveimea Ebelamo 'waineye.

¹³ Yau side a tovoovoi ufa-luluvuala lilivaneye, vevine tubuvauvau 'atamananina 'ana tomotoga i mimaia ufa koi faifaina.

¹⁴ Yaku nuanua side bani'odi. Vevinenidi 'waidiega tamu a da voneni a da vo, 'Ana fata yamu 'eba koi ufa 'u da koia 'u da veleku a da yemu?' 'Ai'edi vavinenina i na vo, Ufa side 'u yemu, wata yamu kameli a na veyemudi,' 'asa'aiana vavinenina 'u venua'ivineni Aisake faifaina, bega a na 'asetai 'akonadi 'u vesauluva 'atumaina 'aku toveimea 'waineye. De'e bani'odi i na ve 'waikuye nika a na 'asetai 'aku toveimea 'u nunuakalikalieni mogitana."

¹⁵ Bola kebu i da velu'ui i 'a'ava, nika tamu vavine ne'e'elina i 'iseni yana 'eba koi ufa i gabai i mimai. 'Ana wagava Libeka, vavinenina Betueli natuna, Ebelamo taina Naoli yana vavine Milika natudi.

¹⁶ Libeka 'ana 'isa 'atumaotogina, kebu i da nagiga wata bola kebu tamu aitoi taiadi i da veluaga. I nago ufa-luluvuala 'waineye 'ana ufa 'eba koi i veadagi, i 'a'ava i vilai i lakama.

¹⁷ Bega tofolovanina i lilide i nago i voneni i vo, Nuanuaku ufa siaina 'u da veleku a da yemu yamu ba'ala 'wainega."

¹⁸ Vavine i vo, 'Aku toveimea, ufa side 'u yemu.'" Bega ba'ala 'avalanega i sita'ia i obu nika i veleni i yemu.

¹⁹ Tutuyanina ufa i yemu 'a'avana i vo, Wata yamu kameli 'adi ufa a na koidi i na yemu, nika matatabudi i yemu i nagoga nika 'adi sala."

²⁰ Bega i lilide i nago yana ba'ala ma ufana iwagi 'eba yemu 'waineye, i vilai i nago ufanina

'waineye moso'ina i koia, bega matatabudi i yemu i nagoga nika 'adi sala.

²¹ Tofolovanina i ve'wada i 'ise'iseni wata i vevenua'ivina i vo, Voke 'AUVEA yana folova faifaina i 'ive'atumaia 'alo kebu?"

²² Tutuyanina kameli i yemu 'a'ava, mulieta tofolovanina didikumakuma golida kabunina faifaina, wata nifuna golida 'ailuga nima'odona faifaidi i yatodi.

²³ Mulieta i velutolieni i vo, 'Omu aitoi natuna? Nuanuaku 'u da voneku, tamamu yana vanuge 'aivia tutudaba i 'eno'eno bei 'a da 'eno lovana faifaina?"

²⁴ Yana velutoli tutuli i vo, Yau Betueli natuna, Naoli wata Milika taiadi tubudi.

²⁵ Nika i voneni i vo, E'e 'ima 'waimeye 'aisaya yadi 'eba 'eno wata 'adi mosomoso bwaikina yadi 'eba 'ani, we'e tamu tutudaba i 'eno'eno wakawaka faifaidi bei 'wa na 'eno."

²⁶ Bega tomogo ma yana ve'ililibu i 'odu 'AUVEA 'waineye.

²⁷ I vo, 'AUVEA a na subisubiai, taunina 'aku toveimea Ebelamo yana Yaubada. Fai ma yana nuakalikali 'eno'eno-vagaina i vevesauluva 'atumaina 'aku toveimea 'waineye. We'e yau 'asiau, 'AUVEA kumanina i 'edakumeseku bega tonoviku a le'wa, 'aku toveimea yana 'aila'avo 'waidie."

²⁸ Nika vavine i lilide i nago vanuge, ava'ai souyeniga matatabuna i veifufuyeni yana 'aila'avo 'waidie.

²⁹ Libeka novuna 'ana wagava Lebani, i lilide i nago tomogo i veluagai ufa luluvuala lilivaneye i tovoতোবো.

³⁰ Tutuyanina i le'wa, i 'isanago novuna kabuni 'ana didikumakuma wata 'ana nifuna i 'iseni nimaneye i 'eno'eno wata Libeka yana veifufu i nogai tomogo i veifufuyeni 'waineye. Bega i lilide i nago ufa-luluvuala 'waineye, tomogo i 'iseni kameli taiadi i tovoovoi.

³¹ Bega Lebani i voneni i vo, 'Omu 'akonadi 'AUVEA i vesauluva 'atumaina 'waimuye, 'u mai ta na nago vanuge. Kebu i da lubwaineni mwalilige 'u na tovoovoi fai yamu vanuga wata kameli yadi 'eba mia 'akonadi i 'eno'eno.”

³² Bega tomogonina i nago Lebani yana vanuge, kameli 'waidiega kukua i siobuyedi i 'a'avana, kameli yadi 'eba 'eno mosomoso bwavudi i veledi, wata kameli i ve'anidi, mulieta ufa i mieni yana tofolovavo taiadi i veledi 'agedi i lekoadi.

³³ Mulieta 'ani'ani i 'idewai i mieni i yatoi i na ve'ala'ani faifaina siwe tofolovanina i vo, Kebu a na 'aniga, nagami yaku mai faifaina a na veifufuyeni 'waimuye.”

Lebani i vo, 'Atumaina 'u veifufu 'waimeye.”

³⁴ Bega tomogo i vo, Yau Ebelamo yana tofolova.

³⁵ 'AUVEA ma yana nuakalikali i vesauluva 'atumaina 'aku toveimea 'waineye bega i ve'ai'aiwabu mogitana. Sifi wata bulumakau fuedi, mani bwaikina, golida wata siliba, tofolovavo iavetadi wata vevinedi, kameli wata doniki i veleni.

³⁶ Tutuyanina 'aku toveimea yana vavine Sela i vemo'ai i venatuna, 'aku toveimea natuna iavetana i tubuga. Wata 'aku toveimea yana kukua matatabuna i 'anivelenedi natuna 'waineye bega i na veimeyedi.

37 'Aku toveimea yana nuanua i veleku bega a vona'awaufaufa mataneye a na 'idewai. I velu'ase'aseku i vo, Kebu 'a da tauyemu bega Kenani 'ana vavine natuku i na nagia.

38 We'e mogitana 'u na nago tamaku yana 'aila'a mogitana 'waidie, natuku yana vavine 'u na vagavaia 'u na mieni.'

39 Wata yaku 'auvea a velutolieni a vo, 'Ai'edi vavine ne'e'elina 'a na veluagaiga, siwe kebu nuanuana taiadi a na maiga bani'odi a na munega?'

40 I voneku i vo, 'AUVEA, kumanina tutuya fuedi taiadi 'a miamia, yana anelose i na vetunei 'waimuye taiadi 'u na nago, yamu folova i na 'ive'atumaia bega 'u na nago yaku 'aila'a mogitana 'waidie tamu vavine 'u na veluagai natuku faifaina. Taunina tamaku yana 'aila'avo wata 'ana wauma mogitana 'wainega.

41 Naninina faifaina 'a vonemuga 'akonadi 'u na 'idewai yaku 'aila'avo 'waidie, siwe 'ai'edi kebu vavine i na tauyeni taiadi 'wa na maiga, 'omu yavuyavumu yaku vona'awaufaufa 'wainega.' "

42 Wata 'waidie i vo, 'Asiau a le'wa ufa-luluvuala 'waineye a velu'ui a vo, 'AUVEA, 'omu 'aku toveimea Ebelamo yana Yaubada, nuanuaku yaku folova 'u da 'ive'atumaia.

43 Side bei a na tovoovoi ufa-luluvuala lilivaneye. 'Ai'edi tamu vavine ne'e'elina i na mimai ufa koi faifaina, a na voneni a na vo, Nuanuaku yamu 'eba koi 'wainega ufa siaina 'u da veleku a da yemu."

44 'Ai'edi vavine i na vo, Ufa side, 'u mai 'u yemu, wata yamu kameli 'adi ufa a na ko'idi,'"asa'aiana

kumanina 'u venua'ivineni bega taiadi a na nago 'aku toveimea natuna taiadi i na nagi.'

⁴⁵ Bola yaku nuanuayega a vevelu'ui'AUEA 'waineye, nika Libeka a 'iseni ufa a na ba'ala 'avalaneye i mimai, a obu ufa 'eba koi 'waineye a voneni a vo, Nuanuaku ufa 'u da veleku 'a da yemu.'

⁴⁶ I lilide yana 'eba koi i siobuyeni i voneku i vo, Ufa 'u yemu, wata yamu kameli a na veledi i na yemu.' Bega a yemu, i 'a'avana wata kameli matatabudi ufa i veledi i yemu.

⁴⁷ Bega a velutolieni a vo, 'Omu aitoi natuna?' I vo, Yau Betueli natuna, Naoli wata Milika tubudi.' Bega kabuni 'ana didikumakuma a yatoi kabunineye, wata nimaneye nifuna 'adi 'ailuga a veagedi.

⁴⁸ Mulieta ma yaku ve'ililibu a 'odu 'AUEA 'waineye. 'AUEA, 'aku toveimea Ebelamo yana Yaubada a subiai wata a vekaiwa 'waineye, fai kumanina i 'edakumeseku 'aku toveimea Ebelamo taina tubuna vevinena, i na nagia.

⁴⁹ 'Ai'edi 'aku toveimea yana nuanua 'wa na sosoaneniga, ma yami nuakalikali 'wa na vesauluva 'atumaina 'waineye, nuanuaku 'wa voneku bega a na 'asetai, 'wa sosoana 'alo kebu? Mulieta a na venua'ivina ava'ai wata a na 'idewai."

⁵⁰ Bega Lebani wata Betueli yana vona i tutuli i vo, 'Akonadi 'a 'asetai 'AUEA i kumesemi 'wa mai de'e bei. Begaidi kebu 'ana fata tamu ava'ai 'a na veifufuyeni 'waimie.

⁵¹ Libeka side. 'U na vagavaia 'wa na nago nika 'amu toveimea natuna taiadi i na nagi, bani'odi

'AUVEA i voneyedi 'waimuye."

⁵² Tutuyanina Ebelamo yana tofolova yadi vona i nogai, i lumata'afufu 'AUVEA mataneyeye i 'odu.

⁵³ I 'a'avana, tofolovanina 'eba vaigavu kileu golida wata siliba, kaleko 'adi 'isa 'atumaotogidi i miedi Libeka i veleni. Wata kukua 'adi tutula bwaikidi novuna iavetana wata inana taiadi i veledi.

⁵⁴ Mulieta 'ani'ani i ve'ala'ani wata i yemu, nika bei i veawai, tofolova ma enavo i 'eno i nagoga nika i 'atai.

I 'atai 'awa'awaiogose tofolovanina i vona i vo, 'U da tauyeku a da vilaku 'aku toveimea 'waineyeye."

⁵⁵ Siwe Libeka novuna wata inana i vo, Nuanuama Libeka taiadi 'a na miamia 'aiata 10 ma 'ana 'imoso'i i na 'a'avana, mulieta taiadi 'wa na nago."

⁵⁶ Siwe tofolovanina i vo, Kebu 'wa na talabodeku mia faifaina, fai 'AUVEA yaku folova i 'ive'atumaia. 'Asa'aiana 'wa da vetuneku, bega a da vilaku a na nago 'aku toveimea 'waineyeye."

⁵⁷ Nika novuna wata inana i vo, Libeka 'a na goleni i na mai, a na velutolieni yana nuanua mogitana ta na 'asetai."

⁵⁸ Bega Libeka i goleni i mai i velutolieni i vo, Nuanuamu tomogo de'e taiadi 'wa na nago?" I vo, E'e, a na nago."

⁵⁹ Begaidi Libeka i 'alanuaidi i 'a'avana, nika Ebelamo yana tofolova ma yana 'aila'avo taiadi i vetunedi. We'e Libeka basenadi siaineyeye 'ana to'isave'avina taiadi i nagoi.

⁶⁰ Tutuyanina Libeka i na tauya yana 'aila'avo i vona-nuakalikalieni i vo,

'Omu novuma, nuanuama 'amu wauma 'wainega 'aila'a i na vebwaika.

Wata nuanuama 'amu wauma i na vevetoketoke bega 'adi gaviavo yadi 'atamana i na tala'avuidi wata i na vetoketoke 'iawedi.”

⁶¹ Bega Libeka yana tofolova-maimaiga taiadi i dodoga kameli 'waidie, tomogonina i yogo'waili. Side bani'odi Ebelamo yana tofolova Libeka i vagavaia taiadi i nago.

⁶² We'e Aisake i vilai i mai Bia-Lai-Loi 'wainega, yana 'atamana bei i miamiaga Negevi 'waineye.

⁶³ Tamu lavilavi 'waineye Aisake tanoga 'waineamo i nunago wata i vevelu'ui, nika i 'isanago kameli i 'isedi i mimaia.

⁶⁴ Tutuyanina Libeka i 'isalaka Aisake i 'iseni nika i obu kameli 'wainega.

⁶⁵ Bega i velutoli tofolovanina 'waineye i vo, Aitoi tomogoga i mimai 'waideye?”

Tofolovanina i vo, Tomogo 'asa'aiana yaku 'auvea.” Begaidi Libeka 'unu'ununa 'ana baniuma i 'ewai i baniumai.

⁶⁶ Bega tofolovanina Aisake 'waineye i veifufu nani matatabuna i 'idewadiga faifaidi.

⁶⁷ Aisake Libeka i mieni inana Sela yadi vanuga naya 'waineye, bei i nagia yana vavine. Aisake yana vavine i nuakalikalieni bwaikina fai inana yawaidi i 'a'ava, begaidi vavinenina kumanina nuana 'ana to'iveoloolo.

25

Ebelamo yawaina i 'a'ava

¹ Wata Ebelamo tamu vavine i nagidi, 'adi wagava Ketula.

² Mulieta Ketula i venatuna side 'adi wagava i veledi, Similani, Iokesani, Medani, Midiani, Isibaki, Sua.

³ Iokesani natunavo Siba wata Dedani. Dedani tubunavo 'aila'a 'aitonu 'wainega i souyedi, 'adi wagava me Asula, me Letusi wata me Leumimi.

⁴ Midiani natunavo side 'adi wagava, Efa, Efeli, Anoka, Abida, Elidada. Tomotoganidi matatabudi Ebelamo wata Ketula tubudiavo.

⁵ Ebelamo yana kukua matatabuna i 'anivelenedi Aisake 'waineye.

⁶ We'e bola Ebelamo kebu i da wafaga, Ebelamo yana vevinevo 'adi 'ailuga, natudiavo nuakalikali 'aitamogana 'aitamogana i veledi, mulieta i vetunedi i nagoi tamu 'awalawa inala yana 'eba laka weyaginega, Aisake i miamiaga 'wainega.

⁷ Ebelamo i miamia i nagoga 'ana malamala 175 i veluagai.

⁸ 'Akonadi i ve'auvea-'afo'afo mulieta i wafa, ma yana sosoana i miamia i nagoga mulieta yawaina 'eba ve'a'ava i tauyavuleni nika tubunavo mulidie i nago.

⁹ Natunavo Aisake wata Isimeli i nago ovu Makifela 'waineye bei i ve'ufai, 'atamana Mamile lilivaneye. Efiloni natuna Soa kumanina tomogo Aiti, yana tanoga nageneye.

¹⁰ Tanoganina basenadi Ebelamo i kimwanei me Aiti 'waidiega. Bei yana vavine Sela i ve'ufadi.

¹¹ Tutuyanina Ebelamo i wafa, Yaubada Aisake i vesauluva 'atumaina 'waineye. We'e yana 'atamana i 'idewai Bia-Lai-Loi lilivaneye 'awalawa Negevi 'waineye.

Isimeli tubunavo

¹² De'e Isimeli natunavo wata yana 'aila'a 'adi veifufu, Ebelamo wata Ega taiadi natudi. We'e Sela yadi tofolova-maimaiga Itifita 'wainega.

¹³ Isimeli natunavo side 'adi wagava wata 'adi wauma. Tulaiotogina Nebeiota, mulineye Keda, Adabeli, Mibisema,

¹⁴ Misima, Duma, Mesa,

¹⁵ Adadi, Tema, Ietulo, Nafisi, wata Kedema.

¹⁶ Isimeli natunavo 'adi 12 taunidi wauma 12 'adi to'edakumetavo, 'adi wagava yadi 'atamana wata yadi 'eba veimea 'aitamogana 'aitamogana bei i miamia.

¹⁷ Isimeli i miamia i nagoga 'ana malamala 137 i veluagai, mulieta yawaina 'eba ve'a'ava tauyavuleni i 'awatagoni nika i wafa tubunavo mulidie i nago.

¹⁸ Isimeli tubunavo 'adi wauma 'awalawa 'aitamogana 'aitamogana i luvaidi. Yadi 'atamana Avila 'wainega i velamu i nagoga 'ana tugusa Sula, inala yana 'eba laka, Itifita wata Asula 'weyagidiega. Isimeli tubunavo kumanidi tonuasako wata todaba yadi 'aila'avo matatabuna i vevegaviedi.

Iso wata Iakobo yadi tubuga

¹⁹ Ebelamo natuna Aisake wata natunavo ifuifufudi side bani'odi.

²⁰ Tutuyanina Aisake 'ana malamala 40 i veluagai, nika Libeka i nagia. Libeka tamadi

Betueli we'e novuna Lebani. Tomotoganidi me Alami i miamia 'awalawa Mesafotemia 'waineye.

²¹ Libeka kakalina kebu tamu natunaga, bega Aisake i velu'ui 'AUVEA 'waineye yana vavine faifaidi. 'AUVEA yadi velu'ui i nogai, nika Libeka i miana kwakwama 'adi 'ailuga umwadie.

²² Kwakwamanidi i vetunufelafelagi, nika inadi i nago i velu'ui 'AUVEA 'waineye i vo, Ava'ai i sousouyeni 'waimeye?"

²³ 'AUVEA yadi velutoli i tutuli i vo, Kwakwamanidi 'adi 'ailuga i na tubuga, 'waidiega 'aila'a 'ailuga i na souyedi. 'Aila'anidi 'adi 'ailuga kebu i na miave'itubamaga. Tamu 'aila'a toketokena we'e tamu mweana, Tulaina yana 'aila'a i na vetofolova taina yana 'aila'a 'waineye."

²⁴ Yadi tutuya i veluagaiga Libeka i venatuna kwakwama 'adi 'ailuga i tubuga.

²⁵ Kumekumetana i tubuga tomogona yamoyamoina wata 'olo'olona 'wa da vo tamu talauma 'olo'olona, begaidi i goleni Iso.*

²⁶ Tutuyanina Iso i tubutubuga, taina 'age'edu'eduneye i 'abi, bega i goleni Iakobo.† Aisake 'ana malamala 60 i veluagai, mulieta yana vavine kwakwamanidi 'adi 'ailuga i venatunedi.

Tubu'edakumeta 'ana veuveuta Iso 'awaie i da veluagaiga, i vekimwaneyeni

²⁷ 'Akonadi kwakwama 'adi 'ailuga i taulai Iso toyaubani 'ase'asetana, tutuya fuedi i 'e'etololo

25:23: Lom 9:12 * **25:25:** Vona Ibeliu 'waineye, wagava Iso 'ana nogaya 'wa da vo 'Olo'olona. † **25:26:** Vona Ibeliu 'waineye, wagava Iakobo 'ana nogaya 'wa da vo 'Age'edu'eduneye.

wala'aie, we'e Iakobo veve'wadana 'atamane i miamia.

²⁸ Tutuya fuedi Iso 'wenena i vevetagovi bega tamana i 'ani'ani, begaidi Aisake Iso i nuakalikalieni, ma'itufa Libeka Iakobo i nuakalikalieni.

²⁹ Tamu tutuya, Iakobo talafwea 'iwanina i vevetago nika Iso wala'aiega i le'wa i lase-'afo'afo.

³⁰ Iso Iakobo i voneni i vo, A lase-'afo'afo, 'u 'abiwalowaloga siwe talafweanina yamoyamoina 'u na veleku a na 'ani." Nika bei tamu 'ana wagava i goleni Idomu, 'ana saivila *Yamoyamoina*.

³¹ Iakobo i vo, 'Atumaina, nagami 'amu tubu'edakumeta veuveutanina 'u na veleku."

³² Bega Iso iana i voneni i vo, Yau sai'afotoga a na wafa, 'aku tubu'edakumeta veuveutanina kebu faifaina a da nuanuaga, 'ako kebu tamu nani 'atumaina 'wainega a na veluagaiga."

³³ Iakobo i voneni i vo, Nagami 'u na vona'awaufaufa 'waikuye." Iso i vo, A vona mogitana 'waimuye, 'aku veuveuta a 'aniveleneni 'waimuye."

³⁴ Mulieta Iakobo Iso 'ani'ani wata talafwea 'iwanina i veleni i 'ani wata i yemu, i 'a'avana i tauya. Iso kebu 'ana veuveuta faifaina i da nuanuaga iana i velenimo.

26

Aisake wata Abimeleki

¹ Loka bwaikina i souyeni 'awalawa Kenani, bani'odi basenadi Ebelamo yana tutuye. Bega

Aisake i nago Gelai, Filisitia yadi kini Abimeleki 'waineye.

² Nika 'AUVEA i souyeni Aisake 'waineye i voneni i vo, Kebu 'u na obu Itifita, we'e 'awalawanina yau a na vonemuga, bei 'u na mia.

³ Side bei Gelai 'u na miamia 'u na vewakawaka de'e 'awalawanina nageneye, we'e yau 'omu taiadi, wata a na vevesauluva 'atumaina 'waimuye. Yau fwayafwaya de'e matatabuna a na velelu tubumwavo taiadi, bani'odi basenadi yaku vona'awaufaua toketokena tamamu Ebelamo a veleni.

⁴ Yau 'amu wauma a na 'ivefuei, lu'iawawa-wayoga wala'ai 'ana 'ilukulukuta bani'odi wata 'ubwana, we'e fwayafwaya de'e matatabuna tubumwavo a na veledi. 'Amu wauma 'wainega tomia fwayafwaya matatabuna 'adi 'aila'a tulina tulina yadi 'atumaina i na veluagai.

⁵ Yaku vona'awaufaufanina a na 'idewai 'waimuye fai Ebelamo i vematayakeyakeku. Yaku nuanua, yaku veimea wata yaku awave'eda'eda matatabudi i 'idewadi."

⁶ 'AUVEA i vona'a'avana, Aisake i miamia Gelai.

⁷ Tutuyanina 'atamananina 'ana iaveta Aisake i velutolieni yana vavine Libeka faifaina, i vo, Taunidi yau novuku." Siwe kebu nuanuana i na vo, Kumanidi mogitana yaku vavine," fai i kololo yana nuanua i vo, 'Ai'edi a na vo, Yaku vavine,' 'ako 'atamananina 'ana iaveta i na luvewafaku yaku vavine i na 'ewadi, fai Libeka vavine 'iwakawakana."

⁸ Tutuya 'ifwaidi i 'a'ava, tamu 'aiata 'waineye me Filisitia yadi kini 'ana wagava Abimeleki, tutubweka 'wainega i 'isaobu Aisake i 'iseni Libeka i kiawayowayogidi.

⁹ Bega Abimeleki Aisake 'ana vala i vetunei i mai i velutolieni i vo, 'Asa'aiana 'omu yamu vavine, awale 'u vo, Taunidi yau novuku?' ”

Aisake i vo, Fai a kololo a vo, I na nunago tamu tomogo i na luvewafaku yaku vavine i na 'ewadi 'waikuyega.' ”

¹⁰ Wata Abimeleki i vo, Awale sauluvanina 'u 'idewai 'u ve'ewa 'waimeye? 'Ai'edi tamu yaku tomotoga yamu vavine i da 'ewai taiadi i da 'eno, 'ako vita matatabuma 'u da velema sakonanina 'wainega.”

¹¹ Bega Abimeleki veimea toketokena i lu'ivoneyeni yana 'aila'avo 'waidie i vo, 'Ai'edi aitoi tomogo de'e 'alo yana vavine i na 'abitonovidi, a na veimea ta na luvewafai.”

Ufa faifaina i ve'ikwayekwayega

¹² Tutuyanina 'waineye Aisake yana waifei i bakuli malamalanina 'waineye. 'Aile'wa 'ana tutuye bwaikaotogina i 'idewai tutuya 100 ma 'ana 'imoso'i i veluagai fai 'AUVEA i vesauluva 'atumaina 'waineye.

¹³ Tomogonina i ve'ai'aiwabu bwaikina, yana 'ai'aiwabunidi i vebwaika-'afo'afo tamu tove'ai'aiwabu .

¹⁴ Yana sifi, goti, bulumakau wata yana tofolovavo fuedi, begaidi me Filisitia i ve'unumagigi 'waineye.

¹⁵ Begaidi Aisake tamana Ebelamo yana tofolovavo ufa matatabuna i aladi tamana yana

tutuye, me Filisitia i maia fwayafwaya 'wainega i tavunidi i lala.

¹⁶ Mulieta Abimeleki Aisake i voneni 'awalawa de'e i na 'iaweni i na nago tamu 'awalawa 'waineye i vo, 'Omu 'u vetoketoke-'iawema 'awalawa de'e 'waineye.”

¹⁷ Bega Aisake i tovoi i nago Laube'u Gelai 'waineye bei i mia.

¹⁸ Tamana yana tutuye ufanidi i aladiga me Filisitia i tavunidi tutuyanina Ebelamo i wafa. Aisake ufanidi i ala-vaituganidi wata 'adi wagava tamana i golediga i veledi.

¹⁹ Mulieta Aisake yana tofolovavo tamu ufa-luluvuala i veluagai Laube'u Gelai 'waineye.

²⁰ Siwe me Gelai sifi 'adi to'isave'avinavo i maia ufa-luluvuala faifaina i vona i vo, Ufanina 'asa'aiana 'ima 'ama ufa.” Begaidi Aisake yana to'isave'avinavo taiadi i ve'ikwayekwayega, bega Aisake ufanina i goleni Eseki, 'ana saivila Ve'ikwayekwayega.

²¹ Mulieta Aisake yana tofolovavo wata tamu ufa i alai, bei wata i ve'ikwayekwayega faifaina, bega Aisake ufanina i goleni Sitina, 'ana saivila Ve'idi'idi.

²² Bega Aisake i tovoi i nago wata tamu ufa i alai, bei kebu tamu aitoi i da ve'ikwayekwayega faifaina. Bega 'ana wagava i goleni Leobota, 'ana saivila, 'Awasasa Yavuyavuna, fai i vo, 'Akonadi 'AUVEA 'awasasa bwaikina fwayafwayanina i veleda bei ta na folofolova wata ta na miamia.”

²³ Mulieta Aisake 'atamananina i 'iaweni i nago 'atamana Biasiba.

²⁴ Lovananina 'waineye 'AUVEA i souyeni 'waineye i voneni i vo, Yau tamamu Ebelamo

yana Yaubada. Kebu 'u na kolologa fai yau 'amu 'weabu, a na vesauluva 'atumaina 'waimuye wata 'amu wauma i na vefue. Naninidi faifaidi basenadi a vona'awaufaufa yaku tofolova Ebelamo 'waineye, wata a na 'idewai 'waimuye.”

²⁵ Bei Aisake 'eba velomu i 'idewai 'AUVEA 'waineye i 'odu i subiai. Wata yana vanuga naya i vetovoia mulieta yana tofolovavo tamu ufa 'ivauna i alai.

Aisake yana veakutagona i 'idewai Abimeleki taiadi

²⁶ Tamu tutuya Kini Abimeleki ma yana toawave'eda'eda Ausadi wata yana tolugavia 'adi to'edakumeta Faikoli taiadi i maia Gelai 'waineye.

²⁷ Aisake Kini Abimeleki i velutolieni i vo, Awale 'wa mai 'waikuye, fai bagase 'wa nuasakoyeku wata 'wa veugeugeku yami 'awalawayega?”

²⁸ To'edakumetanidi yana vona i tutuli i vo, 'A 'asetai mogitana 'omu 'AUVEA 'amu 'weabu, begaidi 'a mai nuanuama 'a na vona'awaufaufa 'waimuye, bega yada veiana wata yada veakutagona ta na 'idewai.

²⁹ Bega 'asiau nuanuama 'u na vona'awaufaufa 'waimeye kebu tamu nani sakoina 'wa na 'idewai 'waimeye. Wata 'ima bani'odi bagase kebu tamu nani sakoina 'a da 'idewai 'waimuye ma yama nuakalikali 'a 'isave'avinimu mulieta 'a vonemu 'u tauya. Begaidi 'asiau a 'aseti-atumaia 'omu mogitana 'AUVEA i vevesauluva 'atumaina 'waimuye.”

³⁰ Bega Aisake veakutagona 'ana sakali i 'idewai, ma fuedie i 'ani wata i yemu.

³¹ I 'atai 'awa'awaiogose yadi vona'awaufaufa toketokena i 'idewai bega kebu tamu aitoi i na vevesauluva-sako awasasadie. Mulieta Aisake i vetauyidi ma yadi nuaniwalova i nagoi vanuge.

³² 'Aiatanina 'waineye, Aisake yana tofolovavo ufa 'ivauna i alai faifaina i voneni i vo, 'Ima ufa 'a veluagai."

³³ Bega Aisake ufanina i goleni Siaba, 'ana saivila 'Eba Veakutagona. Tutuyanina 'wainega i mai 'asiau 'ana wagava i golegoleni Biasiba, 'ana saivila Ufanina 'Waineye Yadi Veakutagona I 'idewai.

³⁴ Tutuyanina Iso 'ana malamala 40 i veluagai, vevine 'adi 'ailuga i na nagidi me Aiti 'waidiega. Vevinenidi 'adi wagava Iudita, Beeli natuna wata Basemati, Elona natuna.

³⁵ Siwe tutuyanina 'waineye Iso yana vevinevo yadi vesauluva-sako 'wainega Aisake wata Libeka i 'ivelogilogidi.

27

Iso tubu'edakumeta 'ana 'anivelena Iakobo i vinagoi

¹ Tutuyanina 'waineye Aisake 'akonadi i ve'auvea-'afo'afo matana i sako. Bega natuna tubu'edakumeta Iso i goleni i mai i voneni i vo, Natuku." Iso i vo, Tamaku, yau side."

² Aisake i vo, Yau 'akonadi a ve'auvea-'afo'afo, kebu a da 'asetaiiga ma'avia a na wafa.

³ Yamu 'eba yaubani tufu 'u na 'ewadi, 'u na nago wala'aie tamu 'aisaya faifaiku 'u na loveni.

⁴ 'Aku'aku 'u na 'idewai 'u na mieni 'waikuye a na 'ani, i na 'a'avana a na velu'ui 'AUVEA 'waineye

i na vesauluva 'atumaina 'waimuye wata
tubu'edakumeta 'amu 'anivelena 'waikuyega 'u
na 'ewai, mulieta a na wafa.”

⁵ Aisake i veifufu natuna Iso 'waineye Libeka i
vivinenegeni. Tutuyanina Iso i tauya wala'aie
'aisaya yaubani faifaina,

⁶ Libeka i vona natudi Iakobo 'waineye i vo, 'A
na vonemu. Bagase tamamu i veifufu Iso
'waineye i vo,

⁷ Tamu 'aisaya wala'aiega 'u na mieni, 'aku'aku
'u na 'idewai a na 'ani bega a na velu'ui faifaimu
'AUVEA mataneye mulieta a na wafa.’

⁸ Natuku, yama veifufu 'u na nogayadewai
bega ava'ai 'a na vonemuga 'u na 'idewai.

⁹ Nuanuaku 'u na nago 'aisaya yadi
vadabaweye goti siaidi 'ailuga 'atumaide 'u na
miedi 'waimeye, bega 'ani'ani 'iwanina a na
'idewadewadi tamamu yana nuanua bani'odi.

¹⁰ Mulieta 'ani'ani 'u na naweni tamamu
'waineye i na 'ania, nika bei i na velu'ui faifaimu i
na vevesauluva-'atumaina 'waimuye mulieta i na
wafa.”

¹¹ Iakobo inana Libeka i vonedi i vo, 'Wa na
'asetai tataku Iso tomogo 'olo'olona, we'e yau
tomogo 'atumaina.

¹² 'Ai'edi tamaku i na 'abitonoviku, bega i na
'asetai yau a vevekali 'ako kebu 'ana fata i na
vona-nuakalikaliaku, we'e mogitana i na
awavesakoyeku.”

¹³ Siwe inana bonana i tutuli i vo, Natuku,
awavesakonina i da mai 'waimeye, yau
vematavuloga 'a na tovoieni. Ava'ai 'a na

vonemuga, 'u na vematayakeyakeni 'u na nago goti 'u na miedi.”

¹⁴ Bega Iakobo i nago goti natudiavo i miedi inana i veledi, mulieta Libeka 'ani'ani 'atumaina wata 'iwanina i 'idewai Aisake yana nuanua wata yana 'eba sosoana bani'odi.

¹⁵ Mulieta Libeka Iso 'ana talauma 'atumaidi i mieni vanugayega, Iakobo i veleni.

¹⁶ Nimana wata 'odona i baniumadi goti vutuvutudi 'waidiega.

¹⁷ I 'a'avana, Libeka 'ani'ani 'atumaina wata 'iwanidi beledi i kabunidiga taiadi Iakobo i veleni.

¹⁸ Bega Iakobo 'ani'aninina i mieni tamana i veleni i vo,

Tamaku” Aisake i vo, Natuku, we'e 'omu aitoi, Iso 'alo Iakobo?”

¹⁹ Iakobo i vo, Yau yamu tubu'edakumeta Iso, yamu nuanua a vematayakeyakeni. 'Aisaya side a mieni 'waimuye. 'U 'isa, 'u miabui 'u 'ani bega yamu vona-nuakalikali 'u na veleku i na vevesauluva 'atumaina 'waikuye.”

²⁰ Aisake natuna i velutolieni i vo, Natuku, bani'odi 'u munega bega 'aisaya 'u veluagai, 'u le'wa-matayo'o?”

Iakobo i vo, 'AUVEA yamu Yaubada i 'ivaiseku nika yaubani 'atumaina a 'idewai.”

²¹ Mulieta Aisake Iakobo i voneni i vo, Nuanuaku 'u na mai lilivakuye a na 'abitonovimu bega a na 'asetai 'omu mogitana Iso 'alo aitoi?”

²² Bega Iakobo i vaganago tamana i 'abitonovi i vo, Bonamu Iakobo 'ana nogaya bani'odi, we'e nimamu 'wa da vo Iso nimana.”

²³ Siwe Aisake Iakobo kebu i da 'isa'innanai, fai Iso nimana 'olo'olona. Begaidi Aisake i 'idewadewa Iakobo i na vesauluva 'atumaina 'waineye.

²⁴ Nika i velutolieni i vo, 'Omu mogitana natuku Iso?" I vo, 'Asa'aiana yau."

²⁵ Bega Aisake i vo, Natuku, 'aisayanina 'u mieni a na 'ania nika yaku vona nuakalikali a na velemu." Iakobo tamana Aisake 'ana'ana i veleni i 'ani wata oine i yemu.

²⁶ Mulieta Aisake Iakobo i voneni i vo, Natuku, 'u mai lilivakuye 'u 'avalamaigiku."

²⁷ Bega Iakobo i nago tamana lilivaneye i 'avalamaigi, Aisake 'ana talauma i yaogi nika i awavemogitaneni, bega i velu'ui natuna faifaina i vo, 'AUVEA i da i vesauluva 'atumaina 'waimuye, magaimu yaoga 'atumaotogina 'wa da vo tamu 'aisaya wala'ai magaina bani'odi.

²⁸ Nuanuaku Yaubada numula abamayega wata fwayafwaya 'ai'aiwabuna 'wainega, 'ani'ani wata oine 'atumaide i da velevelemu.

²⁹ Nuanuaku tomotoga 'adi 'aila'a tulina tulina i da vetofolova wata i da 'odu'odu 'waimuye.

Nuanuaku tatamwavo, matatabudi 'u da veveimeyedi

we'e inamu natudiavo ma yadi ve'ililibu i da 'odu'odu 'waimuye.

'Ai'edi aitoi i na awavesakoyemu, kumanidiavo i da awavesakoyedi.

We'e aitoi i da vesauluva 'atumaina 'waimuye, Yaubada wata i da vesauluva 'atumaina 'waidie."

³⁰ Aisake yana vona-nuakalikali Iakobo
'waineye i ve'a'ava i tauya nika Iso i le'wa
wala'aiega

³¹ Iso 'ani'ani 'atumaina i 'idewai i mieni
tamana 'waineye, i voneni i vo, Tamaku, 'u tovoi
'u miabui 'aisaya mieniga 'u 'ania bega 'u na
vesauluva 'atumaina 'waikuye."

³² Nika Aisake i velutolieni i vo, 'Omu aitoi
tomogoga?" Iso i vo, Yau natumu yamu
tubu'edakumeta, Iso."

³³ Aisake yawaina i lovoga i vo, Vetuma aitoi
'aisaya i veleku a 'ani, wata faifaina a velu'ui
Yaubada 'waineye i na vesauluva 'atumaina
'waineye? A vona mogitana
vona-nuakalikalinina i na 'eno-vagata."

³⁴ Tutuyanina Iso tamana yana vona i nogai i
toke i taibwaubwau i vo, Tamaku, we'e yau
bani'odi? Nuanuaku wata 'u na vesauluva
'atumaina 'waikuye."

³⁵ Siwe Aisake i vo, Taimu vekaliega 'amu
vona-nuakalikali i 'ewai."

³⁶ Iso i vo, 'Ana wagava Iakobo 'ana 'asete
Tovekali, fai 'akonadi tutuya 'ailuga i vekalieku.
Nagami tubu'edakumeta 'aku veuveuta i 'ewai,
we'e 'asiau 'aku vona-nuakalikali i 'ewai. I
lubwaineni 'u da vesauluva 'atumaina 'waikuye,
tamu 'amu veuveuta 'wainega 'u da veleku."

³⁷ Aisake i vona Iso 'waineye i vo, Yau Iakobo a
venua'ivineni i na vetoveimea 'waimuye wata
enavo matatabudi a vonedi i na
vetofolova-maimaiga 'waineye. Wata a
vona'awaufaua 'waineye 'ani'ani wata oine
bwaikina faifaiddi a veleni. Natuku, mogitana

kebu tamu luvegalala i da 'eno'eno bega a na velemu.”

³⁸ Siwe Iso i vo, Tamaku, 'ai'edi vona-nuakalikali 'aitamogana 'wainega 'u da vesauluva 'atumaina 'waikuye? Yau wata nuanuaku 'u na vesauluva 'atumaina 'waikuye, tamaku.” I vona'a'ava nika Iso i taibwaubwau.

³⁹ Tamana Aisake i voneni i vo, Yamu mia matatabuna 'waineye fwayafwaya yana 'ai'aiwabu 'wainega 'u na mia 'ani'ie, wata numula abamayega kebu 'u na veveluagai.

⁴⁰ Yamu mia matatabuna kefata 'u na vevefoloveni we'e taimu 'waineye 'u na vetofolova-maimaiga.

Siwe tutuyanina 'u na vo, A na 'etoyavuku,' yana veimea 'u na geuya bega 'u na nago.”

Iakobo i dega i nago 'awalawa Fadani-Lami

⁴¹ Fai tamadi Iakobo i vona-nuakalikalieni begaidi Iso taina i vedumwe'ai'aieni. Bega Iso i velamu yana nuanuayega 'eda'eda i 'idewadi i vo, Nagami tamaku yawaina i na 'a'ava a na mogaia, mulieta Iakobo a na luvewafai.”

⁴² We'e Libeka vala i nogai Iso yana nuanua faifaina bega vala i vetunei Iakobo i mai i voneni i vo, 'U na vainenega, Iso 'amu luvewafa 'ana 'eda i 'idewai bega 'ana mewa i na 'ewai.

⁴³ Natuku, 'a na vonemu 'u na 'idewadewa, bega 'u na dega 'u na nago Elana novuku Lebani 'waineye.

⁴⁴ Taiadi 'wa na miamia 'ana tugusa tatamu yana nuasako i na 'a'ava.

⁴⁵ Tutuyanina nuana i na ve'atamai, wata ava'ai 'u 'idewai 'waineye nuana i na fani, mulieta vala a na vetunei 'u na mai. Ava'ai faifaina 'ami 'ailuga 'wa na wafa 'aiata 'aitamogana 'waineye?"

⁴⁶ Mulieta Libeka Aisake i voneni i vo, Yau a 'abiawa me Aiti vevine yadi sauluva 'waidiega. 'Ai'edi Iakobo i na nagi tamu vavine Aiti 'wainega, a nuani voke sauluvanina 'wainega a na wafa."

28

Aisake Iakobo i vona-nuakalikalieni

¹ Mulieta Aisake Iakobo i goleni i mai bega i vona-nuakalikalieni wata i awave'ede'edeni i vo, Kebu me Kenani vevine 'waidie 'u na nagiga.

² We'e 'u na nago 'awalawa Fadani-Lami 'waineye taunimu tubumu Betueli yana 'aila'a 'waidie, bei avumu Lebani natuna vevinena 'waidiega tamu 'u na nagia.

³ Yaubada Toketokeotogina i da vesauluva 'atumaina 'waimuye wata kwakwama fuedi i na velemu, we'e tubumwavo i na vefue bega 'waidiega 'aila'a fuedi wata bwaikidi i na souyedi.

⁴ Yaubada i vesauluva 'atumaina tubumu Ebelamo 'waineye wata bani'odi i da vesauluva-'atumaina 'waimuye nika i da damana 'amu wauma 'waidie. De'e fwayafwayanina Yaubada Ebelamo i veleni, tutuya de'e bei 'omu 'u vewakawakaga, 'awaie 'awalawanina 'u na ve'itulamuyeni."

⁵ Bega Aisake Iakobo i voneni i tauya, i nago 'atamana Fadani-Lami, bei i miamia avuna Lebani 'waineye, taunina Libeka novudi, Betueli natuna tomogo Alami 'ana wauma 'wainega.

⁶ Iso i 'asetai basenadi tamana Aisake Iakobo i vona-nuakalikalieni wata i vetunei i nago 'atamana Fadani-Lami 'waineye vavine tamu i na vagavaia faifaina. Wata i 'asetai tamana Iakobo i velu'ase'asei i vo, Kebu 'u na nagi me Kenani veyine taiadi.”

⁷ We'e Iakobo tamana wata 'inana yadi veifufu i vematayakeyakeni bega i nago 'atamana Fadani-Lami.

⁸ Fai Iso 'akonadi i 'asetai tamana kebu nuanua Kenani 'ana vevinevo taiadi i na nagi

⁹ bega i nago tamana iana Isimeli yana 'aila'a 'waineye i nagi yana vevinevo 'adi 'imoso'i. Yana vavine 'ivaudi i nagidi 'adi wagava Malati, taunidi Ebelamo tubuna Isimeli natuna we'e Nebeiota novuna.

Iakobo i 'enoneganega Bedeli 'waineye

¹⁰ Iakobo i tauya Biasiba 'wainega i nunago Elana.

¹¹ Tutuyanina inala i simwanuya i le'wa tamu 'awalawa 'waineye bei i vebae'wa, fai 'akonadi i lovani. Iakobo kileu i 'ewai i 'unugaloyeni i 'enova.

¹² I 'eno'enova nika i 'enoneganegayega, i veni wanala bababana wata 'atumaina fwayafwayayega i laka abame. Yaubada yana anelosevo i lakalaka wata i obuobuma walanalana 'waineamo.

¹³ Tabwaneye 'AUVEA i tovo tovoi i voneni i vo, Yau 'AUVEA, tubumu Ebelamo yana Yaubada wata tamamu Aisake yana Yaubada. Fwayafwayanina bei 'u 'eno'enoga a na 'aniveleneni 'omu wata tubumwavo 'waimie 'wa na ve'itulamuyeni.

¹⁴ 'Awaie tubumwavo i na vefue lu'iawawa-wayoga, wala'ai 'ana 'ilukulukuta bani'odi. 'Wa na yavula 'wa na nagoi 'awalawa fuedi 'waidie, bani'odiga 'ifwaimi inala yana 'eba inivayega, 'ifwaimi inala yana 'eba lakayega, 'ifwaimi yavalatayega wata 'ifwaimi bolimanayega. Tomia fwayafwaya matatabudi 'adi 'aila'a tulina tulina yadi 'atumaina i na veluagai 'omu wata tubumwavo 'waimiega.

¹⁵ Yau 'omu taiadi a na ve'isabodebodemu, ava'aibe 'u na nagoga, yau a na vevilamu 'u na mai de'e fwayafwayanina 'waineye. Kebu a na 'iawemuga, we'e mogitana ava'ai a vona'awaufaufaga a na 'idewai 'waimuye."

¹⁶ Tutuyanina Iakobo 'enovayega i tovoi i vo, Mogitana 'AUVEA de'e 'awalawanina 'waineye i miamia siwe kebu a da 'asete-'atumaiaaga."

¹⁷ Iakobo i kololo bega i vo, De'e 'awalawanina 'eba nuavogana, Yaubada yana vanuga, 'asa'aiana abama 'ana 'eba luku."

¹⁸ I'atai, 'awa'awaiogose Iakobo i tovoi, kileunina 'wainega i 'unugaloga i 'ewai, i vetovoia nika ma yana ve'ililibu bunama i 'ewai i iwagi yana 'eba nuave'avina faifaina.

¹⁹ Iakobo 'awalawanina 'ana wagava i goleni Bedeli,* we'e nagami 'ana wagava Losi.

28:13: Nag 13:14,15 **28:14:** Nag 12:3; 22:18 * **28:19:** Bedeli 'ana 'asete, *Yaubada yana Vanuga*.

20-21 I 'a'avana, Iakobo vona'awaufaufa toketokena i 'i'idewai 'AUVEA 'waineye i vo, 'Ai'edi 'u na ve'isabodebodeku yaku nago 'waineye, 'ai'edi 'ani'ani wata kaleko 'u na veleveleku wata 'ai'edi a na vilaku ma yaku 'atumaina tamaku yana vanuge, 'omu mogitana yaku Yaubada.

22 De'e kileunina a vetovoia yama 'eba nuave'avina, bei tomotoga ma yama ve'ililibu 'a na 'odu'odu 'waimuye. Nani matatabuna 'u na veleku, a na 'idia 'etokwau 10 a na yatodi we'e kwau 'aitamogana a na 'aniveleneni 'waimuye."

29

Iakobo i nago 'awalawa Fadani-Lami

¹ Mulieta Iakobo i tauya i nago i le'wa tomotoganidi i miamiani inala yana 'eba laka 'waineye.

² 'Ani'ieyega tamu ufa i 'iseni, 'awana lilivaneye 'aisaya sifi wata 'aila'a 'aitonu i 'ufobala i 'eno'enovi, nuanuadi tamu aitoni na yemudi wata i na vetoadi. Siwe ufanina awana kileu bwaikina 'wainega i vetubodai.

³ Tutuyanina 'aisaya matatabuna i na le'wai, kileu bababana i na 'ewayavuleni bega 'aisayanidi i na yemu, mulieta kileu i na vevilai ufanina 'awana i na vetubodai.

⁴ Bega Iakobo sifi 'adi to'isave'avinavo i velutoliedi i vo, Ekwavo, 'omi ava'aiega 'wa maia?"

I vo, 'Ima me Elana."

⁵ I velutoliedi i vo, We'e tamu tomogo 'wa 'asetai 'ana wagava Lebani, Naoli tubuna?" Yana velutoli i tutuli i vo, E'e 'a 'asetai."

⁶ Iakobo i velutoli i vo, 'Wa da 'asetai 'atumaina?" Nika i vo, E'e 'atumaina, 'u 'isanago natuna Litieli i mimai yana sifi taiadi."

⁷ Wata Iakobo i vo, Bola inala bwaikina kebu i da lubwaineni 'aisaya 'wa da siaugidi. We'e 'aisaya 'wa da vetoadi bega i da viladi wala'aie."

⁸ I voneni i vo, Kebu 'ama fata 'aisaya 'ana vetoadi 'ana tugusa matatabuna i na le'wai, mulieta to'isave'avinavo kileu bababana 'ana vetoviboda i na sibaleni mulieta 'aisaya 'a na vetoadi."

⁹ Iakobo bola i veveifufu tomotoganidi taiadi, nika Litieli i le'wa tamana yana sifi taiadi, fai kumanina 'aisaya 'adi to'isave'avina.

¹⁰ Tutuyanina Iakobo Litieli 'iseni avuna Lebani natuna, yana 'aisaya sifi i le'wedi ufa 'awana 'ana tutuboda i ketoi, bega yana 'aisayavo i vetoadi.

¹¹ Iakobo Litieli i 'avalamaigi i yaogi nika i taibwaubwau.

¹² Iakobo i veifufu nibaina Litieli 'waineye, Iakobo tamana yana 'aila'a Libeka natudi. Bega Litieli i lilide i nago i veifufu tamana Lebani 'waineye.

¹³ Tutuyanina Lebani vala i nogai Iakobo i mai, i lilide i nago i yogo'ede'edeni, i 'avalamaigi i yaogi wata i voneni taiadi i nago yana vanuge. Mulieta Iakobo taunina faifaina i veifufu avuna yana 'aila'avo 'waidie.

¹⁴ Bega Lebani i voneni i vo, 'Omu mogitana dayagiku wata yaku 'aila'a."

Iakobo Lea wata Litieli i nagi

Iakobo i miamia Lebani taiadi weta'i 'aitamogana i 'a'ava.

¹⁵ Bega Lebani i voneni i vo, 'Omu wata yau 'ida 'aila'a 'aitamogana, kebu i da lubwaineni 'u na vetofolova-maimaiga 'waikuye. Nuanuaku 'u na voneku yamu folova 'ana tutula."

¹⁶ We'e Lebani natunavo vevinedi 'adi 'ailuga, tulaina 'ana wagava Lea, we'e bwasiona 'ana wagava Litieli.

¹⁷ Lea matana mweadi, we'e Litieli 'ana 'isa 'atumaivotogina wata ma 'ana magisisi.

¹⁸ Iakobo Litieli i toke nuakalikalieni bwaikina begaidi tamana i voneni i vo, Yau a tauyeku a na folofolova malamala 7 nagedie, 'ai'edi natumu bwasiona Litieli 'u na veleku taiadi 'a na nagi."

¹⁹ Lebani i vo, 'Atumaina, yau a na velemu, kebu nuanuaku tomogo tulina a na veleni. 'U na miamia de'e bei taiadi ta na folofolova."

²⁰ Bega Iakobo i folofolova malamala 7 nagedie Litieli tuveobu faifaina. Fai Litieli i toke nuakalikalieni bwaikina, avinodi malamala fuedi Iakobo 'waineye 'wa da vo 'aiata kebu fuediga.

²¹ Tutuyanina yana 'abivaivai 'ana malamala i veluagai nika Iakobo Lebani voneni i vo, Nuanuaku yaku vavine 'u na veleku taiadi ta na veluaga."

²² Bega Lebani tomotoga matatabudi 'atamananina 'ana tomia i vonedi i maia, nagi 'ana sakali i 'idewai.

²³ Siwe lovananina 'waineye dudubale Lebani Lea i naweni Iakobo 'waineye taiadi i 'eno.

²⁴ We'e Lebani yana tofolova vevinena 'ana wagava Silifa i 'aniveleneni Lea 'waineye yadi tofolova.

²⁵ Tutuyanina Iakobo 'awa'awaiogose i tovoi nika Lea i 'iseni. Lebani i velutolieni i vo, Ava'ai faifaina naninina 'u 'idewai 'waikuye?" Bega Iakobo i nuasako Lebani 'waineye i vo, Malamala 7 nagedie a folofolova Litieli faifaina, awale 'u vekalieku?"

²⁶ Lebani i vo, Yada sauluva nagi faifaina kebu bwasiona i da nagi matayo'o mulieta tubu'edakumeta.

²⁷ Nuanuama nagi 'ana sakali wiki 'aitamogana i na 'a'ava, mulieta Litieli 'a na veleumu. Wata Litieli faifaina 'u na folofolova malamala 7 nagedie."

²⁸ Bega Iakobo i awave'atumaieni. Iakobo Lea i nagia taiadi i miamia wiki 'aitamogana i 'a'ava, mulieta Lebani Litieli Iakobo i veleni.

²⁹ Lebani tamu tofolova vevinena 'ana wagava Bilani Litieli i veleni i na vetofolova 'waineye.

³⁰ Mulieta Iakobo Litieli taiadi i 'eno, fai kumanina i nuakalikalienu bwaikina we'e Lea sai'afo. I 'a'avana i miamia wata i folofolova Lebani 'waineye malamala 7 nagedie.

Iakobo natunavo fuedi

³¹ Tutuyanina'AUEA Lea i 'isedi kebu 'adi nuakalikaliga, bega uwmadi i 'ive'atumaia nika 'adi fata i na venatuna, we'e Litieli i kakala kebu 'adi fata i na miana.

³² Bega Lea i miana i venatuna, natudi iavetana i tubuga i goleni Lubeni, fai i vo, 'AUEA 'ama vita i 'iseni, begaidi tutuya de'e yama lamoga i na nuakalikaliema."

³³ Wata Lea i miana natudi iavetana i tubuga i goleni Simioni, fai i vo, 'AUVEA bonama i nogai fai kebu 'ama nuakalikaliga, begaidi tamu kwamana i velema.”

³⁴ Wata 'ana vetonu i miana i venatuna natudi iavetana i tubuga. I goleni Livai fai i vo, Tutuya de'e ma'itufa yama lamoga i na sosoanema yana nuakalicali 'wainega fai natunavo 'adi 'aitonu a venatunedi.”

³⁵ Wata i miana nika i venatuna natudi iavetana i tubuga, i vo, Tutuya de'e 'AUVEA a na subiai.” Bega natudi 'ana wagava i goleni Iuda. Nika i 'ailove, kebu wata i da vevenatuna.

30

¹ Tutuyanina Litieli i 'asetai kebu Iakobo tamu natuna i da venatuneni, begaidi tatadi Lea i ve'unumagigiedi. Iakobo i voneni i vo, Nuanuama kwakwama 'u na velema, 'ai'edi kebu, a na wafa.”

² Iakobo i nuasako-'afo'afo Litieli 'waidie i vo, 'Wa da 'asetai yau Yaubada bani'odi 'wa veifufuyedi 'waikuye? Yami venatuna i ve'ilovei wata yami kakala kumanina 'aisena 'ana toveimea, yau kebu.”

³ Bega Litieli i voneni i vo, Nuanuama yama tofolova vevinena Bilani 'u na vagavaidi taiadi 'wa na veluaga, bega kwakwama i na venatunedi yau faifaima 'wainega 'ama 'aila'a i na vefue.”

⁴ Bega Litieli yadi tofolova vevinena 'ana wagava Bilani i 'aniveleneni Iakobo yana vavine i nagidi, nika taiadi i 'eno.

⁵ Mulieta Bilani i miana i venatuna, kwamana iavetana.

⁶ Litieli kwamana i goleni Dani fai i vo, Yaubada yama nuanua i awave'atumaeni wata yama velu'ui i nogai, begaidi natuna iavetana i velema.”

⁷ Mulieta Litieli yadi tofolova Bilani i miana wata i venatuna, Iakobo natuna 'ana veluga i tubuga.

⁸ Litieli natudi i goleni Nafitalai fai i vo, Tatakua taiadi a toke 'a vevetalaga, nika a vevetoketoke.”

⁹ Tutuyanina Lea i 'asetai 'akonadi venatuna 'wainega i 'ailove begaidi yadi tofolova vevinena 'ana wagava Silifa Iakobo yana vavine i veleni taiadi i nagi.

¹⁰ Mulieta Silifa i venatuna kwamana iavetana i tubuga.

¹¹ Lea natudi i goleni Gada, fai i vo, Mogitana ma yama sosoana.”

¹² Mulieta Silifa i venatuna Iakobo natuna iavetana 'ana veluga i tubuga.

¹³ Lea natudi 'ana wagava i goleni Asa, fai i vo, 'Eba sosoana mogitana 'waimeye, tutuya de'e vevine i na vonema taiadi 'a na sosoana.”

¹⁴ Tamu 'aiata witi 'ana 'aile'wa 'ana tutuye Lubeni tamu welavi maniduleke* i veluagadi i miedi inana Lea i veledi. Bega Litieli i vonedi i vo, Nuanuama natumu yana maniduleke 'wainega 'wa da velema.”

¹⁵ Nika Lea ma yadi nuasako i vonedi i vo, 'Omi 'asa'aiana yama lamoga 'wa eloma, awale wata nuanuami natuku yana maniduleke 'wa na 'ewadi?”

* **30:14:** Tomotoga yadi nuanua i vo 'ako vevine *maniduleke vuagina* i na 'aniaga i na 'ivaisedi nika i na miana wata i na venetuna.

Nika Litieli i vo, 'Atumaina, 'ako lovane Iakobo 'a tauyeni taiadi 'wa na 'eno, natumi yana maniduleke vuagina tutulina."

¹⁶ I lavia nika Iakobo i vilai i mimai talagayega, nika Lea i nago Iakobo i yogo'ede'edeni i voneni i vo, 'Ako lovane taiadi ta na 'eno, fai natuku yana maniduleke vuagina 'wainega a kimwanei." Bega lovane Iakobo taiadi i 'eno.

¹⁷ Yaubada Lea yadi velu'ui i nogai bega i miana wata i venatuna, mulieta Iakobo natuna 'ana ve-5 i venatuneni.

¹⁸ Lea natudi 'ana wagava i goleni Isaka, fai i vo, Yaubada 'akonadi yama tutula i velema fai yama tofolova 'a veleni yama lamoga taiadi i nagi."

¹⁹ Mulieta Lea i miana wata i venatuna, natudi 'ana ve-6 i venatuneni Iakobo faifaina.

²⁰ Kwamana i goleni Sebuloni fai i vo, Yaubada 'akonadi tutula 'atumaina i velema, begaidi tutuya de'e yama lamoga i na ve'ililibuyema, fai natunavo iavetadi 6 a venatunedi faifaina."

²¹ Mulieta i venatuna natudi vevinena i tubuga 'ana wagava i goleni Deina.

²² Mulieta Yaubada Litieli i nuave'avinidi 'adi vita 'wainega begaidi yadi velu'ui i nogai, umwadi i 'ive'atumaia nika i venatuna.

²³ Bega i miana i venatuna natudi iavetana i tubuga i vo, Yaubada 'akonadi 'ama awavesako i 'ewayavuleni, kebu wata 'a na bunumayaga yama mia 'waidie."

²⁴ Kwamana i goleni Iosefa fai i vo, A vevelu'ui faifaina, nuanuama 'AUVEA natukwavo i da 'imoso'ieni wata yama 'aila'a i da vefue."

Iakobo yana 'ai'aiwabu i vebwaika-'afo'afo

²⁵ Tutuyanina Litieli Iosefa i venatuna, Iakobo i vona Lebani 'waineye i vo, 'U da tauyeku bega a da nago yaku 'atamane wata yaku 'awalaweye.

²⁶ Yaku vevinevo wata natukwavo taiadi 'a na nagoi, yaku folova 'ana tutula faifaidi. 'Asa'aiana 'akonadi 'u 'asetaku yaku folova toketokena faifaina, bega 'u na tauyeku a na nago.”

²⁷ Lebani Iakobo i voneni i vo, 'U vainenega. A 'asetai 'AUVEA i vesauluva 'atumaina 'waikuye 'omu 'waimuyega, bega a ve'ai'aiwabu.

²⁸ 'U na voneku 'amu tutula matatabuna 'ana vebwaika bega a na tutulidi.”

²⁹ Iakobo i vo, 'Akonadi 'u 'asetai ma yaku tokemaiga a folofolova 'waimuye wata yamu 'aisayavo sifi, goti wata bulumakau a 'i'isave'avinidi bega i vefueotoga yaku 'isave'avina 'wainega.

³⁰ Basenadi 'aisemi 'wa miamia nani matatabuna kebu i da vebwaika, we'e 'asiau 'akonadi i vebwaika-'afo'afo. Fai yaku folova 'waidie 'AUVEA i vevesauluva 'atumaina 'waimuye wata yamu folova i 'imoso'ieni. We'e yau 'asiau bani'odi? Ava'ai tutuyaga a na velamu yaku 'aila'a faifaidi folova 'ifwaidi a na 'idewadi?”

³¹ Wata Lebani i velutolieni i vo, Ava'ai nuanuamu a na velemu?”

Iakobo i vo, Kebu tamu ava'ai 'u na velekuga siwe nani 'aitamogana yaku nuanua 'u na 'idewai, 'u da tauyeku yamu 'aisayavo a da 'i'isave'avinidi.

³² Yaku nuanua side, 'asiau yamu 'aisayavo a na 'ididi, sifi bwaikidi wata sifi siaidi, goti bwaikidi wata goti siaidi lu'abwa'abwaudi wata

'wau'wauga'avadi 'aitamogana 'aitamogana 'u na veleku. 'Asa'aiana 'aku tutula nonogina.

³³ Nika 'awaie 'ada fata 'aisayanidi 'adi 'isa 'wainega ta na 'isa'ididi, bega ta na 'asetai aitoi mogitana 'wainega i folofolova wata aitoi kebu. 'Aisaya 'adi saba i na ve 'waideye, 'ai'edi lu'abwa'abwaudi wata 'wau'wauga'avadi 'a na 'isedi 'omu yamu vi'ai 'waineye, 'ana 'asetai 'omu vinagodi, we'e tomogo'avadi wata kebu lu'abwa'abwaudi wata 'wau'waugidi yaku vi'ai 'waineye 'u na 'isedi yau a vinagodi."

³⁴ Lebani i vo, 'Atumaina, ava'ai 'u voneyeniga ta na 'idewai."

³⁵ Bega 'aiatanina 'waineye Lebani i nago goti iavetadi, goti vevinedi wata 'avu'avudi, wata sifi 'avu'avudi i va'augidi, matatabudi i 'anivelenedi natunavo i na 'i'isave'avinidi.

³⁶ Bei Iakobo i miamiaga i tauya i nago 'ana vemanawe 'aiata 'aitonu. We'e Iakobo i miamia Lebani yana 'aisaya 'ifwaidi i 'isave'avinidi.

³⁷ Mulieta Iakobo welavi 'ifwaidi yauyauvidi dididi i kinidabadi bunudi i 'welidi bega sai'afo 'avu'avuna we'e sai'afo yamoyamoina taiadi i wanadi. Welavinidi 'adi wagava fofila, alimonidi wata feleini.

³⁸ I 'a'avana dididi 'weli'welidi i luyavuyavuledi 'aisaya yadi 'eba yemu nagedie bei sifi i veve'alayemu.

³⁹ Tutuyanina i 'aibai welavi didi manawadie, i venatuna nika lu'abwa'abwaudi i venatunedi.

⁴⁰ Mulieta Iakobo sifinidi natudiavo i 'ivisidi Lebani yana 'aisaya 'waidiega. Tutuyanina yadi 'aibai 'ana tutuye Iakobo sifi tubuvauvaudi i vetovoidi i 'isanago lu'abwa'abwaudi wata

'wau'waugidi 'waidie. De'e bani'odi Iakobo i munega taunina yana 'aisaya 'adi 'aila'a i vefue we'e Lebani yana 'aisaya kebu i da vefue.

⁴¹ Tutuyanina sifi vevinedi toketokedi i na velamu 'aibai faifaina, Iakobo welavi dididi 'weli'welidi i yatoyatodi 'eba yemu nagedie 'aisaya manawadie. Nika welavi dididi lilivadie i 'a'aibai.

⁴² We'e sifi mweadi kebu i da mimaiedi 'eba 'aibai 'ana 'awasasa 'waineye. Begaidi sifi mweadi Lebani yana 'aisaya, we'e sifi toketokedi Iakobo yana 'aisaya.

⁴³ Bega Iakobo i ve'ai'aiwabu mogitana, fai yana 'aisayavo sifi wata goti, tofолоvavo iavetadi wata vevinedi, kameli wata doniki fueotogidi.

31

Iakobo i dega Lebani 'wainega

¹ Tamu tutuya 'waineye Iakobo i nogai Lebani natunavo i veveifufu i vo, Tamada yana kukua matatabuna Iakobo i 'ewadi i veveimeyedi. Wata yana kukuanidi 'waidiega i ve'ai'aiwabu.”

² Nika Iakobo i 'asetai Lebani yana vesauluva nagami 'atumaina we'e 'asiau i sivedamana.

³ Mulieta 'AUVEA Iakobo i voneni i vo, 'U na vilamu 'u na nago yamu 'awalaweye, tamamu, tubumu wata yamu 'aila'avo 'waidie, we'e yau 'amu 'weabu.”

⁴ Bega Iakobo Litieli wata Lea i vonedi i nagoi tamu 'awasasa 'waineye bei 'aisaya sifi i 'i'save'avinidi.

⁵ I vonedi i vo, A 'iseni tamami yana sauluva i vetuli 'waikuye, siwe tamaku yana Yaubada 'aku 'weabu i 'ivaiseku.

⁶ 'Akonadi 'wa 'asetai ma yaku tokemaiga a folofolova tamami faifaina.

⁷ Siwe tutuya fuedi vekaliega 'aku tutula i sisivedamanedi, siwe Yaubada kebu i da tauyeni bega veviga i na veleku.

⁸ We'e 'ai'edi i na vo, 'Aisayanidi lu'abwa'abwaudi 'amu tutula,' nika matatabudi i venatuna lu'abwa'abwaudi. Wata tutuyanina yana nuanua i vo, 'Aisayanidi lu'abwa'abwaudi 'alo luwanawanadi 'amu tutula,' nika matatabudi i venatuna luwanawanadi.

⁹ Begaidi tamami yana 'aisaya matatabuna Yaubada i 'anivelenedi 'waikuye.

¹⁰ Tamu 'aiata 'waineye 'aisaya yadi 'aibai 'ana tutuye a 'enoneganega, a 'iseni 'aisaya goti iavetadi i 'a'aibai vevinedi lu'abwa'abwaudi 'alo luwanawana taiadi.

¹¹ 'Aku 'enoneganega 'waineye Yaubada yana anelose i souyeni i voneku i vo, Iakobo,' yau a vo, Yau side.'

¹² Wata anelose i vo, 'U na 'isanago, goti iavetadi lu'abwa'abwaudi 'adi loi 'u na 'isedi, sifi vevinedi taiadi i 'a'aibai. 'U na 'isedi nika 'u na 'asetai, Lebani yana sauluva sakoina 'waimuye.

¹³ Yau Yaubada basenadi a souyeku 'waimuye 'atamana Bedeli 'waineye, bei kileu 'u vetovoa bunamayega 'u iwagi wata bei 'u vona'awaufaufa 'waikuye. Bega 'u na i 'idewadewa 'u na tauya 'awalawa de'e 'wainega, 'u na vilamu 'amu tuvadeye.' ”

¹⁴ Litieli wata Lea Iakobo yana vona i tutuli i vo, 'Asa'aiana 'atumaina, tamama yana 'ai'aiwabu matatabuna 'wainega 'ima kebu tamu 'ama veuveuta i da velemaga.

¹⁵ 'Ama veuveuta tamama yana 'ai'aiwabu 'wainega i vevilai i obu fai nani matatabuna wakawaka vevine 'waidie i nago. Wata tutuyanina i vekimwaneyemaga, maninina 'ana tutula 'u veleni natunavo faifaima i ve'amubwadodoyeni.

¹⁶ Tamama yana 'ai'aiwabu matatabuna Yaubada i velemuga, 'asa'aiana 'ima wata natumavo faifaima. Begaidi ava'ai Yaubada i vonemuga, 'u na 'idewai.”

¹⁷ Bega Iakobo yana vevinevo wata natunavo i dodoga kameli 'waidie.

¹⁸ Iakobo ma yana 'aila'avo i kumeta i nunagoi yadi 'aisaya matatabuna taiadi, wata nani 'ifwaidi i veluagadi 'atamana Fadani-Lami 'waineye. Mulieta Iakobo i 'idewadewa i tauya mulidie i nago 'awalawa Kenani, bei tamana Aisake i miamia.

¹⁹ Tutuyanina 'waineye Lebani i nago yana sifi vutuvutudiega i bobodi, Litieli tamadi yana vanuga 'adi kumaea i luku vanugayega i vinagodi.

²⁰ We'e Iakobo Lebani tomogo Alami i vekalieni, bega yadi tauya faifaina kebu i da veifufu 'waineye, givagivayega i degalovei.

²¹ Bega Iakobo yana kukua matatabuna i 'ewadi i tauya, Ufa Iufiletisi i damani i nagoi 'Oya Giliadi weyaginega.

Lebani Iakobo i sogieni

²² 'Aiata 'ana vetonu 'waineye, Iakobo yana dega valana Lebani i nogai.

²³ Bega yana 'aila'avo i vonedi Iakobo i yogo'waili i nagoga nika 'aiata 'ana ve-7 'Oya Giliadi 'waineye i veluagai.

²⁴ Tamu lovana 'waineye, Yaubada i souyeni Lebani tomogo Alami 'waineye, 'enoneganegayega i voneni i vo, Kebu tamu nani 'atumaina 'alo sakoina 'u na 'idewai Iakobo 'waineye."

²⁵ 'Oya Giliadi 'waineye Lebani Iakobo i veluagai, kebu 'ani'iega Iakobo yana vadavada 'wainega, bei Lebani yana vadavada i vetovoia.

²⁶ Bega Lebani i voneni i vo, Awale 'u vekalieku? Natukwavo vevinedi 'adi 'ailuga givagivayega 'u degedi 'u nunawedi, 'wa da vo tolugaviavo i da 'ive'avinidi vetalaga 'wainega.

²⁷ Awale givagivayega 'u dega? Awale 'u vekalieku wata kebu 'u da voneku yamu tauya faifaina? 'Ai'edi a da 'asetai yamu tauya faifaina 'ana sakali a da 'idewai, lei aliali* wata 'eba lauinava gita 'wainega ta da sosoana.

²⁸ Awale natukwavo wata tubukwavo, kebu 'u da tauyeku 'a da 'avalamaigidi 'alo a da yaogidi? Yamu sauluva 'wa da vo 'wava'wavadi yadi sauluva bani'odi.

²⁹ 'Aku fata a da luvela'ovimi, siwe lovane tamamu yana Yaubada i souyeni 'waikuye i voneku i vo, kebu tamu nani 'u na 'idewai Iakobo 'waineye.'

* **31:27:** 'Ana mogitana vona Ibeliu 'waineye, *tamubalini, me Ibeliu vevine yadi 'eba lauinava.*

³⁰ 'Akonadi a 'asetai nuanuamu bwaikina 'u na vilamu tamamu yana vanuge, siwe awale yaku yaubadavo 'u vinagodi?"

³¹ Iakobo i vo, A kololo fai a vo 'ako, ma yamu nuasako natumwavo 'adi 'ailuga 'u na 'eloku.'

³² We'e yamu yaubadavo aitoi 'wainega 'u na veluagadiga, i lubwaineni tomogonina i 'ewadi i na wafa. 'Ai'edi yamu kukua 'ifwaidi 'u na veluagadi, wata 'u na 'isa'inanadi 'u 'ewadi 'wainega." We'e Iakobo kebu i da 'asetaigna, Litieli Lebani yana vanuga a na yaubadavo i vinagodi.

³³ Bega Lebani i luku Iakobo yana vadavada 'waineye i laualla, mulieta i nago Lea yadi vadavada 'waineye wata tofolovavo 'adi 'ailuga yadi vadavada 'waidie i luku i laualla, siwe kebu tamu ava'ai i da veluagai. 'Eba ve'a'ava i nago Litieli yadi vadavada i lualai.

³⁴ Litieli kumanidi Lebani yana vanuga a na kumaea i 'ewadi kameli kwavuneye i givedi i miafwasedi. Lebani i laualla-vuvua vadavada nageneye siwe kebu i da veluagadi.

³⁵ Bega i vona tamadi 'waineye i vo, O 'auvea, 'ai'edi kebu a na tovoiga 'akonadi 'u 'asetai yau weta'i i 'ewama." Begaidi Lebani i laualla siwe vanuga 'ana kumaea kebu i da veluagadi.

³⁶ Nika Iakobo i nuasako Lebani i velutolieni i vo, Ava'ai yaku sakonaga ? Ava'ai sauluva sakoina a 'idewai 'waimuye, bega 'u tatalawavina 'u da vo yau tamu tosakona?

³⁷ Bega yaku kukua matatabuna 'akonadi 'u laualla 'waidiamo 'u nago, 'ai'edi yamu kukua 'ifwaidi 'u veluagadiga 'u na sivemagesedi. 'U na yatodi ta na 'isedi yada 'aila'a matadie ta na

kiavetonovi. 'Ai'edi yamu kukua 'u da veluagadiga, nuanuaku 'u na vonema nika 'ana fata veimea 'u na velema 'ana tutula 'waimuye.

³⁸ Malamala 20 nagedie taiadi ta miamia yamu 'aisayavo a 'i'isave'avinidi. Malamalanidi ta miamiaga, yamu sifi wata goti a 'i'isave'avinidi siwe kebu tamu sai'afo i da venatubaibai. Wata malamalanidi 'waidie kebu tamu sai'afo yamu 'aisaya sifi a da nikei a da 'ania.

³⁹ 'Ai'edi 'ifwaidi yamu 'aisayavo 'aisaya kasikasisidi i da ovadi, 'aisayanidi wafadi kebu a da givedi we'e tutulidi yau a 'idewadi. 'Omu yamu 'aisayavo tovainago i vinagodiga 'aiaseye 'alo lovana 'waineye, 'asa'aiana yau 'aisayanidi 'aitamogana 'aitamogana tutulidi a 'idewadi.

⁴⁰ Tutuya fuedi ma yaku tokemaiga a folofolova 'waimuye, 'aiaseye inala yana yauyauta bwaikina 'waineye kebu 'ada degadega, wata lovana 'aitamogana 'aitamogana kaukau 'wainega kebu a da 'e'enodewa.

⁴¹ Side bani'odi, malamala 20 nagedie a folofolova yamu vanuga 'ana 'ayaneye. We'e malamala 14 nagedie a folofolova natumwavo vevinedi 'adi 'ailuga faifaidi, wata malamala 6 nagedie yamu 'aisayavo a 'i'isave'avinidi. Siwe tutuya fuedi yaku folova 'ana tutula 'u sisivilavilai tutuya 10 bani'odi.

⁴² We'e 'ai'edi Tamaku yana Yaubada wata Ebelamo yana Yaubada, Aisake ma yana ve'ililibu i 'odu'odu 'waineye, 'ai'edi kebu i da 'ivaiseku 'ako yau nima'ava'avaku a da tauya. Siwe Yaubada yaku 'abiawa 'ana veviga wata

yaku folova toketokena i 'iseni, begaidi lovane i souyeni 'waimuye nika i tolimatanimu.”

Iakobo yana veakutagona Lebani 'waineye

⁴³ Lebani Iakobo i voneni i vo, De'e vevinenidi yau natukwavo, natudiavo yau tubukwavo wata 'aisaya 'u 'ise'isediga yaku 'aisaya. Wata nani matatabuna yau, yaku 'eba veimea. We'e 'asiau vevinenidi wata natudiavo bani'odi a na munegidi?

⁴⁴ Begaidi tutuya de'e 'waineye yada veakutagona ta na 'idewai, 'omu wata yau yada veakutagonina ta na 'idewai, bega yada 'eba 'isa.”

⁴⁵ Bega Iakobo tamu kileu i 'ewai nika i vetovoia, yadi 'eba 'isa.

⁴⁶ Bega Iakobo yana 'aila'a i vonedi i vo, Kileu 'wa na miedi.” Bega kileu i miedi i 'ivedidigi, i 'a'ava Iakobo wata Lebani taiadi i miabui kileu didiga lilivaneye veakutagona 'ana 'ani i 'idewai.

⁴⁷ Begaidi didiganina 'ana wagava Lebani i goleni Iega-Saaduda, we'e Iakobo 'ana wagava i goleni Galedi.[†]

⁴⁸ Bega Lebani i vo, Didiga de'e 'omu wata yau yada veakutagona 'ana tugusa, 'wainega ta na 'asetai 'akonadi ta vona'awaufaufa.” Begaidi i goleni Galedi, 'ana 'aseti *'Eba awavemogitana 'ana Didiga*

⁴⁹ Wata tamu 'ana wagava Misifa, me Ibeliu bonadiega 'ana saivila, Lebani i vo, Nuanuaku 'AUVEA bei i na 'ise'iseda bega yada veakutagona ta 'idewaiga ta na ve'ililibuyeni.

[†] **31:47:** *Iega-Saaduda me Alami bonadiega wata Galedi me Diu bonadiega 'adi saivila i vesala, 'Eba awavemogitana 'ana Didiga.*

⁵⁰ 'Ai'edi natukwavo 'u na vesauluva-sakoyedi wata mali vevinevo 'u na nagidiga, 'asa'aiana Yaubada i na 'ise'isemu, kebu tamu aitoi 'ana fata i na 'isemu. Yaubada 'aisena 'ada to'asete, 'omu wata yau yada veakutagona ta na 'isave'avina.

⁵¹ Wata Lebani i vo, Didiga de'e 'u na 'iseni wata tamu a vetovoia 'omu wata yau yada 'eba 'isa 'awasasadeye.

⁵² Didiga de'e wata kileu manamanawena i vetovoia yada ikata 'ana tugusa. Bega yau kebu didiga a na 'iaweni yamu vi'ai 'waineye bega veviga a na velemu 'alo didiga 'u na 'iaweni 'u na mai yaku vi'ai 'waineye veviga 'u na veleku.

⁵³ 'Auvea Ebelamo yana Yaubada wata Naoli yana Yaubada, yadi veimea tonovina wainega i da vetoveimea 'awasasadeye."

Bega Iakobo i velu'ui Yaubada 'waineye, tamana Aisake 'ana wagavayega i vona'awaufaufa, yadi 'eda bala i na veve'ililibuyeni.

⁵⁴ Bei 'oyeye Iakobo tamu 'aisaya i velomuyeni Yaubada 'waineye i kabuni. Yana 'aila'avo matatabudi i tayegidi veakutagona 'ana sakali i 'ani. Tutuyanina 'ani i 'a'avana matatabudi 'oyeye i 'eno.

⁵⁵ I 'atai 'awa'awaiogose Lebani i tovoi natunavo vevinedi, wata tubunavo i 'avalamaigidi i yaogidi wata i vesauluva 'atumaina 'waidie nika i tauya i nago yana 'eba mia 'waineye.

32

¹ Mulieta Iakobo i tauya i nunago 'edeye, nika

Yaubada yana anelosevo i veluagadi.

² Tutuyanina Iakobo tomotoganidi i 'isedi i vo, De'e Yaubada yana tofolovavo yadi 'atamana." Bega 'ana wagava i goleni Manaimi.*

Iakobo nuakalikali i vetunedi Iso 'waineye

³ Mulieta Iakobo tomotoga 'ifwaidi i vetunedi i kumeta tatana Iso 'waineye, 'atamananina 'ana wagava Seli 'waineye bei miamia, 'awalawa Idomu nageneye.

⁴ I veifufudi i vo, Side yaku vala yaku 'auvea Iso 'wa na voneni 'wa na vo, Yamu tofolova Iakobo, i vekaiwa 'waimuye. Basenadi a nago avuku Lebani 'waineye a miamia i maiga 'asiau.

⁵ Tutuya de'e 'waineye yaku 'aisayavo fueotogidi bani'odi bulumakau, doniki, sifi wata goti, tofolovavo iavetadi wata vevinedi. Bega side tomotoganidi a vetunedi i viwai yaku 'auvea i vonemu yaku wai faifaina, a nuani ma yamu sosoana 'edeye ta na veluaga.' "

⁶ Tutuyanina tomotoganidi i viladi Iakobo 'waineye i voneni i vo, Tatamu Iso 'a veluagai, 'akonadi i mimai 'edeye, yana tomotoga 400 taiadi i na yogo'ede'edemu."

⁷ Iakobo valanina i nogai i kololo-'afo'afo, begaidi yana vevinevo, natunavo wata yana 'aisayavo i 'ididi, sifi bulumakau wata kameli 'aila'a 'ailuga i 'idewadi.

⁸ Yana nuanua i vo, 'Ai'edi Iso tamu 'aila'a taiadi i na vevetalaga, nika tamu 'aila'a i na dega."

⁹ Mulieta Iakobo i velu'ui i vo, 'Omu tubuku Ebelamo yana Yaubada wata tamaku Aisake

* **32:2:** *Manaimi 'ana 'aseti, 'Eba vebae'wa 'adi 'ailuga*

yana Yaubada. Ie 'AUVEA, basenadi 'u voneku 'u vo, 'U na vilamu yamu 'awalaweye wata yamu tomotoga 'waidie.' Wata 'u vona'awaufaufa 'waikuye 'u vo, Ma yaku nuakalikali a na vesauluva 'atumaina 'waimuye.'

¹⁰ Yamu 'atumaina, yamu 'isanuakalikali 'eno'eno-vagaina wata yamu vona'awaufaufa 'atumaiddi 'u 'idewadi yamu tofolova 'waikuye, yau kebu bani'odi a da vesauluvediga. Tutuyanina a tovoi a damana Ufa Iolidani vi'ainega, kebu tamu ava'ai 'waikuye i da 'eno'eno, yaku wautogana 'aitamogana. We'e tutuya de'e yaku 'aila'a i vebwaika-'afo'afo 'aila'a 'adi 'ailuga.

¹¹ 'AUVEA, a vevelu'ui 'waimuye nuanuaku 'u na 'ita'ita'ieku tataku Iso 'wainega, yau a kololo fai i mimai i na nikeku, yau, yaku vevinevo wata natukwavo taiadi.

¹² Siwe 'u vona'awaufaufa 'waikuye 'u vo, Vona mogitana a na vesauluva 'atumaina 'waimuye wata bola 'amu wauma i na vefue wala'ai 'ana 'ilukulukuta bani'odi.' "

¹³ Iakobo lovani 'aitamogana bei i 'eno, mulieta yana kukua 'waidiega i 'idewadewai i na 'anivelenedi tatana Iso 'waineye.

¹⁴ 'Aisayanidi bani'odi goti vevinedi 200, goti iavetadi 20, sifi vevinedi 200, wata sifi natudiavo 20,

¹⁵ kameli vevinedi 30 ma natudiavo, bulumakau vevinedi 40, bulumakau iavetadi 10, doniki vevinedi 20 wata doniki iavetadi 10.

¹⁶ 'Aisayanidi i 'idia 'aila'a 'aitamogana 'aitamogana mulieta i 'anivelenedi yana tofolovavo 'aitamogana 'aitamogana 'waidie.

Mulieta yana tofolovavo i vonedi i vo, 'Wa na kumeta 'aisaya 'wa na nunawedi, siwe kebu 'wa na luwetubama 'aila'a 'aitamogana 'aitamogana 'waidiega."

¹⁷ We'e tomotoganidi 'aila'a kumekumetana Iakobo i velu'ase'asedi i vo, 'Ai'edi tataku Iso i na veluagami i na velutoliemi i na vo, 'Omi aitoi yana tofolovavo wata ava'aibe bei 'wa nunagoi?"

¹⁸ Bega 'wa na vo, Yamu tofolova Iakobo yana kukua, siwe nuakalikalinidi 'ana toveimea Iso faifaina. We'e taunina siva mulimeye i mimai.' "

¹⁹ Wata bani'odi Iakobo 'aila'a 'ana veluga, 'ana vetonu wata tomotoganidi mulidie i mimaiga i vonedi i vo, Tutuyanina Iso taiadi 'wa na veluaga, veifufunina 'aitamogana wainega 'wa na veifufu.

²⁰ Nika bei 'wa na voneni 'wa na vo, Yamu tofolova Iakobo siva mulimeye i mimai.' "

Iakobo yana nuanua i vo, 'Ai'edi yaku 'anivelena a na vetunei i na kumeta. Tutuyanina taunina a na 'iseni a nuani i na sosoaneku."

²¹ Tutuyanina i veifufu'a'avana, yana nuakalikalinidi i vetunedi i kumeta, we'e Iakobo taunina lovananina i 'eno yana vadavada 'waineye.

Iakobo Yaubada yana anelose taiadi i ve'ivunuvunuga

²² Lovananina 'waineye Iakobo i tovoi yana vevinevo 'adi 'ailuga, yana tofolovavo siwe yana vevinevo 'adi 'ailuga wata natunavo 'adi 11 taiadi Ufa Iaboki i damani.

²³ Tutuyanina tomotoga matatabudi i vagavaidi i damana ufa vi'ainega, yana kukua matatabuna i 'anivelenedi yana tofolovavo 'waidie.

²⁴ Iakobo 'aisena i miamia lovana 'ana utukamwana 'waineye tamu tomogo i mai ma yana toketokena taiadi i ve'ivunuvunaga i nagoga tutuya i kililia.

²⁵ Tutuyanina tomogonina i 'asetai 'akonadi yana toketokena i mweamwea, bega Iakobo agalina 'ana tubwa i 'wenoi.

²⁶ Tomogo i vo, 'U baileku a na nago 'akonadi i 'ata'atai."

Siwe Iakobo i vo, Kebu a na 'avalainanimuga, nagami 'u na vesauluva 'atumaina 'waikuye mulieta a na tauyemu 'u na nago."

²⁷ Nika tomogonina i velutolieni i vo, Aitoi 'amu wagava?" I vo, Yau Iakobo."

²⁸ Bega tomogonina i vo, 'Amu wagava kebu wata Iakobo i na golegolemu, 'Asiau 'amu wagava 'ivauna Isileli† i na 'inanai, fai Yaubada wata tomotoga taiadi 'u vetalaga nika 'u vetoketoke."

²⁹ Iakobo i vo, 'Amu wagava 'u da voneku."

Siwe tomogonina i voneni i vo, Awale nuanuamu 'aku wagava 'u na 'asetai?" Mulieta i vesauluva 'atumaina Iakobo 'waineye.

³⁰ Iakobo 'atamana 'ana wagava i golemi Fenieli‡ { 'ana 'asetai Yaubada taiadi i ve'a'isa}, fai i vo, Yau Yaubada matakuyega a 'iseni siwe i 'isanuakalikalieku bega yawaiku kebu 'ida 'ewai."

³¹ Inala 'akonadi i vulaoga we'e Iakobo i tauya Fenieli 'wainega, we'e agalina 'ana tubwa i 'anita'ia fai ma 'ana kini'ona bega i tatalafai'a.

† 32:28: *Isileli 'ana 'asetai, Yaubada taiadi i vetafewa.* ‡ 32:30: *Fenieli 'ana 'asetai, Yaubada taiadi i ve'a'isa.*

³² (Begaidi tutuya de'e 'waineye me Isileli kebu 'aisaya agalidi 'adi tubwa 'waidie i da 'ani'anidi, fai lovananina 'waineye tomogo Iakobo agalina 'ana tubwa i tutuwenoi nika yana toketokena i mwea.)

33

Iakobo Iso taiadi veluaga wata i veiana

¹ Mulieta Iakobo i 'isalaka Iso i 'iseni ma yana 'aila'avo 400 i mimaia, bega natunavo i 'ididi i nago Lea, Litieli wata yana tofolova-maimaiga yana vevinevo 'adi 'ailuga 'waidie.

² Bega tofolova-maimaiga ma natudiavo i kumeta i tovoi, mulieta Lea ma natudiavo mulidie, we'e Litieli ma natudi Iosefa i vemuliotoga.

³ Iakobo i kumeta i nago tatana manawaneye nika i 'odu tutuya 7 fwayefwayeye.

⁴ We'e Iso i lilide i nago i yogo'ede'edeni, i 'avalamaigi i yaogi, nika 'adi 'ailuga i taibwaubwau.

⁵ Mulieta Iso vevine wata yavayavava i 'isedi i velutolieni i vo, Tomotoganidi egavo taiadi 'wa mai?"

Iakobo i vo, Yaubada ma yana nuakalikali i vesauluva 'atumaina yaku tofolova vevinedi natudiavo."

⁶ Mulieta tofolovanidi ma natudiavo i maia Iso 'waineye ma yadi ve'ililibu i 'odu mataneye.

⁷ I 'a'avana, Lea ma natudiavo i maia ma yadi ve'ililibu i 'odu Iso 'waineye, mulieta Iosefa ma inana Litieli i mai ma yadi ve'ililibu i 'odu Iso 'waineye.

⁸ Wata Iso Iakobo i velutolieni i vo, Aitoi yana 'aisayavo 'edeye a veluagadi, 'ana 'aseta bani'odi?"

Iakobo i vo, De'e yaku nuakalikali a na 'anivelena 'waimuye, yada veiana 'ana veakutagona faifaina."

⁹ Siwe Iso i vo, Taiku, yau 'akonadi 'aku sala wata yaku 'aisayavo fuedi i miamiani, 'asa'aiana 'omu faifaimu."

¹⁰ Siwe Iakobo i voneni i vo, 'Asa'aiana, 'ai'edi 'u nuakalikalieku mogitana, yaku nuakalikali 'u na 'ewai. Ma yaku sosoana a 'isemu, 'wa da vo Yaubada maigina a da 'iseni, wata tutuyanina ta veluaga ma yamu sosoana 'u lu'uma'umaieku.

¹¹ Yaubada ma yana nuakalikali i vesauluva 'atumaina 'waikuye, begaidi nuanuaku yaku nuakalikalinina a mieniga 'u na 'ewai. Yau nani matatabuna 'asa'aiana 'aku fata, kebu fuediga siwe 'aku fata a na velemu." Iakobo i toke i velu'ui-nuakalikali 'waineye begaidi Iso nuakalikalinina i 'ewai.

¹² Mulieta Iso i vo, 'Asa'aiana ta na tauya, yau a na kumeta."

¹³ Iakobo i vo, 'Aku toveimea 'u 'iseni, 'ifwaidi kwakwama bola siaidi wata 'aisaya natudiavo siasiaidi. 'Ai'edi i na toke i na lilidega, 'aiata 'aitamogana nageneye i na nago i na lavia, 'aisayanidi matatabuna i na ve'alawafawafa.

¹⁴ 'Aku toveimea, nuanuaku 'u da kumeta yau yamu tofolova 'a da vemuli. 'Ima 'ako ma'inuama mulimuye 'a na wai, kwakwama wata 'aisaya siasiaidi yadi nago 'ana 'etowava 'wainega. We'e yau 'atamana Seli 'waineye ta na veluaga."

¹⁵ Iso i vo, 'Atumaina, siwe nuanuaku yaku tomotoga 'ifwaidi a na vonedi i na kumeta i na 'i'ita'ita'iemu.”

Iakobo i vo, Yamu veifufu 'waikuye 'asa'aiana, kebu faifaina 'u na nuanua.””Aku toveimea, fai 'akonadi ma yamu sosoana 'u lu'uma'umaieku yada veluaga 'ana tutuye.”

¹⁶ Bega 'aiatanina 'waineye Iso i vilai i nago 'atamana Seli 'waineye.

¹⁷ We'e Iakobo i tovoi i nago 'atamana Sukoti, bei taunina vadavada i yogoni wata yana 'aisayavo yadi lau'weta i 'idewadi. Begaidi 'atamananina i goleni Sukoti.*

¹⁸ Mulieta Iakobo i tauya Fadani-Lami 'wainega i nago i le'wa 'atamana Sekemu, 'awalawa Kenani nageneye. We'e 'atamananina lilivaneye bei yana vadavada i vetovoia.

¹⁹ Basenadi Iakobo tamu fwayafwaya i kimwanei Emoli yana 'aila'a 'waidiega, taunina Sekemu tamana. Tanoganina i kimwaneiga kileu siliba 100 'wainega.

²⁰ Bei tamu 'eba velomu i didigi 'ana wagava i goleni Eli-Eloe-Isileli.†

34

Sekemu 'ana vematavuloga

¹ Tamu 'aiata 'waineye Iakobo wata Lea natudi vevinena 'ana wagava Deina, i nago vevine ne'e'ela i na fogedi 'atamananina 'ana tomia 'waidie.

* **33:17:** *Sukoti 'ana 'asete, Lau'weta.* † **33:20:** *Eli-Eloe-Isileli 'ana 'asete, Yaubada 'asa'aiana Isileli yana Yaubada.*

² Tutuyanina 'waineye tamu tomogo bwaikina i miamia, 'ana wagava Sekemu, taunina Emoli tomogo Aite natuna 'awalawanina 'ana toveimea. Tutuyanina Deina i 'iseni i 'ive'avini i naweni taiadi i 'eno.

³ Nika Sekemu Deina Iakobo natuna nuana i 'ewai i nuakalikalieni mogitana bega yana veifufu 'eba nua'ewa wata 'atumaidi 'wainega i nua'ania.

⁴ Sekemu tamana Emoli i voneni i vo, Nuanuaku vavine 'u da vagavaia taiadi 'a da nagi."

⁵ Tutuyanina Iakobo vala i nogai natuna vevinena Deina Sekemu i 'ivesakoi, siwe natunavo i nagoi gidegideye yadi 'aisaya i 'isave'avinidi, begaidi kebu tamu ava'ai i da 'idewai, i nagoga 'ana tugusa i viladi 'atamane.

⁶ Mulieta Emoli, Sekemu tamana i nago Iakobo 'waineye, nani de'e faifaina i na kiavetonovi.

⁷ Tutuyanina Iakobo natunavo wala'aiega i le'wai, valanina i nogai yawaidi i lovoga wata i nuasako-'afo'afo, fai novudi i vunugi i 'enoveni. Sekemu sauluva sakoiotogina i 'idewai Iakobo yana 'aila'a 'waidie, nani de'e i lubwaineni kebu i da 'idewai.

⁸ Bega Emoli i veifufu Iakobo ma natunavo 'waidie i vo, Natuku Sekemu vavine de'e nuana i 'ewaotogi, nuanuaku natumu 'u da tauyeni taiadi i da nagi.

⁹ Wata nuanuama nagi 'ana veimea ta na 'idewai. Natumiavo iavetadi 'wa na tauyedi natumavo vevinedi faifaidi, wata 'ima natumavo iavetadi 'a na tauyedi natumiavo vevinedi faifaidi.

¹⁰ Nika 'ami fata 'awalawa de'e 'waineye taiadi ta na mia. Yama fwayafwaya matatabuna 'a

tauyeni 'waimie. Bei taiadi ta na miamia ta na vevekimwane. Kebu tamu ve'etoboda 'waimie i da 'eno'eno, wata yavuyavumi kukua 'wa na kimwakimwane 'awalawa de'e 'waineye.”

¹¹ Mulieta Sekemu taunina i veifufu Deina tamana wata novunavo 'waidie i vo, A vevelu'ui 'waimie 'ai'edi 'wa da sosoana, Deina 'wa da tauyemi a da nagia. 'Ai'edi ava'ai yami nuanua 'wa na velu'ui 'waikuye, vona mogitana a na velemini.

¹² 'Ai'edi kukua wata nuakalikali 'ana vebwaika 'wa na yatoiga, 'aku fata ma yaku sosoana a na tutuli. Begaidi vavine 'wa na tauyeni 'a na nagia.”

¹³ Fai 'akonadi Sekemu novudi Deina i 'ivesakoi begaidi Iakobo natunavo Sekemu ma tamana Emoli i vekaliedi.

¹⁴ I vonedi i vo, 'Ima kebu novuma 'a da tauyeni, fai bunu 'aibobo kebu 'u da 'ewaiga. 'Ai'edi novuma 'u na nagia 'eba bunumayaga 'waimeye.

¹⁵ Yama nuanua side bani'odi a mieni 'waimie. 'Ai'edi iaveta matatabumi bunu 'aibobo 'wa na 'ewai, 'ima wata bani'odi bunu 'aibobo 'a 'ewai,

¹⁶ mulieta 'ima natumavo vevinedi 'a na velemini wata natumiavo vevinedi 'a na nagidi. Nika ma fueda ta na mia 'aila'a 'aitamogana.

¹⁷ Siwe 'ai'edi bunu 'aibobo kebu 'wa na 'ewaiga, novuma 'a na vagavaia taiadi a na nago.”

¹⁸ Emoli wata natuna Sekemu yadi nuanua i awave'atumaieni.

¹⁹ Sekemu kebu i da vogavogana veimeanina i na 'idewaiga faifaina, fai nuanuana bwaikina Iakobo natuna. Taunina tamu tomogo bwaikina ma 'ana ve'ililibu yana 'aila'avo 'waidie.

²⁰ Bega Sekemu ma tamana Emoli i nagoi
'atamana 'ana 'awa 'eba luku 'waineye,
to'edakumetavo 'waidie i veifufu veimeanina
faifaina.

²¹ I vonedi i vo, Tomotoganidi yadi sauluva
'atumaidei 'waimeye. Siwe ta na tayegidi i na maia
taiadi ta na miamia, yavuyavudi i na
vevekimwane. Tomotoganidi 'ada fata taiadi ta
na mia, fai yada fwayafwaya bwaikina.
Natudiavo vevinedi ta na 'ewadi yada vevinevo
wata natudiavo vevinedi i na nagi 'waideye.

²² 'Ai'edi tomotoganidi taiadi ta na mia 'aila'a
'aitamogana, iaveta matatabuda bunu 'aibobo ta
na 'ewai tomotoganidi bani'odi.

²³ 'Ai'edi yadi nuanua ta na 'idewai, bola yadi
'aisayavo wata yadi kukua matatabuna 'ida ta na
veimeyedi. 'Wa mai yada nuanua 'aitamogana
'wainega bega ta na tauyedi taiadi ta na mia."

²⁴ Tomotoganidi i miamiani 'atamana
bwaikina 'waineye, Emoli wata Sekemu yadi
nuanua i awave'atumaieni, bega iaveta
matatabudi bunu 'aibobo i 'ewai.

²⁵ 'Aiata 'aitonu i 'a'ava, 'adi 'aibobo i vebonu
bola i veveviga, nika Iakobo natunavo 'adi
'ailuga, Simioni wata Livai, Deina novunavo
mogitana, ma yadi kefata i luku 'atamananina
'waineye bei kebu aitoi i da 'ikasikasisi, bega
iaveta matatabudi i luvewafadi.

²⁶ Wata bei, Emoli wata natuna Sekemu taiadi i
luvewafadi kefata 'wainega, mulieta Sekemu
yana vanuga 'wainega Deina i vagavaia nika i
viladi yadi 'eba mia 'waineye.

²⁷ Mulieta Iakobo natunavo 'ifwaidi i maia,

tomotoganidi wafawafadi i 'isedi, bega
'atamananina matatabuna i kwekwei fai novudi i
'ivesakoi.

²⁸ Sifi, bulumakau, doniki wata kukua 'ifwaidi i
veluagadi 'atamana nageneye wata tanoga
'waidie, matatabuna i 'ewadi.

²⁹ Yadi kukua matatabuna i lukwekwedi, yadi
vanuga i luvela'ovidi, yadi vevinevo wata
natudiavo taiadi i 'ive'avinidi i nawedi yadi
tofolova-maimaiga.

³⁰ Mulieta Iakobo Simioni wata Livai i vonedi i
vo, 'Omi yami sauluva sakoina 'wainega 'ada
gavia 'wa'wayami i mai 'waideye. Me Kenani
wata me Felesi 'awalawa de'e 'waineye i na
vegavieda. 'Ida kebu 'ada 'aila'aga siwe 'ai'edi
waumanidi i na luvetubama i na maia taiadi ta
na vetalaga. Bega yau wata yaku vanuga 'ana
tomia matatabuna i na 'u'umida."

³¹ Siwe natunavo ma yadi nuasako yana vona i
tutuli i vo, Awale novuma i 'ive'avini 'wa da vo,
tamu vavine toalagogona bani'odi?"

35

Iakobo i vilai i mai Bedeli

¹ Mulieta Yaubada Iakobo i voneni i vo, 'U na
'idewadewa 'u na nago Bedeli bei 'u na mia. Nika
tamu 'eba velomu 'u na didigi Yaubada faifaina,
kumanina basenadi i souyeni 'waimuye,
tutuyanina tatamu Iso 'wainega 'u dega."

² Bega Iakobo yana 'aila'avo matatabudi i
voned i vo, Kumaea matatabuna 'wa na
'ewayavuledi, taunimi 'wa na 'ivevunavunagimi,
wata talauma vunavunagidi 'wa na ve'wesenedi.

³ Tutuya de'e ta na nago Bedeli, bei tamu 'eba velomu a na didigi Yaubada faifaina. Kumanina basenadi vita bwaikina i souyeni 'waikuye, yaku velu'ui i nogai wata i 'ivaiseku. Wata tutuyanina ava'ai bei a na nagoga kumanina yau taiadi."

⁴ Begaidi tomotoganidi yadi kumaea wata 'adi 'oma'oma i 'anivelenedi Iakobo 'waineye, i tavunidi welavi bwaikina lamuneye, Sekemu lilivaneye.

⁵ Tutuyanina i tauya i nunago, Yaubada 'ana kololo 'atamana 'aitamogana 'aitamogana 'adi tomotogavo i vevebaedi, begaidi kebu tamu aitoi Iakobo yana 'aila'avo i da daba 'waidie.

⁶ Mulieta Iakobo ma yana 'aila'avo i le'wai 'atamana Losi 'waineye, 'awalawa Kenani nageneye, 'atamananina tamu 'ana wagava Bedeli.

⁷ Bei Iakobo tamu 'eba velomu i didigi bega 'eba velomunina i goleni Eli-Bedeli,* fai bei Yaubada i souyeni 'waineye, tutuyanina Iakobo i dega tatana Iso 'wainega.

⁸ 'Aiata 'ifwaidi i 'a'ava, mulieta Libeka 'adi to'isave'avina 'adi wagava Debola i wafa, i ve'ufadi welavi oaki lamuneye, 'atamana Bedeli laube'una 'waineye. Bei welavinina i goleni Aloni-bakuti, 'ana 'aseta mogai oaki 'waineye.

Yaubada Iakobo i vona-nuakalikalieni

⁹⁻¹⁰ Iakobo 'akonadi i vilai Mesafotemiayega we'e i miamia Bedeli, bei Yaubada i souya-vaituganeni Iakobo 'waineye nika i

* **35:7:** Vona Ibeliu 'waineye, wagava *Eli-Bedeli 'ana 'aseta Bedeli 'ana Yaubada.* **35:9-10:** Nag 32:28

vona-nuakalikaliēni i vo, 'Omu 'amu wagava Iakobo, we'e 'asiau bega i na nagoga kebu i na golemu Iakobo, 'amu wagava Isileli.” Nika Yaubada wagavanina Isileli i goleni†

¹¹ Wata Yaubada i vo, Yau Yaubada Toketokeotogiku. 'U na venatuvea'wa nika 'amu 'aila'a i na vefueotoga wata 'waimuyega 'aila'a fuedi wata bwaikidi i na souyedi, we'e tubumwavo 'ifwaidi i na ve-kini.

¹² Fwayafwayanina basenadi Ebelamo wata Aisake a veledi, 'awaie a na velemu, 'omu wata tubumwavo 'waimie 'wa na ve'itulamuyeni.”

¹³ Yaubada i veifufu i 'a'avana, 'awalawanina 'wainega i 'iaweni i laka.

¹⁴ Bei Iakobo Yaubada taiadi i veifufuga kileu i sivetovoia nika oine i iwagi yana 'anivelena Yaubada 'waineye wata ma yana ve'ililibu bunama i iwagi kileunina 'waineye yana 'eba nuave'avina faifaina.

¹⁵ Mulieta 'awalawanina i goleni Bedeli‡ fai bei Yaubada Iakobo taiadi i veifufu.

Litieli yawaidi i 'a'ava

¹⁶ Iakobo ma yana 'aila'avo 'awalawa Bedeli i 'iaweni, i nunagoi sai'afo 'ani'ie Efaleti 'wainega Litieli i vebutudi siwe tutuya manamanawena i vetafewedi.

¹⁷ Bola i vevetafewa tamu to'ivevauvau i vonedi i vo, Kebu 'wa na kolologa sai'afoga tamu natumi iavetana i na tubuga.”

† 35:9-10: Vona Ibeliu 'waineye, wagava Iakobo 'ana 'asete Tovekali, we'e wagava Isileli 'ana 'asete Yaubada taiadi i vevetalaga.

35:11: Nag 17:4-8 35:14: Nag 28:18,19 ‡ 35:15: Bedeli 'ana 'asete Yaubada yana Vanuga.

18 'Akonadi kwamana i tubuga Litieli i goleni
'ana wagava Benoni§ nika yawaidi i 'awatagoni,
we'e tamana kwamananina i goleni Beniamina.*

19 Litieli 'akonadi yawaidi i 'a'ava mulieta i
ve'ufadi 'edanina i nunago Efaleti lilivaneye, we'e
'atamananina tamu 'ana wagava Bedeliema.

20 Iakobo kileu i didigi Litieli 'adi taumata
'waineye yadi 'eba nuave'avina, we'e 'asiau bola i
'eno'eno.

21 Mulieta Isileli i tauya i nago Migidali-Eida
lilivaneye bei i yana vadavada i vetovoia.

22 Tutuyanina bei i miamia , tamu 'aiata
'waineye Lubeni i luku tamana tamu yana
tofolova-maimaiga 'adi wagava Bilani taiadi i
'eno nika Iakobo valana i nogai.

Iakobo natunavo

De'e Iakobo natunavo 12 'adi wagava.

23 Lea natudiavo,
Lubeni, Iakobo yana tubu'edakumeta,
Simioni, Livai, Iuda, Isaka wata Sebuloni.

24 Litieli natudiavo,
Iosefa wata Beniamina.

25 Litieli yadi tofolova-maimaiga 'adi wagava
Bilani, natudiavo,
Dani wata Nafitalai.

26 Lea yadi tofolova-maimaiga 'adi wagava
Silifa, natudiavo,
Gada wata Asa.

De'e Iakobo natunavo, tutuyanina i miamia
Mesafotemia i tubuga.

§ 35:18: Benoni 'ana 'asete Natuku yaku veviga 'wainega.

* 35:18: Beniamina 'ana 'asete Natuku 'aku 'atagi.

Aisake yawaina i 'a'ava

²⁷ Iakobo i vilai i mai tamana Aisake 'waineye, i miamiani Mamile, Kiliati-alaba lilivaneye. Kiliati-alaba tamu 'ana wagava Ebiloni, bei basenadi Ebelamo ma natuna Aisake i mia.

²⁸ I miamia Aisake 'ana malamala 180 i veluagai.

²⁹ Akonadi i ve'auvea-'afo'afo nika yawaina i 'a'ava bega i nago tubunavo taiadi i veluaga. I 'a'avana, natunavo Iso wata Iakobo i ve'ufai.

36

Iso tubunavo

¹ Iso, kumanina tamu 'ana wagava Idomu, yana 'aila'avo side 'adi veifufu.

² Iso Kenani vevine ne'e'elidi 'adi 'ailuga i nagidi. Vevinenidi side 'adi wagava Adai, Eloni tomogo Aiti natuna wata Olibaima, kumanina Anai natuna we'e Sibioni tomogo Aiviti tubuna.

³ Wata Iso Basemati i nagia Isimeli natuna we'e Nebeiota novuna.

⁴ Adai i venatuna natudi iavetana i venatuneni 'ana wagava Elifasi, we'e Basemati i venatuna natudi iavetana i venatuneni 'ana wagava Leueli.

⁵ Olibaima i venatuna, natudiavo iavetadi side 'adi wagava Ieusa, Ialama wata Kola. Tomotoganidi matatabudi Iso natunavo i tubuga 'awalawa Kenani 'waineye.

⁶ Iso yana vevinevo, natunavo, yana vanuga 'ana tomia matatabuna, yana 'aisayavo, yana 'ai'aiwabu wata yana kukua 'ifwaidi. Kenani 'wainega i tauya taina Iakobo i 'iaweni i nago tulineye.

⁷ Fai 'atamananina bei i miamia fwayafwaya kebu 'adi fata fai yadi 'aisayavo wata yadi kukua fueotogidi.

⁸ Bega Iso, kumanina 'ana wagava Idomu, i nago 'oya Seli 'waineye i mia.

⁹ Iso tubunavo 'adi veifufu side bani'odi. Iso 'ana wauma 'ana wagava Idomu, i miamia 'Oya Seli 'waineye.

¹⁰ Iso natunavo side 'adi wagava.

Elifasi, Iso yana vavine Adai natudi, wata
Leueli, Iso yana vavine Basemati natudi.

¹¹ Elifasi natunavo side 'adi wagava.

Temani, Omali, Sefo, Gatamu, Kenasi.

¹² Iso natuna Elifasi 'ana 'aimuli 'adi wagava Timuna natudi i venatuneni 'ana wagava Amaleki. Iso yana vavine Adai tubudiavo.

¹³ Leueli natunavo side 'adi wagava. Naati, Dela, Samama wata Misa. De'e Iso tubunavo Iso yana vavine Basemati 'waidiega.

¹⁴ Wata Iso yana vavine Olibaima natudiavo side 'adi wagava, kumanina Anai natuna we'e Sibioni tubuna. Vavinenidi natudiavo 'adi wagava Ieusa, Ialama wata Kola.

¹⁵ De'e Iso tubunavo, kumanidiavo wauma 'adi to'edakumetavo, 'aila'a 'aitamogana 'aitamogana 'adi wagava.

Iso natuna tulaiotogina Elifasi natunavo, wauma 'adi to'edakumetavo, Temani, Omali, Sefo, Kenasi,

¹⁶ Kola, Gatamu, Amaleki. De'e tomotoganidi 'adi wagava side. 'Aila'anidi i miamiani 'awalawa

Idomu 'waineye. Elifasi 'ana wauma 'wainega i souyedi. Tomotoganidi matatabudi Iso yana vavine Adai 'waidiega i souyedi, Iso tubunavo we'e Elifasi natunavo.

¹⁷ Iso natuna Leueli, we'e natunavo Iso tubunavo wauma 'adi to'edakumetavo side 'adi wagava Naati, Dela, Samama wata Misa. De'e tomotoganidi wauma 'ana to'edakumetavo Leueli 'ana wauma 'wainega i souyedi, 'awalawa Idomu 'waineye i miamia. Tomotoganidi matatabudi Iso yana vavine Basemati tubudiavo.

¹⁸ Iso yana vavine Olibaima 'adi wauma 'adi to'edakumetavo 'waidiega i souyedi side 'adi wagava. Ieusa, Ialama wata Kola. We'e to'edakumetavo 'adi wagava i souyedi Iso yana vavine Olibaima 'waidiega, taunidi Anai natuna.

¹⁹ De'e Iso tubunavo 'adi veifufu, taunina tamu 'ana wagava Idomu, 'adi wauma wata yadi to'edakumetavo 'adi wagava.

Tomotoganidi nagami 'awalawa Idomu 'wainega i souyedi

²⁰ Side waumanidi 'adi wagava. Seli tomogo Owa 'ana wauma 'wainega i souyeni i nago 'awalawa Idomu 'waineye bei mia. Tomotoganidi side 'adi wagava, Lotani, Sobala, Sibioni, Anai,

²¹ Disoni, Esedi, Disana. De'e tomotoganidi wauma Owa 'ana to'edakumetavo, taunidi Seli natunavo i miamiani 'awalawa Idomu 'waineye.

²² Lotani natunavo Owa wata Emami, we'e Lotani novuna 'adi wagava Timina.

- 23 Sobala natunavo side 'adi wagava. Alivani,
Manati, Ebali, Sifo wata Onami.
- 24 Sibioni natunavo side 'adi wagava, Aia wata
Anai. (Anai kumanina basenadi tamana
yana doniki i 'isave'avinidi nika muna i 'iseni
sali'avu'avuye.)
- 25 Anai natunavo 'adi 'ailuga side 'adi wagava.
Natuna iavetana Disoni wata natuna
vevinena Olibaima.
- 26 Disoni natunavo side 'adi wagava. Emidani,
Esibani, Itilani wata Kelani.
- 27 Esedi natunavo 'adi 'aitonu side 'adi wagava.
Bilani, Savana wata Ekani.
- 28 Disana natunavo 'adi 'ailuga, 'adi wagava
side Usa wata Alani.
- 29 Side toveimeanidi Owa 'ana wauma 'wainega.
Tomotoganidi 'adi wagava, Lotani, Sobala,
Sibioni, Anai,
- 30 Disoni, Esedi, Disana. Owa natunavo 'adi
'aitonu 'adi wagavayega wauma i goledi we'e
yadi to'edakumetavo matatabuna i miamia
'awalawa Seli 'waineye.

'Awalawa Idomu 'ana toveimeavo

31 De'e kininidi kumanidiavo 'awalawa Idomu
'waineye i veveimea, tutuyanina 'waineye kebu
tamu kini me Isileli i da veveimeyedi.

- 32 Beo natuna Bela, kumanina me Idomu yadi
kini i veveimeyedi, we'e yana 'atamana 'ana
wagava Dinaba.
- 33 Tutuyanina Bela i wafa, Iobaba natuna Dela
'atamana Bosola 'wainega i ve-kini taunina
tutulina.

- ³⁴ Tutuyanina Iobaba i wafa, Usami 'awalawa
Temani 'wainega i ve-kini taunina tutulina.
- ³⁵ Tutuyanina Usami i wafa, Adadi, Bedadi
natuna i ve-kini taunina tutulina, 'atamana
Aviti 'wainega i ve-kini. Kumanina
basenadiotoga me Midiani i leodi 'awalawa
Moabe 'waineye nika i vetoketoke-'iawedi.
- ³⁶ Tutuyanina Adadi i wafa, Samala 'atamana
Maseleka 'wainega i ve-kini taunina tutulina.
- ³⁷ Tutuyanina Samala i wafa, Saulo tomogo
Leobota ufa vi'ainega i ma'itufa i vekini.
- ³⁸ Tutuyanina Saulo i wafa, Beli-anani, Akibo
natuna i ve-kini.
- ³⁹ Tutuyanina Akibo natuna Beli-alani i wafa,
Adadi i ve-kini yana 'eba veimea kebu 'ida
baileni, we'e yana 'atamana Fau 'wainega i
veveimea. Yana vavine 'adi wagava
Metabela, taunidi Matedi natuna wata
Me-Saeba tubuna.

⁴⁰ Iso tubunavo side 'adi wagava, taunidi
to'edakumetavo. Tutuyanina Iso tubunavo i
ve'alatubutubuga 'adi wagava 'asa'aiana 'adi
wauma i goledi, 'atamananidi side 'adi wagava,
Timina, Aleva, Ieteti,

⁴¹ Olibaima, Ila, Finoni,

⁴² Kenasi, Temani, Mibisa,

⁴³ Magidiela, Ilamu. Side bani'odi me Idomu
yadi to'edakumetavo, 'adi wauma wata yadi 'eba
mia 'aitamogana 'aitamogana 'adi wagava i
goledi 'awalawanidi 'waidie. Tomotoganidi
matatabudi Iso 'ana wauma 'wainega i souyedi,
me Idomu tubudiavo.

37

Iosefa 'ana 'enoneganega

¹ Iakobo i miamia Kenani 'waineye, basenadi bei tama9na i vewakawaka.

² Iakobo ma natunavo ifuifufudi side bani'odi.

Iosefa i vetubuau 'ana malamala 17, 'aisaya sifi wata goti i 'i'isave'avinidi gidegideye tatanavo taiadi, kumanidiavo tamana yana vevinevo Bilani wata Silifa natudiavo. Yadi sauluva sakoina valana Iosefa i lu'ivoneyeni tamadi 'waineye.

³ Iakobo natuna Iosefa i nuakalikalieni bwaikina we'e tatanavo 'ifwaidi sai'afo, fai yana ve'auvea 'waineye kwamananina i tubuga. Tamana talauma 'ana 'isa 'atumaotogina i 'idewai Iosefa i veleni.

⁴ Tatanavo i 'iseni i 'asetai tamadi Iosefa i nuakalikalieni bwaikina we'e tatanavo 'ifwaidi sai'afo, begaidi tatanavo i vedumwe'ai'aieni i luluvuleweni, kebu nuanuadi taiadi i na veveifufuga.

⁵ Tamu lovana 'waineye Iosefa i 'enoneganega bega 'ana 'Enoneganeganina i veifufuyeni tatanavo 'waidie. Tutuyanina tatanavo i nogai, kamodi i ogala nika i toke i vedumwe'ai'aieni.

⁶ Iosefa i vonedi i vo, Nuanuaku 'aku 'enoneganega 'wa na vinenegeni.

⁷ I veku yada tanoga 'waineye witi ta 'i'ifafafa, nika a 'iseni yaku fafa ma 'itavina i luafwalagi i tovoovoi, we'e 'omi yami 'itava matatabuna yaku 'itava i miafifineni ma yadi ve'ililibu i 'odu'odu 'waineye.”

⁸ Tatanavo i voneni i vo, Igodi 'omu nuanuamu 'u na vetoveimea 'waimeye?" 'Ana 'enoneganega i noganogai wata ava'ai i voneyeniga, begaidi tatanavo i vematakilekileni.

⁹ Lovananina Iosefa wata i 'enoneganega-vaitugana i 'atai tatanavo 'waidie i veifufu i vo, 'Wa vainenega, tamu 'aku 'enoneganega 'ana veifufuyeni, tutuya de'e inala, weta'i wata 'ubwana 11 i na 'odu'odu 'waikuye."

¹⁰ Mulieta Iosefa i veifufuyeni tamana wata tatanavo 'waidie, nika tamana i talabodeni i vo, 'Amu 'enoneganega 'ana 'aseta bani'odi? 'U da nuani inamu, yau wata tatamwavo a na 'odu 'waimuye?"

¹¹ Tutuyanina tatanavo i nogai i ve'unumagigieni, we'e tamana nuana i 'ivi'ivina i vo, 'Enoneganeganina 'ana 'aseta ava'ai?"

Iosefa tatanavo i vekimwaneyeni

¹² Tamu 'aiata Iosefa tatanavo i nagoi Sekemu tamadi yana 'aisayavo i 'i'isave'avinidi.

¹³ Iakobo natuna Iosefa i voneni i vo, Nuanuaku 'u na nago Sekemu tatamwavo 'aisaya i 'i'isave'avinidi 'u na fogedi."

Iosefa i vo, Tamaku 'atumaina, a na nago."

¹⁴ Tamana i vo, 'U na nago tatamwavo 'u na fogedi bega 'u na 'asetai yada 'aisayavo taiadi 'atumaiddi 'alo kebu? Valadi 'u na mieni 'u na voneku." Nika Iosefa i tauya Ebiloni Laube'uneamo i nago i le'wa Sekemu.

¹⁵ Tamu tomogo Iosefa i veluagai i yabayaba 'awalawanina 'waineye i velutolieni i vo, Ava'ai 'u lulualeni?"

¹⁶ Iosefa i vo, Tatakwavu a lulualedi. 'U da 'asetai, ava'aibe tatakwavu 'aisayavo i 'i'isave'avinidi?"

¹⁷ Tomogonina i vo, 'Akonadi 'awalawa de'e i 'iaweni, fai a nogai i vo, Ta na tauya de'e bega ta na nagoi 'awalawa Dotani." Iosefa i tauya tatanavo mulidie i nagoa nika i veluagadi Dotani.

¹⁸ Tutuyanina i 'isanaweni i mimai sai'afoga i na le'wa 'waidie, nika 'aise'avadi givagivayega i veifufu taidi 'ana 'ainike faifaina.

¹⁹ Ma ediavo i vo, 'Wa 'isanaweni, to'enoneganega i mimai 'waideye.

²⁰ 'Wa tovoi ta na nika ta na taweni i na obu ovuye, i na 'a'avana ta na nago tamada 'waineye ta na veifufu ta na vo, 'Aisaya walawala'ai kasikasisina i ovai.' 'Ai'edi i na wafaga kebu tamu sai'afo 'ana 'enoneganeganidi 'adi mogitana i na souyedi."

²¹⁻²² We'e Lubeni enavo yadi veifufu i nogai nuanuana Iosefa i na 'ita'ita'ieni. Bega i vonedi i vo, Ke bu ta na luvewafaiga wata nimadega ke bu dayagina i na ilolo, we'e side bei sali'avu'avuye ta na taweni i na obu ovuye." Lubeni bani'odi i voneyediga fai nuanuana Iosefa i na 'ita'ita'ieni tainavo 'waidiega bega i na vevilai tamana 'waineye.

²³⁻²⁴ Tutuyanina Iosefa i le'wa, tatanavo i 'ive'avini 'ana talauma 'ana 'isa 'atumaina i sita'ia, i taweni i obu ovuye, ovunina lalana wata nage'avana.

²⁵ Nika i miabui i velamu i na ve'ala'ani, i 'isanago me Isimeli 'ifwaidi i 'isanawedi i mimai 'awalawa Giliadi 'wainega. Tomotoganidi

tovekimwane ma yadi 'aisayavo kameli,
kwavudie 'ani'ani 'ana 'eba 'ive'iwana wata vane
magaidi 'atumaivotogidi i vedodoga, i obuobu
Itifita vekimwane faifaina.

²⁶ Nika luda i vona enavo 'waidie i vo, Ava'ai
'ana 'atumaina taida ta na luvewafai wata
vovona ta na giveni?

²⁷ Kebu ta na nikeiga fai taida, 'ida dayaga
'aitamogana, we'e ta na vekimwaneyeni me
Isimeli 'waidie." Nika luda yana nuanuananina
enavo i awave'atumaieni.

²⁸ Tutuyanina tovekimwanenidi* i le'wai,
tatanavo i nago Iosefa i silakai ovuyega i mieni i
vekimwaneyeni 'waidie 'ana tutula siliba 20, nika
me Isimeli i 'ewai i naweni Itifita.

²⁹ Tutuyanina Lubeni yabayega i le'wa, i nago
ovunina Iosefa bei i miamiaga i 'isa'avai. Lubeni
nuana i vekalikalia nika taunina 'ana talauma i
silabu'i.

³⁰ I vilai i mai tainavo 'waidie i vo, Iosefa no'o
kebu, ovu nage'avana, bani'odi a na
veifufuyedi?"

³¹ Nika 'aisaya goti i nikei dayaginega Iosefa
'ana talauma i lusamasamali.

³² I 'a'avana talaumanina i 'ewai i naweni
tamadi 'waineye i veni i vo, De'e talaumanina 'a
veluagai, 'u da 'iseni, de'e natumu 'ana talauma
'alo aitoi?"

³³ Tamadi i 'isa'innanai mogitana Iosefa 'ana
talauma bega i vo, 'Asa'aiana kumanina. A 'asetai
'akonadi 'aisaya walawala'ai i sitototogi i 'ania."

37:28: Fol 7:9 * **37:28:** 'Ana mogitana vona Ibeliu 'waineye me
Midiani, tamu me Isimeli 'adi wagava.

³⁴ Ma yana nuavita bwaikina Iakobo 'ana talauma taunina i silabulabu'i, talauma sakoina i ve'weseneni bega tutuya manamanawena natuna faifaina i vevemogai.

³⁵ Natunavo matatabudi iavetadi wata vevinedi i maia nuanuadi tamadi nuana i na 'iveololoi siwe i baila kebu nuanuana. Bega i vo, Natuku faifaina a na vevemogai i na nagoga 'ana tugusa yawaiku i na 'a'ava." Yana nuavita natuna faifaina kebu tamu sai'afo i da 'a'ava.

³⁶ Tutuyanina 'waineye me Midiani i le'wai Itifita, Iosefa i vekimwaneyeni Fotifali kini Felo yana vanuga 'ana tolumadu'ai 'adi to'edakumeta 'waineye.

38

Iuda wata Temali

¹ Tutuyanina 'waineye Iuda yana 'atamana i 'iaweni i nago 'atamana Adulami, bei tamu tomogo 'ana wagava Ila taiadi i mia.

² 'Atamananina 'waineye tamu vavine Kenani i 'iseni, taunina Sua natuna, i nagidi taiadi i 'eno.

³ Mulieta i miana i venatuna kwamana iavetana i tubuga i goleni Eli.

⁴ Tutuya 'ifwaidi i 'a'avana wata i miana, mulieta natudi iavetana i tubuga i goleni Onani.

⁵ Tutuyanina 'atamana Kesibi bei i miamia, yadi miana 'ana vetonu 'waineye, natudi iavetana i tubuga 'ana wagava i goleni Sila.

⁶ Iuda tamu vavine ne'e'elina 'ana wagava Temali i vagavaia, natuna tubu'edakumeta Eli yana vavine.

⁷ We'e Eli yana sauluva sakoiotogina 'AUVEA mataneye, begaidi Yaubada i luvewafai.

⁸ Bega Iuda Onani i voneni i vo, Nuanuaku 'wabula Temali 'u na nagidi. Tamu yada veimea i 'eno'eno aitoi tatana i na wafa, tatana 'wabulina i na nagidi. Bega i na venatuna tatana a na wagava faifaina.' "

⁹ We'e Onani kebu nuanuana tatana 'wabulina i na venatuna, tutuyanina taiadi i veveluaga, ufa i veve'amubwadodoyeni fwayefwayeye. Begaidi kebu 'ana fata tatana yana vavine i na venatuna bega yana 'eba veimea i na veimeyedi.

¹⁰ Onani naninina 'idewaiga sauluva sakoiotogina 'Auvea mataneye, begaidi 'AUVEA wata i luvewafai.

¹¹ Bega Iuda natuna 'wabulina Temali i vonedi i vo, 'wa na vilami tamami yana 'atamane, 'ana tugusa natuku Sila i na taulai nika taiadi 'wa na nagi." Siwe Iuda kebu nuanuana Sila i na wafa tatanavo bani'odi," begaidi Temali i viladi i tamadi yana vanuge.

¹² Malamala 'ifwaidi i 'a'ava, Iuda yana vavine Sua yawaidi i 'a'ava. Tutuyanina vemogai i 'a'ava, Iuda ma iana Ila tomogo Adulami i nago 'atamana Timina, sifi vutuvutudi 'adi to 'aibobo i na fogedi .

¹³ Tamu tomogo Temali i vonedi i vo, Iaku , lawami i nunago 'atamana Timina, yana sifi vutuvutudi i na bobodi."

¹⁴ Temali i 'asetai Sila 'akonadi i taulai kebu tamu aitoi yadi nagi 'ana 'eda i da 'idewai. Begaidi 'wabula 'ana vaigavu i taidi, ma'itufa 'unu'unudi 'ana baniumai i 'ewai tomogodi i talaumai 'adi

'isa i sivedamana. I nago 'eda lilivaneye i miabui 'atamana Enaimu 'ana 'awa 'eba luku 'waineye, 'edanina i nunago Timina 'waineye.

¹⁵ Tutuyanina Iuda vavine i 'isedi i vo, 'ako tamu vavine toalagogona, fai maigidi i baniumai.

¹⁶ Tutuyanina Iuda vavinenidi i 'isedi kebu i da 'asetai natuna 'wabulina. Bega i vonedi i vo, nuanuaku taiadi ta na veluaga.” Siwe kebu i da 'asetai natuna 'wabulina. Temali i vo, 'ako taiadi ta na veluaga we'e 'ama tutula a na vebwaika 'aivia?”

¹⁷ Iuda i vo, Tamu goti tubuvauvauna a na vetunei yaku 'aisaya 'wainega. Nika Temali i vo, ava'ai 'u na veleku yamu veifufu 'ana tugusa?”

¹⁸ Iuda i vo, Ava'ai tugusaga nuanuamu 'ana 'idewai 'waimuye?” Temali i vo, 'amu wagava ma 'ana didikumakuma ma bulavina wata yamu wautogana nimamuye 'u na velema.” Bega Iuda naninidi i veledi, mulieta taiadi i veluaga nika i miana.

¹⁹ I 'a'avana i viladi yadi vanuge, 'adi talauma i taidi ma'itufa 'wabula 'ana talauma 'wainega i talaumadi.

²⁰ Mulieta Iuda iana Ila, tomogo Adulami i voneni i vo, 'U na nago goti tubuvauvauna vavine 'u na veledi, ma'itufa kukuanidi a velediga 'u na 'ewadi.” Siwe Ila vavinenidi kebu i da veluagadi.

²¹ Begaidi tomotoga 'ifwaidi miamianiga i velutoliedi i vo, “Ava'aibe bei tamu vavine toalagogona i miabui i miamia 'eda lilivaneye, Enaimu a na 'eba luku a na veluagadi?”

Yana velutoli i tutuli i vo, Kebu tamu toalagogona de'e bei i da miamia.”

22 Bega Ila, i vilai i nago Iuda 'i voneni i vo, Vavinenidi kebu a da veluagadiga wata 'atamananina 'ana tomotoga i voneku i vo, De'e bei kebu tamu vavine toalagogona i da miamia.' ”

23 Bega Iuda i vo, 'asa'aiana kukuanidi a veledi 'waidie i na 'eno'eno. Sifi tubuvauvauna a vetunei yama veakutagona faifaina, siwe vavinenidi kebu 'u da veluagadi. 'Ai'edi ta na vilada vavinenidi ta na lulualediga, bola tomotoga fueidi i na sidibidibieda .”

24 Weta'i 'aitonu i 'a'ava, mulieta tamu tomogo i mai Iuda 'waineye i veifufu i vo, Temali lawamu kumanidi toalagogona yadi sauluvayega i nago nika 'akonadi i miana.”

Begaidi Iuda i vo, 'Wa na vagavaidi ta na nawedi ta na kabunidi.”

25 I vagavaidi i nunawedi i na luvewafadi faifaina nika vala i vetunei lawadi 'waineye i vo, tomogonina toni kukua kumanina ive'ina'inagema, Bega aitoi yana tugusa bulava 'waineye wata yana wautogana de'e?”

26 Tutuyanina Iuda i 'isa'inanadi begaidi i vo, Kumanidi yadi sauluva tonovina mulieta yau, Fai yau natuku Sila kebu a da tauyeni taiadi i da nagi.” Wata kebu tamu tutuya Iuda Temali taiadi i da 'eno.

27 Tutuyanina Temali yadi venatuna 'ana 'aiata i veluagai, nika tomotoga i 'asetai kwakwama 'adi 'ailuga kamodie.

28 Tutuyanina i vebutudi tamu kwamana nimana i souyeni, vavine to'isave'avina i 'abi nimaneye i yogoni, nimaneye bulava

yamoyamoina i yogoni i vona i vo, De'e kumanina nagami i tubuga.”

²⁹ Siwe nimana i vilai i luku nika taina iavetana i vemageta. Bega vavine to'ivevauvau i velutoli i vo, Bani'odi 'u munega 'u kumeta?” Begaidi kwamana 'ana wagava i goleni Felesi.

³⁰ Mulieta kwamana i tubuga, nima'odona 'waineye bulava yamoyamoina i 'eno'eno, 'ana wagava i goleni Sela.

39

Iosefa wata Fotifali yana vavine

¹ Tutuyanina me Isimeli Iosefa i vagavaia i naweni Itifita, i vekimwaneyeni tamu tomogo 'ana wagava Fotifali 'waineye. Tomogonina i vetomata'ai'ai Felo* yana tolumadu'ai i 'e'edakumesedi Itifita nageneye.

² Iosefa i vetofolova-maimaiga Fotifali faifaina, we'e i miamia yana vanuge, 'AUVEA Iosefa i 'i'isave'avini bega yana folova 'atumai'avadi nani matatabuna 'waidie.

³ Fotifali i 'iseni bega i 'asetai 'AUVEA Iosefa taiadi i miamia wata yana 'aivaita 'wainega Iosefa i folova-'atumai nani matatabuna 'waidie.

⁴ Fotifali i sosoaneni wata ma 'ana vetumagana bega i silakai yana tofolova kumekumetana, i veto'isave'avina yana vanuga wata yana kukua matatabuna 'waidie.

⁵ Tutuyanina 'waineye Fotifali nani matatabuna i 'anivelenedi Iosefa 'waineye i na 'i'isave'avinidi, nika Iosefa faifaina 'AUVEA i

* **39:1:** Felo 'asa'aiana Itifita 'ana kini **39:2:** Fol 7:9

vevesauluva 'atumaina tomogonina yana 'aila'a wata yana kukua matatabuna 'waidie, yana vanuga nageneye wata yana bakule.

⁶ Fotifali nani matatabuna i Iosefa nimaneye i yatodi i na veveimeyedi, kebu tamu ava'ai faifaina i da nuanua, 'ani'ani 'aisena faifaina i vevenua'ivina.

Iosefa tomogo toketokena wata ma 'ana magisisi.

⁷ Mulieta Fotifali yana vavine i nuagiva bunu 'ana nuanua sakoina faifaina, i velu'uieni nuanuadi Iosefa taiadi i na 'eno.

⁸ Siwe i baila wata i vonedi i vo, 'Aku toveimea nani matatabuna faifaidi i vetumaganeku a 'i'isave'avinidi, kebu tamu ava'ai faifaina i da nuanua.

⁹ Kebu tamu aitoi vanuga de'e 'waineye i da mialaka 'waikuyega, 'aiseotogiku 'aku tauya fai kebu tamu ava'ai i da talabodeni 'waikuyega, we'e 'omi 'aisemi kebu 'aku tauyaga fai yana vavine. Kebu i da lubwaineku sauluva sakoina a na 'idewai bega a na sakona Yaubada mataneye."

¹⁰ Tutuya fuedi Iosefa i lulukakadeni bunu 'ana nuanua sakoina faifaina siwe Iosefa i baila-'afo'afo.

¹¹⁻¹² Tamu 'aiata 'waineye kebu tamu aitoi i da miamia vanuge, Iosefa i luku i na folova faifaina, nika bei Fotifali yana vavine Iosefa 'ana talauma i 'ive'avini i vo, Taiadi ta na 'eno." Iosefa i lufelefeledi i dega i obu 'atamane 'ana talauma'ava i sieloi.

¹³⁻¹⁴ Tutuyanina i 'asetai 'akonadi i dega i obu 'atamane, we'e talaumanina nimadie, i vevegolegole yadi tofolova-maimaiga 'ifwaidi i

maia 'waidie i vo, 'Wa 'iseni, yama lamoga tomogo Ibeliu i vagavaia i mieni 'waideye siwe i 'ivebunumayagida. I mai yaku tutudaba 'waineye igodi i da 'ive'avinima bunu 'ana nuanua faifaina siwe 'a toke a vegolegole.

¹⁵ I nogai a vevegolegole 'aivaita faifaina, i dega 'ana talauma i 'iaweni.”

¹⁶ Talaumanina i 'ewaiga i kiave'avini 'ana tugusa Fotifali i vilai i mai vanuge.

¹⁷ Bega valanina i veifufuyeni 'waineye i vo, 'Omu tomogo Ibeliu 'u mieniga i luku 'waimeye nuanuana i da 'ivebunumayagima.

¹⁸ Igodi i da 'ive'avinima a toke a vevegolegole 'ana talauma i 'iaweni i dega i obu 'atamane.”

¹⁹ Tutuyanina yana vavine i lu'ivona ava'ai i souyeniga 'waidie, Fotifali i nuasako-'afo'afo.

²⁰⁻²¹ Bega Iosefa i 'ive'avini i naweni vanuga 'eba yogona 'waineye, bei Felo tosakona i yogoyogonidiga 'waineye.

Bei vanuga 'eba yonganina nageneye Iosefa i miamia, 'AUVEA i 'i'isave'avini wata ma yana nuakalikali i vevesauluva 'atumaina 'waineye, we'e vanuga 'eba yogona 'ana to'isave'avina i 'iseni i awave'atumaeni.

²² Bega Iosefa i silakai i vetoveimea enavo 'ifwaidi 'waidie wata i veto'isave'avina nani matatabuna 'waidie.

²³ Vanuga 'eba yogona 'ana to'isave'avina kebu tamu nani faifaina i da nuanua Iosefa yana 'eba veimea 'waineye fai 'AUVEA Iosefa taiadi i miamia wata yana 'aivaita 'wainega Iosefa i folova-'atumai nani matatabuna 'waidie.

40

Ufa oine 'ana to'anivelena wata 'ani'ani 'ana to'anikabu

¹⁻² Tamu tutuya Felo 'ana ufa-oine 'ana to'anivelena wata 'ani'ani 'ana to'anikabu i vesauluva-sako Felo 'waineye bega i nuasako yana tofolovavonidi 'waidie.

³ I yatodi vanuga yogona nageneye bei Iosefa i miamia 'waineye, 'eba yogonanina tovemata'ai'ai yana vanuga bwaikina nageneye.

⁴ Tovemata'ai'ainina Iosefa i voneni tofolovanidi 'adi 'ailuga i na 'i'isave'avinidi, tutuya manamanawena bei i miamia.

⁵ Bola i miamia vanuga 'eba yogona 'waineye, tamu lovana 'waineye ufa-oine 'ana to'anivelena wata 'ani'ani 'ana to'anikabu Felo faifaina i 'enoneganega, 'adi 'enoneganeganidi 'adi 'aseta tulina tulina.

⁶ I 'atai, Iosefa i mai 'waidie, i 'isedi nuafoudi i veviga.

⁷ Iosefa i velutoliedi i vo, Awale 'wa nunuavita?"

⁸ Iosefa yana vona i tutuli i vo, 'Ama 'ailuga 'a 'enoneganega siwe kebu tamu aitai 'ana fata 'adi 'aseta mogitana i na vonema."

Iosefa i vo, Yaubada 'aisena 'enoneganega 'adi 'aseta i na voneda. 'Ami 'enoneganeganidi 'wa na lu'ivoneyedi 'waikuye."

⁹ Bega ufa-oine 'ana to'anivelena 'ana 'enoneganega Iosefa 'waineye i veifufuyeni i vo, A 'enoneganega i veku, welavi kalefa manawakuye i tovofovoi.

¹⁰ Welavinina didina 'aitonu, i lukulukuta nika idina i fua i nagoga vuagidi walo bwaikidi.

¹¹ Wata i veku Felo 'ana vedi nimakuye, bega welavinina vuagina a kadidi a tanidi i obu 'ana vedie mulieta oine ma vedina a veleni."

¹² I vona'a'ava Iosefa i vo, 'Amu 'enoneganega 'ana 'asete side bani'odi, welavi didina 'aitonu 'ana 'asete 'aiata 'aitonu.

¹³ 'Aiatanidi 'aitonu i na 'a'ava i na yavumu vanuga 'eba yogona 'wainega i na silakaimu i na vevilamu yamu folova tuatuaina 'waineye. Bega ufa-oine ma vedina 'u na 'i'idewadewai Felo faifaina 'u na veleleveleni basenadi bani'odi.

¹⁴ 'Awaie yamu 'atumaina 'u na veluagaiga nuanuaku 'u da nuanuaniku, ava'ai a 'idewai faifaimu 'u na lu'ivoneyeni Felo 'waineye bega i na yavuku a na souyeku vanuga 'eba yogona 'wainega.

¹⁵ Yau tomogo Ibeliu yaku 'awalaweeye a miamia nika 'ifwaidi tomotoga i vinagoku i mieku Itifita i vekimwaneyeku. Tutuya de'e a miamia vanuga yogona nageneye, siwe kebu tamu yaku sakonaga bega vita de'e a veluagai."

¹⁶ Tutuyanina 'ani'ani 'ana to'anikabu i nogai iana 'ana 'enoneganega 'ana 'asete 'atumaina, Iosefa 'waineye i vo, Yau wata a 'enoneganega side bani'odi i veku. Bayawa 'aitonu ma 'ani'aninidi a gabagabadi.

¹⁷ Tamu bayawa tabwaneye 'ani'ani kabukabunidi tulina tulina nagedie Felo faifaina siwe manuga i maia i 'ani'anidi."

¹⁸ Iosefa i voneni i vo, 'Amu 'enoneganega 'ana 'asete side bani'odi i vemu, bayawa 'adi 'aitonu

'ana 'aseta 'aiata 'aitonu.

¹⁹ 'Aiatanidi 'aitonu i na 'a'ava Felo i na veimea 'unu'unumu i na silakai 'odomu i na boboi we'e tomogomu i na lutalauleni welavi 'waineye, manuga fuedi i na maia vovomu i na 'ani'ania.”

²⁰ Iosefa i vona'a'ava, mulieta 'aiata 'aitonu i 'a'ava, Felo yana 'aiata tubuga 'ana 'eba nuave'avina 'waineye sakali bwaikina i 'idewai yana tofolovavo faifaidi. Felo i veimea, ufa-oine 'ana to'anivelena wata 'ani'ani 'ana to'anikabu i miedi 'waineye.

²¹ Felo ufa-oine 'ana to'anivelena i silakai i vevilai yana folova tuatuaina 'waineye bega ufa-oine ma vedina i na mimaieni i na veleveleni.

²² We'e Felo i veimea 'ani'ani 'ana to'anikabu i luvewafai i lutalauleni welavi tabwaneye nika ava'ai Iosefa i voneyeniga 'ana mogitana i souyeni 'waineye.

²³ Ufa-oine 'ana to'anivelena nuana i fani kebu tamu sai'afo Iosefa yana nuanua i da 'idewaiga.

41

Felo 'ana 'enoneganega

¹⁻² Malamala 'ailuga i 'a'ava, mulieta Felo i 'enoneganega. 'Ana 'enoneganega 'waineye i veni taunina 'anununa i 'iseni i tovoovoi Ufa Naili lilivaneye, ufanina 'wainega 'aisaya bulumakau 'adi 7 tomogodi bikadi wata 'adi tubuga 'atumaiddi ufayega i lakama, bega i velamu mosomoso i 'ani'ani.

³ Mulieta wata i 'isedi 'aisaya bulumakau 'adi 7 lumalumadi i lakama ufayega, ma fuedie i tovoovoi ufa lilivaneye.

⁴ Nika wata i 'isedi 'aisayanidi lumalumadi ediavo 'adi 7, kumanidiavo tomogodi bikadi wata 'adi tubuga 'atumaidi i 'anidi. I 'a'avana nika Felo i 'isa.

⁵ Yana 'eno 'ana veluga 'waineye, wata i 'enoneganega-vaitugana. I veni fekafeka 'adi 7 'adi 'isa 'atumaidi wata lukudi 'ala'alawidi we'e tolobwana 'aitamogana 'waineye, vuagidi tabodadi wata kumagidi.

⁶ Mulieta wata i 'iseni fekafeka 'adi 7 i 'etofiala fwayafwayayega, yegayegadi wata 'awagi'adi, tutuyanina kaukau yauyaugina bolimanayega i nunuga, i yagivebwavudi.

⁷ Fekafeka vuagidi yegayegadi wata luanalidi 'adi 7 fekafeka 'adi 'isa 'atumaidi tabodadi 'adi 7 i tononidi. 'Enoneganega matatabuna i 'a'ava, nika Felo i 'isa 'ana 'enoneganega i nuanidi, bega i vona i vo, De'e 'ana wagava 'enoneganega.

⁸ Felo i 'enovilai bola 'awa'awaiogose, 'ana 'enoneganega i nuanidi i venua'ivinedi siwe kebu nuana i da magetai. Bega vala i vetunei me Itifita tove'wasa'wasala wata to'aseta bwaikidi matatabudi i mai 'waineye. Felo 'ana 'enoneganega i veifufuyedi tomotoganidi 'waidie siwe kebu tamu aitoi 'ana sala 'enoneganeganidi i na siviladi.

⁹ Mulieta ufa-oine 'ana to'anivelena i voneni i vo, 'Asiauotoga yaku yogosako a nuani bega a na veifufuyeni.

¹⁰ Tutuyanina 'waineye 'ani'ani 'ana to'anikabu wata yau 'u nuasakoyema, 'u yatoma tolumadu'ai yadi mata'ai'ai yana vanuga 'eba yogona 'waineye.

¹¹ Tamu lovana 'waineye 'ama 'ailuga 'a 'enoneganega, we'e 'enoneganeganidi 'adi 'aseta tulina tulina.

¹² Tutuyanina 'waineye tamu tomogo Ibeliu tubuauna taiadi 'a miamia, kumanina tolumadu'ai yadi mata'ai'ai yana tofolova. Bega 'ama 'enoneganeganidi, a veifufuyedi 'waineye nika 'adi 'aseta mogitana i kiavemagetadi 'waimeye.

¹³ Yana kiavemagetanidi 'adi mogitana i souyedi, yau 'u vevilaku yaku folova tuatuaina 'waineye, we'e tolugaviavo 'u veimeyedi 'ani'ani 'ana to'anikabu 'odona i boboi we'e tomogona i lutalauleni welavi 'waineye."

¹⁴ I vona'a'avana Felo i veimea Iosefa i na mieni vanuga 'eba yogona 'wainega. Iosefa nagami fogena i taladabai wata 'ana talauma 'atumaiddi i ve'wesenedi, i 'a'avana i vagavaia i naweni Felo 'waineye.

¹⁵ Felo Iosefa i voneni i vo, A 'enoneganega siwe kebu tamu aitoi 'ana fata 'enoneganeganina i da kiavemagetai 'waikuye, we'e 'ifwaidi tomotoga i voneku i vo, 'Omu 'amu fata 'enoneganega 'adi 'aseta mogitana 'u na kiavemagetadi."

¹⁶ Iosefa ma yana ve'ililibu i tutula i vo, Yau kebu 'aku fataga, we'e Yaubada 'ana 'aseta mogitana i na sivemageseni 'waimuye bega nuafoumu i na vatu."

¹⁷ Bega Felo Iosefa i voneni i vo, 'Aku 'enoneganega 'waineye, tauniku a 'iseku a tovoovoi ufa Naili lilivaneye.

¹⁸ Nika a 'isanago bulumakau 'adi 7 a 'isedi ufayega i lakama, 'adi 'isa 'atumaiddi ma 'adi

tubuga, i velamu mosomoso 'ala'alawidi i 'ani'ani.

¹⁹ Mulieta wata a 'isedi bulumakau 'adi 7 lumalumadi wata vivigidi ufayega i lakama ediavo mulidie. Yaku mia Itifita nageneye, kebu tamu tutuya bulumakau 'adi 'isa sakoidi bani'odi a da 'ise'isedi.

²⁰ Bulumakaunidi 'adi sakoidi wata lumalumadi, bulumakau ma 'adi tubuga 7 i 'anidi.

²¹ Avinodi bulumakau 'adi 'isa sakoidi wata lumalumadi, we'e bulumakau ma 'adi tubuga i 'anidi, siwe kebu tamu 'adi 'isa i da sivedamana, 'asa'aiana 'adi 'isa'isanina bani'odi. 'Aku 'enoneganega i 'a'ava, nika a 'isa.

²² 'Enoneganeganina 'waineye a 'iseniga, fekafeka vuagidi 7 'adi 'isa 'atumaiddi wata tabodadi tolobwana 'aitamogana 'waineye i 'eno'enovi.

²³ Mulieta wata 'adi 7 i ve'alatabotabo siwe 'awagi'adi wata yegayegadi, kaukau inala yana 'eba lakayega i nunuga i yayagidi nika i 'awagi'adi.

²⁴ Fekafeka vuagidi luanalidi wata yegayegadi 'adi 7 i tovoi fekafeka vuagidi tabodadi wata 'atumaiddi 'adi 7 i tononidi. 'Enoneganeganidi matatabuna a veifufuyedi tove'wasa'wasala wata to'aseta bwaikidi 'waidie, siwe kebu tamu aitoi 'ana fata i na kiavemagetadi 'waikuye."

²⁵ Iosefa Felo i voneni i vo, 'Enoneganeganidi 'adi 'ailuga we'e 'adi 'aseta i vesala. 'Akonadi Yaubada i sivemagesedi 'waimuye naninidi sai'afoga i na 'idewadi.

²⁶ 'Aisaya bulumakau 'adi 7 'atumaiddi 'asa'aiana malamala 7 wata fekafeka 'adi 7

'atumaiddi 'asa'aiana malamala 7, begaidi
'enoneganega 'adi 'ailuga siwe 'adi 'aseta i vesala.

²⁷ We'e bulumakau lumalumadi 'adi 7 i
souyediga 'ana 'aseta malamala 7. Wata bani'odi
fekafeka 'adi 7 kaukau bolimanayega i
yagivebwavudi, 'ana 'aseta malamala 7,
malamalanidi nagedie loka bwaikina i na
sousouyeni.

²⁸ Naninidi a lu'ivoneyedi fai Yaubada taunina
'akonadi i sivemagesedi 'waimuye bega sai'afoga
i na 'idewadi.

²⁹ Malamala 7 nagedie malia bwaikina i na
souyeni 'awalawa Itifita yana 'eba veimea
matatabuna 'waineye.

³⁰ We'e malia mulineye malamala 7 nagedie
loka bwaikina i na souyeni bega Itifita yana
fwayafwaya matatabuna i na lala, nika malia
'ana 'atumaina matatabuna ta na venuafania.

³¹ Fai loka bwaikaotogina i mimai bega yada
fwayafwaya vuagina bwaikina kebu 'ada fata ta
na nuanuani.

³² 'Enoneganega 'ailuga i luvaituganidi
'waimuye fai Yaubada yana nuanua toketokena i
yato-vagaseni bega sai'afotoga i na 'idewai.

³³ Begaidi 'omu Felo i lubwainemu, tamu
tomogo 'u da venua'ivineni yana 'aseta bwaikina
wata yana nuanua magemagetana bega
kumanina i da veto'isave'avina Itifita nageneye.

³⁴ Wata 'ifwaidi to'edakumetavo 'u da yatodi
bega malia 'ana malamala 7 'waidie to'aile'wa
'ani'ani kwau 5 i da 'etokwaudi, we'e kwau
'aitamogana i da 'ewai faifaimu.

³⁵ Malia 'ana malamala 'waidie 'ani'aninidi i da

talavetuadi bega i da vedodogidi yamu
bubuwakeye 'atamana bwaikidi 'aitamogana
'aitamogana 'waidie wata i da veve'isabodeni.

³⁶ Tutuyanina loka 'waineye malamala 7
nagedie i na maiga, 'ibuanina 'wainega me Itifita
i na 'i'ivaiseda ta na miamia nika laseyega kebu
ta na wafaga.”

³⁷ Nuanuananidi Felo wata yana
to'edakumetavo matatabudi 'waidie, 'adi nogaya
'atumai'avadi.

³⁸ Bega Felo yana to'edakumetavo i vonedi i vo,
A nuani kebu 'ada fata tamu tomogo Iosefa
bani'odi ta na veluagai, tomogonina Yaubada
'anu'anununa 'waineye i miamia.”

³⁹ Felo Iosefa 'waineye i vo, Fai Yaubada
naninidi matatabuna 'akonadi i sivemagesedi
'waimuye, kebu tamu aitoi yana 'asete wata yana
nuamageta 'omu bani'odiga.

⁴⁰ Begaidi 'omu 'asa'aiana a venua'ivinemu 'u
na veto'isave'avina yaku 'eba veimea 'waineye
wata yaku tomotoga matatabudi yamu veimea i
na vematayakeyakedi, we'e didiga 'ana ve'ililibu
'awalawa de'e 'waineye yau a mialaka mulieta
'omu.”

⁴¹ Wata i vo, Tutuya de'e 'wainega bega i na
nagoga a venua'ivinemu bega 'u na
veto'isave'avina 'awalawa Itifita matatabuna
nageneye.”

⁴² Felo 'ana didikumakuma nimanega i ta'ia
bega Iosefa nimaneye i veagei,
didikumakumanina Felo yana tugusa* 'waineye i

41:40: Fol 7:10 **41:42:** Dan 5:29 * **41:42:** Tugusanina 'eba
'isa Iosefa Felo 'ana wagavayega i veveimea.

'eno'eno. Tamu talauma 'ana 'isa 'atumaina wata
'ana tutula bwaikina 'ana wagava lineni i 'ewai
bega 'wainega i ve'weseni. I 'a'avana, fwasalu
golida 'wainega i 'idewaiga, i 'ewai 'odoneye i
veagei.

⁴³ Bega Iosefa i dodoga, 'eba vetalaga 'ana
waka-yo'eyo'e 'waineye, i lililide we'e mulineye
tomotoga 'aila'a i vevegolegole i vo, 'Wa na 'odu
'waineye!" Fai Felo veimea i veleni Itifita
'awalawa matatabuna i na veimeyeni.

⁴⁴ Bega Felo Iosefa i voneni i vo, Yau Felo,
veimea a velevelemu Itifita 'awalawa
matatabuna 'u na veveimeyeni, siwe kebu tamu
aitoi a da tauyeni taunina yana nuanuayega i na
lakatagonimu, fai veimea 'ana didiga
'aiseotogimu 'ana toveimea."

⁴⁵⁻⁴⁶ Felo Iosefa 'ana wagava 'ivauna i goleni me
Itifita 'adi wagava 'wainega Safaneati-Fainea,[†]
mulieta Fotifela natuna Aseneati i venagia,
'awalawa Itifita matatabuna kumanina 'atamana
Oni 'ana tovelomu. Iosefa 'ana malamala 30 i
veluagai mulieta folova i velamu Felo 'waineye,
'awalawa Itifita matatabuna i veveimeyeni.

⁴⁷ Malamala 7 nagedie Itifita i malia 'ani'ani
'wainega.

⁴⁸ Bakula 'aitamogana 'aitamogana 'waidiega
'ani'aninidi i talavetuadi i nawedi bega 'atamana
'aitamogana 'aitamogana yana bubuwakeye i
vedodogidi.

⁴⁹ Iosefa lu'iawawa i 'ailove fai 'ani'ani
bwaikaotogina, lu'iawawa-wayoga bani'odi

[†] **41:45-46:** Safaneati-Fainea me Itifita bonadi 'ana saivila,
Yaubada i miamia wata i vonavona.

wala'ai 'ana 'ilukulukuta.

⁵⁰ Tutuyanina 'waineye, bola loka kebu i da velamu, Iosefa natunavo 'adi 'ailuga i tubuga. Yana vavine 'adi wagava Aseneati, tamadi tovelomu 'ana wagava Fotifela, 'atamana Oni 'wainega.

⁵¹ Iosefa natuna 'ana wagava i goleni Manasa, wata i vo, Fai tamaku yana vanuga 'ana tomia wata yau 'ama vita matatabuna Yaubada i 'ewa-yavuledi wata 'a nuatavunidi.”

⁵² Iosefa natuna bwasiona 'ana wagava i goleni Ifeleimi, wata i vo, Fai 'awalawanina 'waineye a miamiaga yaku mia vitana i 'ewayavuleni, we'e Yaubada yaku mia i luve'ivauya.

⁵³⁻⁵⁴ Itifita yana malia malamala 7 i nago 'ana 'eba ve'a'ava 'waineye nika loka bwaikina i velamu, 'asa'aiana Iosefa yana lu'ivona bani'odi. Loka bwaikina i souyeni fwayafwaya matatabuna 'waidie, we'e 'awalawa Itifita 'waineye 'ani'ani i 'eno'eno.

⁵⁵ Tutuyanina loka Itifita i susuli, tomotoga i velamu Felo 'waineye i vevelu'ui-nuakalikali 'ani'ani faifaina. Siwe Felo me Itifita matatabudi i vonedi i vo, 'Wa na nago Iosefa 'waineye wata ava'ai i na voneyeniga 'wa na 'idewadi.”

⁵⁶ Iosefa bubuaka i yavudi bega 'ani'ani i velamu i vevekimwane me Itifita 'waidie fai 'ani'ani i 'a'avaotoga.

⁵⁷ Fwayafwaya matatabuna 'waidiega tomotoga i mai Itifita, 'ani'ani i na kimwane Iosefa 'wainega fai yadi 'awalaweeye loka bwaikina i souyeni.

42

Iosefa tatanavo i nagoi Itifita

¹ Tutuyanina Iakobo Kenani i miamia vala i nogai Itifita 'waineye 'ani'ani i 'eno'eno. Natunavo i vonedi i vo, Kebu ma emiavo 'wa na vemata'isa'isaga.

² Vala a nogai 'ani'ani i 'eno'eno Itifita 'waineye, 'wa na nagoi 'ani'ani 'wa na kimwane faifaida, nika kebu ta na wafaga, ma yawaida ta na miamia.

³ Nika Iosefa tatanavo 'adi 10 i tauya i nago Itifita 'ani'ani kimwane faifaina.

⁴ We'e yadi tauyanina 'waineye Iakobo kebu nuanuana Iosefa taina Beniamina taiadi i na nagoga fai i kololo i na nunago wata i na ilagi.

⁵ Tutuyanina tokimwane 'ifwaidi i nunago 'ani'ani kimwane faifaina, Iakobo* natunavo taiadi i nago fai Kenani wata i loka.

⁶ Iosefa bola i veveto'isave'avina Itifita 'waineye wata kumanina 'ani'ani i vevekimwane yana tomotogavo 'waidie. Begaidi tutuyanina tatanavo i le'wai i 'odu 'waineye, wata i lumata'afufu fwayefwayeye.

⁷ We'e tutuyanina Iosefa tatanavo i 'isedi i 'isa'inanadi siwe yana vesauluva 'waidie 'wa da vo tamu tomogo tulina. Begaidi bonana aya'ainega i velutoli 'waidie i vo, 'Omi ava'aiega 'wa mai?' I tutula i vo, 'Ima Kenani 'wainega 'a mai, 'ani'ani 'a na kimwane."

⁸ Avinodi Iosefa tatanavo i 'isa'inanadi siwe tatanavo kebu i da 'isa'inanaiga.

42:2: Fol 7:12 * 42:5: Iakobo tamu 'ana wagava Isileli.

⁹ Nika 'ana 'enoneganega i nuani basenadi i 'enoneganega tatanavo faifaiddi, i vo, 'Omi tovetau'i wala 'wa maia 'wa 'isa'isa ava'aibe 'awalawanina kebu 'ana tolumadu'aiga beidimo 'wa na luku bega 'wa na tala'avuima."

¹⁰ Begaidi i taidaida i vo, Kebu, 'ima 'a maiga yamu tofolova-maimaiga 'ani'ani 'a na kimwane."

¹¹ 'Ima matatabuma tomogo 'aitamogana natunavo. Wata tomotoga 'atumaima, kebu 'a da mai 'ami vetau'i wala faifaina."

¹² Iosefa i vonedi i vo, Kebu, 'omi tovetau'i wala 'wa maia 'wa 'isa'isa ava'aibe bei kebu 'ana tolumadu'aiga, beidimo 'wa na lukuma 'wa na tala'avuima.

¹³ Tatanavo i voneni i vo, 'Ima 'ama 12, yamu tofolova-maimaiga. Matatabuma tamama 'aitamogana, kumanina i miamia 'awalawa Kenani. Taima 'ama 'walaboda tamama taiadi i miamia, we'e tamu iama kebu taiadi 'a da miamia."

¹⁴ Nika Iosefa i vonedi i vo, 'Akonadi a vonemi a vo, 'Omi tovetau'i wala.

¹⁵ 'Asiau taunimi faifaimi 'wa veifufu, we'e 'awasasa de'e yau ma'itufa yami veifufu faifaina a na sitonovimi. A vona'awaufaufa Felo 'ana didiga 'wainega, kebu 'ana fata Itifita 'wa na 'iaweni, nagami taimi 'ami 'walaboda i na mai.

¹⁶ Tamu 'waimiega i na nago taimi i na mieni 'waikuye, we'e 'ifwaimi vanuga yogona nageneye 'wa na miamia. Nagami yami veifufu a na sitonovi, 'wa vonaga mogitana 'alo 'wa vevekali.

'Ai'edi 'wa na vekaliga, A vona'awaufaufa Felo
'ana didiga 'wainega, 'omi tovetau'i'wala.

¹⁷ Bega Iosefa matatabudi i yatodi vanuga
yogona 'aiata 'aitonu i miamia.

¹⁸ 'Aiata 'ana vetonu 'waineye, Iosefa i vonedi i
vo, Ava'ai faifaina a vonemiga, nagami 'wa na
'idewai, nika taunimi 'wa na yavumi. Yau fai
Yaubada 'ana to'odu wata 'ana tove'ililibu.

¹⁹ 'Ai'edi 'omi ma 'ami vetumagana, tamu taimi
'wa na tauyeni vanuga yogona nageneye i na
miamia, we'e 'ifwaimi fekafeka 'wa na nawedi
yami 'aila'avo i lasega, 'wa na 'ivaisedi.

²⁰ Siwe kebu nuami i na fani, 'wa na
vilavilamiga taimi 'ami 'walaboda 'wa na mieni
'waikuye. 'Ai'edi taimi a na 'iseniga, yami veifufu
a na awavemogitaneni, 'ai'edi kwamananina '
kebu taiadiga, 'wa na wafa." Nika matatabudi i
sosoana.

²¹ 'Aise'a'avadi i veifufu i vo, Mogitanaotoga
'ida 'asa'aiana taida faifaina de'e vitanina ta
veluagai. Ta 'iseni i toke i 'we'we'wela wata i
taidaida yawaina faifaina siwe 'ida kebu bonana
ta da nogaiga. Begaidi 'ida 'asiau vitanina
'waideye i souyeni.

²² Nika Lubeni i tutula i vo, 'Wa da vo kebu a da
vonemiga. A vo, Kebu taida 'wa na nikaiga i na
nunago 'wa na sakona,' siwe bonaku kebu 'wa da
nogaiga. 'Asiau ma'itufa yana wafa 'ana vita 'ida
ta na tovoieni."

²³ Iosefa yadi veifufu 'akonadi i 'asetai, we'e
tatanavo i bavuyeni fai kumanina tamu tosaivila
Iosefa faifaina i veveifufu.

²⁴ Iosefa tatanavo taiadi i veveifufu nika nageni i lu'ili'ilia, begaidi i vilai i luku givagivaneye i 'we'wela, mulieta i souyeni i mai yadi veifufu i ve'a'avaivai. Matatabudi 'waidiega, Simioni i venua'ivineni matadie i yogoni.

²⁵ Iosefa yana tofolovavo i vonedi 'aitamogana 'aitamogana fekafeka 'wa na tala'ewadi yadi venuane 'wa na vedodogidi. Wata yana tofolovavo i vonedi givagivayega tatanavo yadi kileu i na veviladi yadi venuane i na vedodogidi. Wata 'adi 'ibua i veledi 'eda faifaina.”

²⁶ Bega tatanavo fekafeka ma venuanidi i dodogidi 'aisaya doniki 'waidie, nika i viladi yadi 'atamane.

²⁷ Tutuyanina i nunagoi 'edeye i lovanedi, bega ma ediavo i le'wa 'eba veawai 'waineye bei i 'ailove i na veawai. Matatabudi yadi venuana i yavudi fekafeka i na 'ewadi yadi 'aisayavo i na ve'anidi, nika yadi kileu i 'isedi yadi venuana nagedie.

²⁸ Ediavo i vonedi i vo, Ekwavo, yaku kileu i vevilai, kileunina side yaku venuana nageneye.” Matatabudi yawaidi i lovoga bega i vetunuivilavila ma yadi tatava, i vona i vo, Yaubada nani de'e i 'idewaiga, ava'ai 'ana 'aseta?”

²⁹ Tutuyanina Iakobo natunavo i le'wai 'awalawa Kenani 'waineye, naninidi i souyediga 'waidie, matatabuna i veifufuyedi tamadi 'waineye.

³⁰ I voneni i vo, Tomogonina 'awalawanina 'ana toveimea, bonana toketokena 'wainega i vonema, igodina 'ada nago yana 'awalawa 'ana vetaui'wala faifaina.’

³¹ Siwe 'a voneni 'a vo, 'Ima tomotoga 'atumaima, kebu 'a da mai yamu 'awalawa 'ana vetau'i'wala faifaina.

³² Tamama 'aitamogana, we'e natunavo 'ama 12 iaveta'ava 'atubuga. Tamu taima kebu taiadi 'ada miamia, we'e 'ama 'walaboda tamama taiadi i miamia 'awalawa Kenani.'

³³ Tomogonina 'awalawanina 'ana toveimea i vonema i vo, 'Aku fata a na 'asetami, 'omi tomotoga ma 'ami vetumagana 'alo kebu. Mulieta i vonema i vo, tamu iami 'wa na baileni taiadi 'a na miamia, we'e 'omi matatabumi fekafeka 'wa na nawedi yami 'aila'avo i laselasega 'wa na 'ivaisedi.

³⁴ We'e taimi 'ami 'walaboda 'wa na mieni 'waikuye, nika kwamananina 'wainega 'ana fata a na 'asetai 'omi tomotoga 'atumaimi, kebu 'wa da maia vetau'i'wala faifaina. Nika 'ana fata taimi a na vevilai bega 'omi yavuyavumi 'wa na vevekimwane 'awalawa de'e nageneye.' ”

³⁵ Tutuyanina yadi venuana 'waidiega fekafeka i tatala'ewadi, 'aitamogana 'aitamogana yadi kileu ma baniumadi i veluagadi. Tatanavo tamadi taiadi maninidi i 'isedi ve'alakolokololo.

³⁶ Iakobo natunavo i vonedi i vo, 'Omi igodi nuanuami natukwavo 'waikuyega 'wa na vinagodi. 'Wanogai, Iosefa wata Simioni 'asiau kebu taiadi ta da miamia, we'e tutuya de'e nuanuami Beniamina 'wa na naweni. Natukwavo, sauluvanina 'wa 'i'idewaiga 'waikuye, kebu sauluva 'atumaina.”

³⁷ Mulieta Lubeni tamana i voneni i vo, 'Ai'edi Beniamina taiadi 'ana nunago 'edeye vita i na souyeni 'waineye, ma'itufa 'omu natukwavo 'adi

'ailuga 'u na luvewafadi. Wata Lubeni tamana i voneni i vo, Kwamananina yau 'ana to'isave'avina, we'e a vona'awaufaufa 'waimuye, natumu yau taiadi 'ana vilama 'ana mai."

³⁸ Siwe Iakobo i vo, Natuku kebu taiadi 'wa na nago. Tatana Iosefa 'akonadi i wafa, 'we'e taina kumanina nuaku 'ana tokiavesosoana. 'Ai'edi taiadi 'wa na nunago 'edeye tamu vita i na souyeni 'waineye, valana 'ana nogaiga, de'e 'aku taumata 'wa mimaieni nuavita 'wainega ma 'aku budula 'wa na ve'ufaku."

43

Tatanavo i viladi i nagoi Itifita

¹ Bola loka bwaikina i 'eno'eno 'awalawa Kenani matatabuna nageneye.

² Tutuyanina 'adi'adi Itifitayega i miediga matatabuna i 'a'ava, natunavo i vonedi i vo, Wata 'wa na vilami 'ada'ada 'ifwaidi 'wa na kimwane."

³ Siwe Iuda tamana i voneni i vo, Tamaku, Itifita 'ana toveimea yana veimea toketokena i velemaga i vo, 'Ai'edi taimi kebu taiadi 'wa na maiga, kebu wata maigimi a na 'ise'iseni.'

⁴ 'Ai'edi Beniamina 'u na tauyeni taiadi 'ana nagoga, matatabuma 'a sosoana 'ana nagoi 'ada'ada moso'ina 'ana kimwane.

⁵ We'e 'ai'edi Beniamina kebu 'u na tauyeniga, 'ima wata kebu 'a na nagoga, fai tomogonina yana veimea toketokena i velemaga, i vo, 'Ai'edi taimi kebu taiadi 'wa na maiga, kebu wata maigimi a na 'ise'iseni.' "

⁶ Iakobo natunavo i vonedi i vo, Ava'ai faifaina vita bwaikina 'wa mieni 'waikuye? Wata awale

tomogonina 'wa voneni 'wa vo, Taima tamu i miamia?"

⁷ I voneni i vo, tomogonina i toke i velutolitoliema 'omu wata 'ima faifaima i vo, Tamami bola ma yawaina i miamia?" Wata i velutoliema i vo, Taimi tamu i miamia?" Mogitana yana velutoli 'a nogayeni. 'Ai'edi nagami i da vonemaga, 'ako kebu yana velutolinina 'ada nogayeni' "

⁸ Bega Iuda tamana i voneni i vo, Kwamana 'u na tauyeni ma 'aila'ama a na nagoi, nika kebu 'ana fata wafa i na souyeni 'waideye, 'omu wata natumavo 'waidie.

⁹ Yau 'aiseotogiku Kwamananina a na ve'isabodebodeni. 'Ai'edi kebu taiadi 'ana vilamaga 'waimuye, yau 'ana vita matatabuna a na tovoieni, we'e 'u na veimeyekumo.

¹⁰ 'Ai'edi nagami 'ada vonemu bega taima 'u da tauyeni taiadi 'ada nagoga, de'e 'ana veluga wata 'ada vilama.

¹¹ Bega natunavo i vonedi i vo, 'Ai'edi yana vona'awauaufanina bola toketokena i na 'eno'enoga, tamu 'eda'eda 'wainega ta na nua'ania. Side bani'odi 'wa na 'idewai. Nani 'ifwaidi 'atumaidi yada fwayafwaya vuagina 'wainega, yada 'anivelena tomogonina faifaina 'wa na 'idewadi yami venuane 'wa na dodogidi, 'wa na nawedi 'wa na veleni. Naninidi bani'odi mai'awa wata 'ifwaidi bunama magaidi 'atumaidi.

¹² Wata kileunidi i veviladi yami venuane i dodogidi, 'wa na 'imoso'iedi 'wa na 'wa na veleni.

¹³ We'e taimi 'wa na vagavaia 'wa na vilami 'wa na nagoi tomogonina 'waineye.

¹⁴ 'A vevelu'ui faifaimi, nuanuaku Yaubada Tomia abama yadi tovemata'ai'ai i na 'isanuakalikaliemi, bega tomogonina 'waineye 'wa na le'waga, Simioni i na 'etoyavuya we'e Beniamina i na vevilai taiadi 'wa na mai. We'e 'ai'edi natukwavo i na wafaga, yau 'asa'aiana 'aiseku.

¹⁵ Iakobo i veifufu'a'ava, natunavo yana nuakalikali i 'idewai kileunidi i viledi i taiadi i luvetubami, mulieta Beniamina taiadi i tauya. Tutuyanina i le'wai Itifita, taunidi i nawedi i sivemagesedi Iosefa 'waineye.

¹⁶ Tutuyanina Iosefa Beniamina i 'iseni taiadi i maia, yana vanuga 'ana tomia yadi to'edakumeta i voneni i vo, Tomotoganidi 'asiau 'aiata 'ana utukamwana 'waineye taiadi 'ana 'ani. Nuanuaku 'wa na vagavaidi 'wa na lukuvedi yaku vanuga nageneye, mulieta 'aisaya 'u na nikei 'ani'ani bwaikina 'u na 'idewai lavilavie taiadi 'ana 'ani."

¹⁷ Bega tomogonina Iosefa yana veifufu matatabuna i vematayakeyakeni, i nawedi Iosefa yana vanuge.

¹⁸ Tutuyanina i le'wa yana vanuge, matatabudi i kololo'afo'afo, fai i nuani i vo, 'Ida ta maiga yana vanuge, fai yada mai kumekumetana 'waineye, yada venuana 'waidie kileu i veviladi. Voke nuanuana taiadi ta na vetalaga i na vetoketoke'iaweda, bega yada 'aisaya i na 'ewadi we'e 'ida ta na vetofolova-maimaiga 'waineye.

Sakali bwaikina i 'idewai Iosefa yana vanuge

¹⁹ Bega enavo i nagoi Iosefa yana vanuga 'ana to'isave'avina 'waineye, taiadi i veifufu yana vanuga 'ana 'awa 'ana 'eba luku 'awaneye.

²⁰ I voneni i vo, le 'ama toveimea, 'ima be'ama 'a mai Itifita 'ani'ani 'ana kimwane.

²¹ Siwe tutuyanina 'a vilama 'a nunagoi 'eba veawai 'waineye 'a le'wa 'a'ailove fai i lovani. Yama venuana 'a yavudi, 'aitamogana 'aitamogana yama mani 'a kimwaneyediga, wata 'a veluagadi yama venuana nagedie. Nika matatabudi i vo, 'Wa 'iseni, kileunidi wata ta vileviledi.

²² Yada kileu ma 'adi 'imoso'i ta maiedi 'ani'ani 'adi kimwane faifaina, siwe kebu ta da 'asetai, aitoi yada kileu i dodogidi yada venuane.”

²³ Yana vanuga 'ana to'isave'avina i vonedi i vo, Kebu 'wa na kolologa. Yami Yaubada, kumanina tamami yana Yaubada, 'ai'aiwabu i dodogidi yami venuana 'waidie. A 'asetai, yami kileu 'ani'ani 'adi tutula faifaina 'akonadi a veluagadi.” I vona'a'ava, Simioni i yavuya i souyeni i nago enavo 'waidie.

²⁴ Mulieta vanuga 'ana to'isave'avina tomotoganidi i nawedi Iosefa yana vanuge, ufa i veledi 'agedi i lekoadi wata doniki 'adi'adi i veledi.

²⁵ Yadi 'ani faifaina 'akonadi i vonedi, 'ako Iosefa yana vanuge i na 'ani. Fai i 'asetai Iosefa lavilavie i na le'wa, begaidi yadi nuakalikali i 'idewavagasedi i 'eno'enovi.

²⁶ Tutuyanina Iosefa i le'wa vanuge, nuakalikalinidi i 'ewadi i 'anivelenedi Iosefa 'waineye, mulieta tugatugadi i vetufano'uyedi fwayefwayeye, ma yadi ve'ililibu i 'odu 'waineye.

27 Mulieta Iosefa i vona-vekaiwa 'waidie i 'a'ava, wata i velutoliedi i vo, Tamami 'au'auveana 'wa da 'asetai, kumanina faifaina 'wa veifufuga, bola ma yawaina i miamia?"

28 I vo, E'e, tamama yamu tofolova i miamia ma yawaina." Nika ma yadi ve'ililibu i 'odu-vaitugana 'waineye.

29 Iosefa i miabui enavo i 'isa-'atumaidi nika taina Beniamina i 'iseni, taunina inana natudi, i velutoliedi i vo, We'e taimi 'ami 'walaboda, kumanina faifaina nagami 'wa veifufuyeni 'waikuye?" Wata Iosefa i vo, Natuku, nuanuaku Yaubada i na vevesauluva 'atumaina 'waimuye."

30 Iosefa nuana i vita mogitana taina faifaina, begaidi i luku yana tutudaba 'waineye i 'we'wela.

31 Mulieta maigina i lekoai i 'a'avana i vilai i mai, fai kebu nuanuana enavo i na 'asetai de'e iadi. Yana tofolovavo i vonedi i vo, 'Ani'ani 'wa 'wa maiedi."

32 Tofolovavo Iosefa 'ana'ana i 'idewaiga yana talalia 'aisena, enavo yadi talalia wata 'aisedi, me Itifita i na 'aniga yadi talalia 'aisedi, fai 'asa'aiana bani'odi yadi sauluva, Ibeliu wata Itifita kebu taiadi i da luluvetubama.

33 Iosefa enavo 'aitamogana 'aitamogana i vemiabuidi yadi tubuga 'ana malamala 'waidiamo, yadi miabui tubu'edakumeta 'wainega i nago 'adi 'walaboda 'waineye. Yadi miabuinina 'wainega, matatabudi i veyawai-lovogidi, ma ediavo i vetunuvilavila.

34 Iosefa enavo 'adi'adi i tala'ewadi taunina 'ana talalia 'wainega, we'e Beniamina 'ana ta'ula 'adi 5 wata ma 'ana 'imoso'i i veleni enavo kebu

taiadi i da vesala. Matatabudi yavuyavudi, i
'aniluvetubama wata i yemu ma yadi sosoana.

44

Iosefa 'ana vedi siliba

¹ Tutuyanina Iosefa enavo i 'idewadewa i na tauya, yana vanuga 'ana to'isave'avina i voneni i vo, Yadi venuana 'aitamogana 'aitamogana 'waidie fekafeka 'u na veadagidi i na 'ewa. Wata yadi kileu 'u na dodogidi yadi venuana nagedie.

² 'Adi 'walaboda yana venuana 'awaneye, 'aku vedi siliba wata yana kileu fekafeka 'ana kimwane faifaina 'u na dodogi. Bega yana vanuga 'ana to'isave'avina i na nago Iosefa yana awave'eda'eda matatabuna i vetutuyameni.

³ Enavo i 'enoviladi 'awa'awaiogose, yadi kukua i ve dodogidi yadi 'aiyasavo 'waidie nika i vetauyidi.

⁴ I nunagoi 'atamana bwaikina bola kebu i da 'iaweniga, Iosefa yana vanuga 'ana to'isave'avina i voneni i vo, 'U na lilide mulidie 'u na talabodedi. Tutuyanina 'u na 'ubwasadiga, 'u na velutoliedi 'u na vo, Awale yaku nuakalikali a 'idewaiga 'atumaina 'waimie, we'e 'omi sauluva sakoina 'wainega 'wa tutula?

⁵ Ava'ai faifaina 'aku toveimea 'ana vedi siliba 'wa vinagoi? Fai vedinina 'wainega i vovona-vsamula tutuya i mimaiga faifaina. Naninina 'wa 'idewaiga, de'e sauluva sakoiotogina.”

⁶ Tutuyanina yana vanuga 'ana to'edakumeta i 'ubwasadi, 'ana toveimea yana veifufu i luvaitugani 'waidie.

⁷ Enavo i vo, Ava'ai mogitana faifaina 'u veveifufu?" "Ima yamu tofolovavo, kebu i da lubwainema bani'odi 'a na vesauluva 'waimuye.

⁸ Voke kileunidi yama venuana nagedie 'u veluagadiga, faifaidi 'u veveifufu? Kebu i da lubwainema 'amu toveimea yana kileu wata golida 'a na vinagodi yana vanuga 'wainega?

⁹ 'Ai'edi 'ana vedi 'u na veluagai tamu iama 'waineye, tomogonina i na wafa, we'e 'ifwaima yamu tofolova-maimaiga."

¹⁰ Vanuga 'ana to'isave'avina i vo, 'Atumaina, siwe a na vonemi, tomogonina vedi ivinagoiga, kumanina yaku tofolova-maimaiga." "Ifwaimi yavuyavumi 'wa na nagoi.

¹¹ Bega matatabudi i ve'abiwalowaloga yadi venuana 'aisaya kwavidiega i 'ewadi yavudi.

¹² Vanuganina 'ana to'isave'avina yadi venuana 'waidie i laualla, i velamu tubu'edakumeta 'wainega i ve'a'ava 'adi 'walaboda 'waineye. Nika vedinina i veluagai Beniamina yana venuana nageneye.

¹³ Tutuyanina enavo matatabudi i 'iseni, 'adi talauma i silabu'idi. Mulieta yadi vuananani i dodogidi doniki kwavudie nika i viladi i nagoi 'atamana bwaikina 'waineye.

¹⁴ Iosefa bola i miamia yana vanuge, nika enavo i le'wai, matatabudi i lumata'afufu fwayefwayeye i 'odu 'ageneye.

¹⁵ Iosefa i vonedi i vo, Ava'ai faifaina 'aku vedi 'wa vinagoi? Kebu 'wa da 'asetaigna, yau 'aku fata na vona-samula, nani 'ifwaidi souyeniga faifaina."

¹⁶ Iuda i tutula i vo, Ie yaku 'auvea, kebu 'ama fata 'ana ve'awafatafata matamuye? Wata bani'odi 'ana munega 'ana kiavemagetai 'waimuye? Yama sakona faifaina kebu 'ama fata 'ana ve'ewa? Wata yama yogosako faifaidi, 'Auvea 'ama vematavuloga bwaikaotogina 'wainega 'a veveluagai. De'e yama vevelu'ui-nuakalikali yama 'auvea 'waimuye, kebu taima 'aisena vedi 'u veluagai yana venuane i na vetofolova-maimaiga, nuanuama matatabuma 'ana vetofolova-maimaiga 'waimuye.”

¹⁷ Iosefa i vo, Kebu 'ana fata tamu nani 'ana 'idewai! Tomogonina vedi ivinagoiga, kumanina 'aisena yaku tofolova-maimaiga. We'e matatabumi 'wa na vilami tamami 'waineye ma yami sosoana.”

Iuda enavo Faifaidi i veifufu

¹⁸ Mulieta Iuda i vaganago lilivaneye, i voneni i vo, Ie yaku 'auvea, ma yaku ve'ililibu a vevelu'ui-nuakalikali 'waimuye, 'ana fata yamu tofolova-maimaiga vona 'aitamogana i da 'inanai 'waimuye. Wata a vevelu'ui-nuakalikali, avinodi Felo taiadi yami veimea i ve sala, siwe kebu 'u na nuasakoyeku.

¹⁹ Yana tofolova-maimaiga i velutolieni i vo, 'Aku toveimea, 'omu ma tamamu wata ma taimu?’

²⁰ Yana velutoli a nogayeni 'a vo, E'e 'aku toveimea, 'ima ma tamama siwe 'akonadi i ve 'auvea, we'e natuna yana 'walaboda i tubuga. Tatana mogitana yawaina i 'a'ava, we'e inana

natudiavo 'waidiega, 'aiseotogina i luvegalalai, siwe tamana i nuakalikalieni mogitana.'

²¹ Siwe wata 'u vonema 'u vo, KWAMANANINA 'WA NA MIENI 'WAIKUYE, BEGA TAUNIOTOGINA A NA 'ISENI.'

²² Siwe 'ama toveimea 'ana vonemu, kwamana kebu 'ana fata tamana i na 'iaweni, 'ai'edi tamana i na 'iaweniga, i na wafa.'

²³ Siwe 'u vonema 'u vo, 'Ai'edi taimi 'ami 'walaboda kebu taiadi 'wa na maiga, kebu wata maigiku 'wa na 'ise'iseni.'

²⁴ Tutuyanina 'a vilama 'a nagoi tamama yamu tofolova 'waineye, yamu veifufu 'a lu'ivoneyeni 'waineye.

²⁵ Mulieta tamama i vonema i vo, Wata 'wa na vilami 'ada'ada 'wa na kimwane.'

²⁶ We'e yana vona 'a tutuli 'a vo, Kebu 'ana fata 'a na nago, nagami 'ama 'walaboda 'u na tauyeni mulieta 'ana nago. Fai i vonemaga kebu wata maigina 'ana 'ise'iseni, 'ai'edi 'ama 'walaboda 'u na tauyeni taiadi 'ana nagoga, i na sosoanema'

²⁷ Mulieta tamama i vonema i vo, 'Akonadi 'wa 'asetai yaku vavine natudiavo iavetadi 'adi 'ailuga,

²⁸ Tamu iana 'iaweda, i yogo-vagata. We'e tamu aigodi voke 'aisaya walawala'ai i silabulabu'i. Tutuyanina 'wainega i maiga 'asiau, kebu wata maigina a da 'ise'iseni.

²⁹ 'Asiau nuanuami wata taina 'waikuyega 'wa na 'ewai, 'ai'edi tamu vita i na souyeni 'waineye, tomogo nava'auna budubudulina ma yana nuavita 'wa na vetunei 'ana taumata 'waineye.'

³⁰ Ie 'aku toveimea, 'Ai'edi kwamana kebu taiadiga, kebu 'ana fata a na vilaku tamaku

'waineye. Fai tamama yana sauluva natuna taiadi i vesala.

³¹ 'Ai'edi natuna i na 'isa'a'avaiga, tamama i na wafa. 'Ana vita matatabuna 'ima yamu tofolova-maimaiga 'ana evai, we'e 'ima nava'auna budubudulina 'ana vetunei 'ana taumata 'waineye.

³² Ie 'aku toveimea, tamaku mataneye a vona'awaufaufa, kwamana a na 'i'isave'avini. Wata a voneni a vo, 'Ai'edi kebu taiadi 'ana vilamaga, 'ana vita matatabuna yau a na tovoieni.'

³³ Wata 'aku toveimea, a vevelu'ui-nuakalikali 'waimuye, kwamana kebu i na vetofolova-maimaiga, yau 'ana vita a na tovoieni, we'e kwamana enavo taidi i na viladi.

³⁴ 'Ai'edi kwamana kebu taiadiga, bani'odi a na munega bega a na vilaku tamaku 'waineye? Kebu nuanuaku vita i na souyeni tamaku 'waineye a na 'iseni."

45

Iosefa taunina i Sivemageseni

¹ Iosefa kebu 'ana fata i na tokemaigeni fai 'aila'a i miamiani tutudaba nageneye, begaidi yana tofolovavo i vonedi i vo, matatabumi 'wa souyemi, bega 'aila'a i souyedi 'aise'avadi taunina i sivemageseni enavo 'waidie.

² Bega Iosefa i 'odu i 'we'wela. I taibwaubwau 'ana fata me Itifita i na nogai. Tutuyanina 'we'wela i nagoi, yana vanuga 'ana tomia Felo 'ana vala i naweni yana vanuga 'waineye.

³ Enavo i vonedi i vo, Yau Iosefa, we'e nuanuaku a na 'asetai, tamaku 'atumaina i

miamia?” Tatanavo i 'iseni i kololo siwe kebu 'adi fata i na veifufu fai Iosefa i 'iseni i tovoovoi manawadie.

Iosefa taunina i sivemageseni

⁴ Mulieta Iosefa tatanavo wata taina 'waidie i vo, 'Wa da vagamaia 'waikuye.” Tutuyanina i nagoi lilivaneye i vonedi i vo, Yau taimi, Iosefa, kumaniku 'wa vekimwaneyeku me Itifita 'waidie.

⁵ Begaidi 'asiau kebu 'wa na nuavitaga wata kebu taunimi 'wa na 'uvanimiga, 'wa vekimwaneyekuga faifaina. Yaubada i vetuneku a kumeta a mai bega tomotoga fuemi a na 'ita'ita'iemi.

⁶ 'Awalawa de'e 'waineye loka 'ana malamala 'ailuga 'akonadi i 'a'ava, we'e malamala 5 wata i 'eno'eno kebu 'ana fata ta na bakulaga wata ta na 'aialaga.

⁷ Siwe 'waimiega Yaubada i vetuneku a kumeta a mai bega a na 'ita'ita'iemi wata tomia fwayafwaya matatabuna 'waidiega 'ifwaimi ma yawaimi 'wa na miamia. 'Ita'ita'inina 'ana 'eda Yaubada i 'idewaiga bwaikina wata 'eba nuavogana.

⁸ Bega 'omi kebu 'wa da vetuneku 'awalawa de'e 'waineye, we'e mogitana Yaubada. I silakaiku bega a vevetoawave'eda'eda Felo 'waineye, yana vanuga nageni 'ana to'isave'avina wata Itifita matatabuna 'waineye a vevetoveimea.

⁹ 'Asiau 'wa na vila-matayo'omi 'wa na nagoi tamada 'wa na voneni 'wa na vo, Natumu Iosefa side bani'odi i voneyedi i vo, Yaubada i vesauluva

'atumaina 'waikuye bega 'asiau Itifita
matatabuna a veimeyeni, begaidi 'u na
'abiwalowaloga 'u na obuma 'waikuye, kebu 'u
na 'ivogavoganaga.

¹⁰ 'Awalawa Goseni 'wa na vili, lilivakuye 'wa
na mia. Natumiavo, tubumiavo, yami 'aisayavo
bwaikidi, siasiaidi wata yami kukua matatabuna
'wa na miedi.

¹¹ Lilivakuye 'wa na miamia 'aku fata a na
'i'isave'avinimi fai loka 'ana malamala 5 bola i
'eno'eno. Begaidi kebu nuanuaku 'omu taunimu,
yamu 'aila'avo wata yamu 'aisayavo taiadi
laseyega 'wa na vewekowekoma.”

¹² Wata Iosefa i veifufu i vo, 'Wa 'iseni! 'Omi
wata taimi Beniamina taunimi 'wa na mai 'wa na
'iseku, yau mogitana Iosefa, kumaniku a
veveifufu 'waimie.

¹³ Enavo i vonedi i vo, 'Wa na nago tamaku 'wa
na voneni yau tamu Itifita 'ana toveimea ma 'aku
ve'ililibu, 'awalawa de'e 'waineye. Naninidi 'wa
'isedi 'waidie a folofolovaga wata yaku mia
matatabuna 'wa na veifufuyeni 'waineye. Wata
nuanuaku 'wa na 'abiwalowaloga tamaku 'wa na
mieni 'waikuye.”

¹⁴ Mamatageuna sosoana taiadi taina i
'avalamaigi i 'we'wela wata Beniamina tatana i
'avalamaigi i taibwaubwau .

¹⁵ Mulieta Iosefa enavo 'aitamogana
'aitamogana i yaogidi wata i 'we'welidi i 'a'ava,
enavo taiadi i veifufu.

Felo Iakobo i tayegi i mai Itifita

¹⁶ Tutuyanina Iosefa enavo i le'waiga valadi i nogai, Felo yana toveimeavo matatabudi i sosoana.

¹⁷ Bega Felo Iosefa i voneni i vo, Emwavo 'u na vonedi 'u na vo, Yami folova side bani'odi. Yami kukua 'wa na vedodogidi, 'aisaya 'waidie. 'Wa na 'abiwalowaloga 'wa na vilami Kenani.

¹⁸ 'Wa na nagoi tamami wata yami 'aila'avo 'wa na vagavaidi 'wa na vilami 'waikuye. Fwayafwaya 'atumaina Itifita nageneye a na velemini, bega fwayafwayanina vuagina 'wainega 'wa na 'ani.' ”

¹⁹ Bega Felo Iosefa i voneni i vo, Emwavo 'u na vonedi Fwayafwaya 'ana waka yo'eyo'e Itifita 'wainega, 'wa na 'ewadi natumiavo, yami vevinevo wata tamami 'wa na dodogidi 'wa na mai Itifita.

²⁰ Kebu 'wa na venuafouviga yami kukua faifaidi, fai 'awalawa Itifita fwayafwayanina 'atumaina matatabuna 'omi faifaimi.' ”

²¹ Mulieta Iakobo natunavo veifufunina i nogai i vematayakeyakeni. Felo veimea Iosefa i veleni bega fwayafwaya 'ana waka-yo'eyo'e wata 'adi 'ibua taiadi i veledi 'eda faifaina.

²² Enavo matatabudi talauma 'ivaudi i veledi, we'e Beniamina 'ana talauma 'ivaudi 5 wata kileu siliba 300 i veleni.

²³ Mulieta tamana yana doniki iavetadi 'adi 10 i vetunedi, wata Itifita fwayafwaya vuagina 'atumaiddi, doniki 'adi 10 vevinedi, witi vuagidi, beledi wata 'ifwaidi nani 'atumaiddi 'adi 'eda faifaina i veledi.

²⁴ Bega Iosefa enavo i vetunedi i nagoi, tutuyanina i tauya, i vonedi i vo, naninidi 'wa

'ewadiga , kebu faifaidi ma emiavo 'edeye 'wa na ve'ikwayekwayega.”

²⁵ Iosefa yana veifufu i 'a'ava, tatanavo Itifitayega i tauya i laka Kenani, tamadi Iakobo 'waineye i le'wa.

²⁶ Tamadi i voneni i vo, Iosefa ma yawaina i miamia, mogitana taunina 'asa'aiana Itifita matatabuna 'ana to'isave'avina.” Iakobo yawaina i lovoga yadi veifufu kebu i da awave-mogitaneniga.

²⁷ Siwe tutuyanina Iosefa yana nuanua matatabuna i lu'ivoneyedi Iakobo 'waineye, wata waka-yo'eyo'e* natuna i vetunediga 'ana 'aidodoga faifaina, i 'isedi i ve'awamogitaneni nuana i veagiagi.

²⁸ Iakobo i vo, E'a, be'ama a 'asetai, 'alo natuku Iosefa bola ma yawaina i miamia. I lubwaineku a na nago a na 'iseni mulieta yawaiku i na 'a'ava.”

46

Yaubada i souyeni Iakobo 'waineye

¹ Iakobo yana kukua matatabuna i 'ewadi nika i tauya i nago. I le'wa Biasiba, i 'idewadewa 'aisaya i velomuyedi i kabunidi tamana Aisake yana Yaubada 'waineye.

² Iakobo, tamu 'ana wagava Isileli, lovane i miamia nika Yaubada i souyeni 'waineye 'wa da vo i da 'enoneganega i golemi i vo, Iakobo, Iakobo.” Bega i tutula i vo, Yau side.”

* **45:27:** Wegoni tamu fwayafwaya 'ana waka, 'aisaya bulumakau i luluyo'ei, kukua bwaikina 'adi 'eba vedodoga.

³ Wata i vo, Yau Yaubada, tamamu yana Yaubada. Kebu 'u na kolologa 'u na nago Itifita fai bei 'amu wauma a na 'ivebwaiki.

⁴ Yau taiadi ta na nago Itifita wata 'awaie a na vevilami. We'e natumu Iosefa tutuya matatabuna taiadi 'wa na miamia, i na nagoga matamu i na yaibaia.”

⁵ Mulieta Iakobo Biasiba i 'iaweni natunavo i vemiabuia, natudiavo wata yadi vevinevo matatabudi i dodoga, waka-yo'eyo'enidi* Felo i vetunediga 'ana 'aidodoga faifaina 'waidiega.

⁶⁻⁷ Yadi 'aisayavo wata yadi kukua matatabuna i 'ewadi Kenani 'waineye, i nawedi Itifita. Iakobo natunavo iavetadi wata tubunavo iavetadi, natunavo vevinedi wata tubunavo vevinedi, matatabudi yana 'aila'avo taiadi i nagoi.

⁸ Isileli tubunavo 'adi wagava side bani'odi, (Iakobo natunavo) kumanidi i nagoi Itifita.

Iakobo yana tubu'edakumeta 'ana wagava Lubeni.

⁹ Lubeni natunavo side 'adi wagava. Inoki, Falu, Esiloni, Kalimi.

¹⁰ Simioni natunavo side 'adi wagava. Iemuela, Iamina, Oadi, Iakini, Soala, Siaulo. Siaulo inana vavine Kenani.

¹¹ Livai natunavo 'adi wagava side bani'odi. Gelisoni, Koati wata Melali.

¹² Iuda natunavo side 'adi wagava. Eli, Onani, Sila, Felesi wata Dela. (Ilai wata Onani

* **46:5:** Wegoni tamu fwayafwaya 'ana waka, 'aisaya bulumakau i luluyo'ei, kukua bwaikina 'adi 'eba vedodoga. **46:6-7:** Fol 7:15

- yawaidi i 'a'ava 'awalawa Kenani 'waineye.)
We'e Felesi natunavo Esiloni wata Amulu.
- ¹³ Isaka natunavo side 'adi wagava. Tola, Fua, Iasuba, Similani.
- ¹⁴ Sebuloni natunavo side 'adi wagava. Seledi, Eloni wata Ialeli.
- ¹⁵ De'e 'aila'anidi, Lea wata Iakobo natudiavo novudi Deina taiadi i tubuga 'atamana Fadani-Lami 'waineye. Iakobo tubunavo iavetadi wata vevinedi, Lea 'waidiega 'aila'a 33 i souyeni.
- ¹⁶ Gada natunavo side 'adi wagava. Sefoni, Agedi, Suni, Esiboni, Eli, Elodi, Aleli.
- ¹⁷ Asa natunavo iavetadi 'adi wagava. Imina, Isiva, Isivi, wata Belia, we'e novudi 'ana wagava Sela. Belia natunavo iavetadi 'adi wagava, Ebeli wata Malikieli.
- ¹⁸ Silifa natunavo iavetadi, fai basenadi tamana Lebani yana tofolova-maimaiga Lea i veleni. Iakobo tubunavo Silifa 'waidiega 'aila'a 16 i souyeni.
- ¹⁹ Iakobo yana vavine Litieli natudiavo 'adi wagava Iosefa wata Beniamina.
- ²⁰ Iosefa natunavo i tubuga 'awalawa Itifita 'waineye 'adi wagava, Manasa wata Ifeleimi. Inadi 'adi wagava Aseneati, we'e tamadi 'ana wagava Fotifali tamu tovelomu 'awalawa Oni 'waineye.
- ²¹ Beniamina natunavo iavetadi side 'adi wagava. Beila, Beki, Asibeli, Gelai, Nemani, Egi, Losi, Mafimu, Afimu, Alidi.
- ²² De'e Litieli wata Iakobo natudiavo iavetadi. Iakobo tubunavo Litieli 'waidiega 'aila'a 14 i souyeni.

²³ Dani natuna 'ana wagava Usimi.

²⁴ Nafitalai natunavo side 'adi wagava. Iasieli,
Guni, Iesa wata Silemi.

²⁵ 'Aila'anidi Iakobo natunavo iavetadi i tubuga
yana vavine 'adi wagava Bilani 'waidiega,
kumanidi Litieli tamadi Lebani yana
tofolova-maimaiga i veleni. Basenadiotoga
Iakobo tubunavo 'waidiega, Bilani natudiavo 'adi
'aila'a 7.

²⁶ 'Aila'anidi Iakobo taiadi i nagoi Itifita, 'adi
'aila'a matatabuna 66. We'e natunavo yadi
vevinevo kebu taiadi i da lu'iaawwadiga.

²⁷ We'e Iosefa natunavo 'adi 'ailuga i tubuga nika
'adi 'aila'a i 'imoso'ieni Itifita nageneye, bega
Iakobo yana 'aila'a matatabuna 70 i miamiani
Itifita 'waineye.

Iakobo ma yana 'aila'avo i le'wa Itifita

²⁸⁻²⁹ Goseni lilivaneye i le'wai bega Iakobo Iuda
i vetunei i na nago Iosefa taiadi i na veifufu wata
i na awave'ede'edeni, Iuda ava'aiamo i na luku
'awalawa Goseni 'waineye. Tutuyanina i le'wai,
Iosefa yana salioti† 'waineye i dodoga bega i nago
Goseni tamana i yogo'ede'edeni. Tutuyanina
taiadi i veluaga Iosefa tamana i 'avalamaigi i toke
i tainu'wanu'wa.

³⁰ Mulieta Iakobo natuna Iosefa 'waineye i vo,
'Asiau matakuyega a 'isemu ma yawaimu, bega
yau ma yaku nuaniwalova wata ma yaku
sosoana yawaiku i na 'a'ava."

† **46:28-29:** Salioti tamu fwayafwaya 'ana waka, 'aisaya osi i
luluyo'ei.

³¹ Iosefa enavo wata tamana yana 'aila'a taiadi i vonedi i vo, Yau a na nago Felo a na voneni a na vo, Ekwavo wata tamaku yana 'aila'a taiadi Kenani 'wainega, i maia 'waikuye.

³² Tomotoganidi sifi to'isave'avina tutuya matatabuna i veve'isabodebodedi. Yadi 'aisayavo taiadi i maia bani'odi sifi, bulumakau wata nani 'ifwaidi taiadi.' "

³³ Bega Iosefa i vonedi i vo, Tutuyanina Felo yami folova faifaina i na velutoliemi, i na vo, Ava'ai yami folova?"

³⁴ Side bani'odi 'wa na voneni 'wa na vo, 'Ima yamu tofolovavo, yama mia matatabuna 'waineye, 'aisaya 'adi to'isave'avina tubumavo basenadi bani'odi."Ai'edi yami folova faifaina 'wa na veifufuyeni 'waineye, 'ana fata i na tauyemi Goseni yana 'eba veimea 'waineye, 'wa na mia, fai me Itifita sifi to'isave'avina i vematakilekiledi."

47

Iakobo i ve vesauluva 'atumaina Felo 'waineye

¹ Iosefa i nago Felo i voneni i vo, Tamaku wata ekwavo i le'wai 'awalawa Kenani 'wainega. Matatabudi i maia ma yadi 'aisaya sifi, bulumakau wata nani 'ifwaidi taiadi i miedi Kenani 'wainega, 'asiau i miamiani 'awalawa Goseni."

² Iosefa enavo 'adi 5 i venua'ivinedi taiadi i nagoi Felo 'waineye.

³ Tutuyanina i le'wai, Felo i velutoliedi i vo, Ava'ai yami folova?"

I vo, 'Ima yamu tofolovavo, sifi 'adi to'isave'avina basenadi tubumavo bani'odi.

⁴ Wata i voneni i vo, 'Ima 'a mai Itifita tutuya 'ale'usana 'ana mia, fai Kenani 'waineye loka bwaikina yama 'aisayavo yadi 'eba 'ani kebu. Fai bola loka bwaikina i 'eno'eno, begaidi 'a vevelu'ui nuakalikali 'waimuye 'u da tauyema 'a da mia 'awalawa Goseni.”

⁵ Bega Felo Iosefa i voneni i vo, Tamamu wata emwavo i maia taiadi ta na mia,

⁶ Itifita fwayafwaya matatabuna a tauyeni 'waimuye, we'e taunimu 'u na venua'ivina bega tamamu wata emwavo 'u na ve mianidi 'awasasa 'atumaina 'waineye. 'U na tauyedi i na miamiani 'awalawa Goseni. We'e emwavo 'waidiega, kumanina yana 'aseta bwaikina 'u da venua'ivinedi i da ve to'isave'avina, yaku 'aisayavo 'waidie.”

⁷ Iosefa tamana Iakobo i mieni Felo 'waineye i sivemageseni. Mulieta Iakobo i vesauluva 'atumaina Felo 'waineye.

⁸ Mulieta Felo Iakobo i velutolieni i vo, 'Amu malamala 'aivia?”

⁹ Iakobo i voneni i vo, Yau a ve ve wakawaka fwayafwaya de'e 'waineye, malamala 130 nagedie vita fuedi nagediamo a luku susula. Siwe yaku mia fwayefwayeye tutuya 'ale'usana, kebu tubukwavo taiadi 'ada vesala.”

¹⁰ Nika Iakobo i vesauluva 'atumaina Felo 'waineye, mulieta i souyeni yana vanuga 'wainega.

¹¹ Bega Iosefa tamana wata tatanavo 'awalawa Itifita yana fwayafwaya 'atumaina i veledi, bei i na miamia i na folofolova 'atamana Lamesisi yana 'eba veimea nageneye.

¹² Bega Iosefa tamana, tatanavo wata tamana yana vanuga 'ana tomia natudiavo siasiaidi taiadi, 'adi'adi i veledi 'adi 'aila'a 'ana 'etoava 'wainega.

Iosefa Yana veto'edakumeta Loka yana Tutuya 'waineye

¹³ Tutuyanina 'waineye, Itifita wata Kenani 'awalawa matatabuna loka bwaikina i souyeni 'waidie, bega tomotoga 'aila'a 'adi'adi i ve'a'ava i laselase.

¹⁴ Iosefa kileu bwaikina i veveluagai me Itifita wata me Kenani 'waidiega, fekafeka 'ana vekimwane 'wainega. Iosefa kileu i nunawedi Felo yana vanuge i yatoyatodi.

¹⁵ Tutuyanina me Itifita wata me Kenani yadi mani i ve'a'ava, me Itifita matatabudi i maia Iosefa 'waineye ma yadi nuavita i tai vonavona i vo, Yama mani 'a ve'a'avedi, we'e 'a vevelu'ui-nuakalikali 'waimuye 'ani'ani 'u na velema, 'ai'edi kebu matamuye 'ana wafa.”

¹⁶ Iosefa i tutula i vo, Fai yami kileu 'wa ve'a'ava, begaidi yami 'aisayavo 'wa na miedi 'waikuye, ma'itufa 'ani'ani a na velema.”

¹⁷ Yadi 'aisayavo bani'odi osi, sifi, goti, bulumakau wata 'aisaya doniki i nunawedi Iosefa 'waineye 'ani'ani faifaina taiadi i sivedamana, malamala 'aitamogana nageneye.

¹⁸ Malamala 'aitamogana i 'a'ava, tamu malamala 'ana veluga 'waineye, wata i maia i voneni i vo, 'Ama toveimea kebu 'ama fata 'ama vita faifaina 'a ve'ewa matamuye. 'A vona mogitana 'waimuye, yama kileu matatabuna i 'a'ava, wata yama 'aisayavo wata bulumakau

'omu faifaimu. Kebu tamu ava'ai 'a da luvegalaleni bega 'ana velelu, nani 'ailuga 'a taunima wata yama fwayafwaya.

¹⁹ Ava'ai faifaina matamuye 'ana wafa? Tomotoga wata yama fwayafwaya taiadi 'u da kimwanema bega 'ani'aniega ta da sivedamana, we'e yama fwayafwaya wata taunima 'atauyema 'ana vetofolova-maimaiga Felo faifaina. Nuanuama witi 'u na velema 'wainega i na 'i'ivaisema nika kebu 'ana wafaga. Fai kebu nuanuama fwayafwayanina i na velovi wata i na venage'ava.

²⁰ Bega Iosefa Itifita fwayafwaya matatabuna i kimwanedi Felo faifaina. Fai loka bwaikina begaidi me Itifita yadi fwayafwaya i vevekimwaneyedi Iosefa 'waineye. Wata fwayafwayanina matatabuna Felo yana 'eba veimea.

²¹ We'e tomotoga matatabuna, Itifita yana 'eba veimea 'eba velamu i nago yana 'eba ve'a'ava i 'ewadi i vetofolova-maimaiga Felo faifaina.

²² Tomotoga matatabuna yadi fwayafwaya Iosefa i kimwanedi, we'e tovelomu yadi fwayafwaya kebu i da kimwaneiga. Fai tovelomu 'adi 'adi i veveluagai Felo 'wainega. Begaidi kebu yadi fwayafwaya i da vevekimwaneyeni.

'Adi tutula 'wainega i veveluagai

²³ Mulieta Iosefa tomotoga i vonedi i vo, A na vonemi, 'asiau 'omi wata yami fwayafwaya a kimwanedi Felo faifaina. Begaidi waifei a na velelu 'wa na bakula.

24 Tutuyanina 'wa na 'a'aile'waga, yami 'ayavau 'wa na 'anivelenedi Felo faifaina. We'e luvegalalana, yami waifei bakula faifaina, 'ami'ami, yami vanuga 'ana tomia wata natumiavo faifaidi.

25 Wata i voneni i vo, 'Omu yama mia vitana 'wainega 'u 'ivaisema, begaidi nuanuama 'u da tauyema 'a da vetofolova-maimaiga Felo 'waineye.”

26 Tutuyanina Iosefa veimea i 'idewai me Itifita faifaidi, yana veimea i yatoi bega 'ani'ani matatabuna i na mimaiedi Felo 'waineye. We'e fwayafwayanina tovelomu faifaidi kebu i da 'aniveleni Felo 'waineye.

27 Tutuyanina me Isileli i miabui 'awalawa Itifita, Goseni yana 'eba veimea nageneye. Yadi mianina 'waineye, nani matatabuna 'wainega i ve'ai'aiwabu, 'ani'ani bwaikina i veluagai wata 'adi 'aila'a fueotogidi.

28 Iakobo i miamiana Itifita malamala 17 nagedie, nika bei 'ana malamala 147 i veluagai.

29 Iakobo sai'afoga yawaina i na 'a'ava, natuna Iosefa i goleni i mai i voneni i vo, Nuanuaku tamu nani faifaiku 'u da 'idewai. Nimamu 'u na yatodi 'ageku dibuneye bega matakuye 'u na vona'awaufaufa. Nika a na nogai bega a na 'asetai, ma yamu nuakalikali yaku velu'ui 'u da awave'atumaieni. Kebu nuanuaku vovoku 'u na ve'ufai Itifita 'waineye.

30 Tutuyanina yawaiku i na 'a'avaga, a vevelu'ui-nuakalikali, nuanuaku vovoku Itifita

'wainega 'wa na naweku 'aku tuvada Kenani
'waineye, tubukwavo lilivadie 'wa na ve'ufaku."

Nika Iosefa i vo, A vona'awaufaufa matamuye,
yamu nuanua matatabuna a na 'idewai."

³¹ Iakobo natuna Iosefa i voneni i vo, 'U na
vona'awaufaufa matakuye, Bega Iosefa ma yana
ve'ililibu tamana yana vona'awaufaufa i
kiavetoketokei mulieta Iakobo i 'odu 'ana
'unugalo 'waineye.

48

Iakobo Manasa wata Ifeleimi i vona-nuakalikali

¹ Tamu tutuya 'waineye, Iosefa vala i nogai
tamana i viga. Begaidi Iosefa i 'idewadewa bega
natunavo 'adi 'ailuga Manasa wata Ifeleimi taiadi
i nago Iakobo i na foge.

² Tutuyanina Iakobo i voneni i vo, Natumu
Iosefa 'akonadi i le'wa," nika Iakobo i siyoyoni
yana toketokena i 'ewai mulieta i tovoi i miabui
'ana 'ivie.

³⁻⁴ Iakobo Iosefa i voneni i vo, Yaubada
Toketokeotogina 'waikuye i souyeni 'atamana
Losi 'awalawa Kenani 'waineye bega i
vona-nuakalikalieku. I vo, Yau natumwavo fuedi
a na velelu nika tubumwavo 'adi 'aila'a i na
vefue. Kenani 'awalawanina tubumwavo a na
veledi yadi 'eba veimea i na 'eno-vagata.'

⁵ Wata Iakobo Iosefa i voneni i vo, Natumwavo
'adi 'ailuga Ifeleimi wata Manasa Itifita 'waineye
i tubuga mulieta a mai, 'asa'aiana natukwavo,
kwakwamanidi bani'odi yaku tubu'edakumetavo
Lubeni wata Simioni.

⁶ Mulieta 'ai'edi 'ifwaidi kwakwama 'u na venatunediga, kwakwamanidi 'omu natumwavo we'e yadi fwayafwaya 'adi veuveuta 'ana 'ewa faifaina Ifeleimi wata Manasa 'waidiega."

⁷ Tutuya Basenadiotoga, 'atamana Fadani-Lami 'wainega a vilaku a mimai, nika Litieli yawaidi i 'a'ava 'awalawa Kenani 'waineye. Bola 'a mimaia 'edeye, kebu Efaleti 'atamananina Bedeliema 'ada veluagai. Ma yama nuavita 'a ve'ufadi Efaleti 'ana 'eda i nunago lilivaneye."

⁸ Mulieta Iakobo kwakwama 'adi 'ailuga i 'isedi i velutoli i vo, De'e 'omu natumwavo?"

⁹ Iosefa tamana yana velutoli i nogayeni i vo, E'e De'e natukwavo, Itifita bei 'a miamia Yaubada i veleku."

Bega Iakobo i vo, Nuanuaku 'u na miedi lilivakuye, bega a na vesauluva 'atumaina 'waidie."

¹⁰ Iakobo matana i sako-'afo'afo kebu 'ana fata i na 'isa-'atumai, fai i ve'auvea. Bega Iosefa natunavo i nawedi lilivaneye, tamana i 'avalamaigidi i yaogidi.

¹¹ Mulieta Iakobo Iosefa i voneni i vo, A vo 'ako maigimu kebu a na 'iseni siwe Yaubada i 'ivaiseku ma yawaiku a miamia 'ana tugusa natumwavo taiadi a 'isemi."

¹² Mulieta Iosefa natunavo tubudi 'agenega i vaganawedi, nika ma yana ve'ililibu i 'odu fwayefwayeye.

¹³ Iosefa natunavo 'adi 'ailuga i nawedi tamana lilivaneye, i vetovoidi Ifeleimi Iakobo 'ana wamayega we'e Manasa 'ana 'atagiega.

¹⁴ Siwe Iakobo nimana i yatowaledi 'ana 'atagiega Ifeleimi 'unu'ununeye i yatoi avinodi

bwasiona. We'e Manasa, avinodi
tubu'edakumeta, siwe Iakobo 'ana wamayega*
'unu'ununeye i yatoi.

¹⁵ Mulieta wata Iakobo Iosefa i
vona-nuakalikalieni i vo,
Nuanuaku tubuku Ebelamo wata tamaku Aisake
yadi Yaubada,
kumanina i 'i'isave'aviniku yaku mia
matatabuna 'waineye i maiga 'asiau,
i da vevesauluva 'atumaina kwakwama de'e
'waidie.

¹⁶ Nuanuaku Yaubada yana anelose, kumanina
vita fuedi 'waidiega i 'ita'ita'iekuga, i da
vevesauluva 'atumaina 'waidie.
Wata nuanuaku 'awaie tomotoga fuedi yau,
Ebelamo wata Aisake 'ama wagava i da
nunuave'avinidi kwakwamanidi
'waidiega,
we'e 'adi 'aila'a i da vebwaika-'afo'afo
fwayafwaya matatabuna 'waineye.”

¹⁷ Tutuyanina Iosefa tamana i 'iseni nimana
'ana 'atagi i yatoi Ifeleimi 'unu'ununeye, kebu i
da sosoana. Begaidi tamana nimaneye i 'abi,
nuanuana Ifeleimi 'unu'ununega i na 'ewai
Manasa 'unu'ununeye i na yatoi. †

¹⁸ Iosefa tamana i voneni i vo, Kebu, tamaku.
Side kumanina yaku tubu'edakumeta, bega i
lubwaineni 'amu 'atagi 'unu'ununeye 'u na yatoi.”

¹⁹ Siwe tamana kebu nuanuana, begaidi i
vonen i vo, A 'asetai natuku, a 'asetai. Manasa

* **48:14:** Tomotoganidi yadi 'asetai nima 'atagi tamu tugusa bwaik-
ina nani 'atumaide 'adi veluaga faifaina. † **48:17:** Tomotoganidi
yadi 'asetai nima 'atagi tamu tugusa bwaikina nani 'atumaide 'adi
veluaga faifaina.

kumanina 'awaie 'ana 'aila'a bwaikina 'wainega i
na souyeni, we'e taina Ifeleimi 'ana 'aila'a
bwaikaotogina mulieta tatana. Wata tubunavo
'adi 'aila'a i na vebwaika-'afo'afo 'awalawa tulina
tulina 'waidie.”

²⁰ 'Aiatanina 'waineye side bani'odi Iakobo
kwakwamanidi i vona-nuakalikaliedi i vo,
'Awaie me Isileli nuanuadi i na
vona-nuakalikaliga, 'ami wagava i na
'ina'inanadi.

I na vo, Yaubada i da vesauluva 'atumaina
'waimuye bani'odi Ifeleimi wata Manasa
'waidie.”

Yana vona-nuakalikalinina 'wainega Iakobo
Ifeleimi i silakai i ve'edakumetai mulieta Manasa.

²¹ Mulieta Iakobo natuna Iosefa i voneni i vo, 'U
'iseku, 'akonadi yaku toketokena i vilai,
sai'afotoga a na 'iawemi. We'e Yaubada taiadi 'wa
na miamia i na nagoga wata i na vagavaimi i na
vevilami 'wa na wai 'ami tuvadeye.”

²² Tatamwavo 'akonadi yadi fwayafwaya a
veledi, we'e 'omu yamu fwayafwaya basenadi
yaku kefata wata yaku 'ibadi 'wainega me Emoli
a vetoketoke'ia wedi fwayafwayanina ma 'ana
'imoso'i a velevelemu.”

49

Iakobo yana veifufu 'eba ve'a'ava natunavo 'waidie

¹ Mulieta Iakobo natunavo matatabudi i
goleva'augidi i vonedi i vo, 'Wa na maia 'waikuye,
naninidi 'awaie i na souyediga faifaiddi, a na
veifufu 'waimie.

² 'Omi Iakobo natunavo, 'wa maia 'wa na
vainenega,
tamami Isileli i na veifufuga, bonana 'wa na
nogai.

³ Lubeni, 'omu natuku yaku tubu'edakumeta,
wata yaku toketokena yana 'eba velamu,
tubuvauvaukuye 'omu 'u tubuga.
'Omu yaku to'edakumeta, wata ma yamu
veimea emwavo 'ifwaidi 'waidiega.

⁴ We'e 'omu yamu sauluva bani'odi weyagata
kuvakuvala,
kebu 'ana fata 'u na ve tomogo-bwaika
emwavo 'waidiega.

Fai yaku vavine taiadi yaku 'eba 'eno 'waineye
'wa veluaga,
Bei sauluva sakoina 'u 'idewai yaku 'eno
'waineye .

⁵ Simioni wata Livai yadi sauluva 'aitamigana,
yadi fulumai kefata, 'eba vetalaga faifaidi.

⁶ 'Asiau wata tutuya i mimaiga 'waidie, yau kebu i
da lubwaineku taiadi 'ana mimiava'auta,
fai ma yadi nuasako tamu tomogo i
luvewafai,
wata sauluva sakoiotogina i 'idewai 'aisaya
bulumakau 'agedi i kinidabadabadi 'adi
subia faifaina.

⁷ Yadi sauluva sakoiotogina 'ana vematavuloga
vitaotogina.
yadi ve'eduogaogala 'ana nuasako 'ana
vematavuloga 'ivekokova.

Yaku veimea 'wainega tomotoganidi a na
veyavulidi i na nagoi Iakobo tubunavo me
Isileli 'awasasadie,
Ana veyavulidi i na nagoi 'awalawa Isileli
matatabuna nageneye.

Iakobo natunavo i vona-nuakalikaliedi

- ⁸ Wata Iakobo i veifufu i vo,
Iuda, 'awaie tatamwavo wata taimwavo i na
subiamu.
'Amu gaviavo 'u na leodi wata 'u na
vetoketoke-'iawedi
we'e natukwavo 'ifwaidi ma yadi ve'ililibu i
na 'odu 'waimuye.
- ⁹ Iuda, natuku, 'omu 'aisaya kasikasisidi laioni
natudi bani'odi,
'ana 'aisaya i na ovai i na 'ania mulieta i na
vilai 'ana 'ivie i na miamia.
Kebu tamu aitoi 'ana fata i na tokemaigeni
bega i na tolivauvauli.
- ¹⁰ Iuda, vetoveimea 'ana tugusa tutuya
matatabuna nimamuye i na 'eno'eno kebu
tamu aitoi i na elomu.
Tubumwavo tutuya matatabuna i na
veveimea, kebu tamu aitoi i na 'ewaiga.
'U na veveimea i na nagoga nika taunina 'ada
toveimea mogitana i na le'wa,
kumanina tomotoga matatabudi 'awalawa
tulina tulina 'wainega, ma yadi veve'ililibu
yana veimea i na vematayakeyakeni."
- ¹¹ Yana doniki tubuvauvauna i yogoneni welavi
kalefa 'waineye

yana 'aisaya 'ana talauma i lutalauleni kalefa
didineye.

Oine 'wainega 'ana talauma i lekoai.

¹² Matana 'wau'waugina oine sai'afo,
nigona 'avu'avuotogina susu kebu bani'odi.

¹³ Sebuloni balebaleye i na mia,
nika bei waka bwaikidi i na lukuluku.
We'e yana 'eba veimea 'ana tugusa sai'afo i
na vaganago Saidoni 'atamana 'waineye.

¹⁴ Isaka yana toketokena,
'aisaya doniki i salai, we'e i 'ufobala kukua
'eba vedodoga 'ailuga 'awasasadie.

¹⁵ Tutuyanina yana 'eba veawai wata
fwayafwaya 'atumaina i na 'iseni, taunina i
na tauyeni folova bwaikina 'waineye,
kwavuna i na vebodeni vedodoga faifaina.

¹⁶ Dani yana 'aila'a i na veveimeyedi, 'u da vo
tamu wauma Isileli nageneye 'adi veimea.

¹⁷ Dani i na ve'o'olo 'eda lilivaneye,
bega i na vevebodaboda, tutuyanina osi i na
'iseni 'agena i na ovai, nika 'ana
tokiavetovetanova i na 'etovila
fwayefwayeye.

¹⁸ Ie 'AUVEA, yau 'ita'ita'i faifaina a
vetumaganemu .

¹⁹ 'Awaie tovainago ma yadi fulumai i na mai
Gada i na 'ive'avini, siwe ma yana
toketokena i na veugeugedi.

- 20 Asa 'ana'ana 'awaie 'atumaidi wata ma
mu'wadi, yana
'ani'arinidi kini 'adi laubwaina.
- 21 Nafitalai tamu 'aisaya walawala'ai bani'odi,
yavuyavuna 'ana fata i na dega,
wata yana veifufu 'atumaidi.
- 22 Iosefa doniki walawala'ai tubuvauvauna,
doniki wala'aiega i tovoovoi,
'aisaya wala'aiega i nunago 'oya siaina
'waineye.
- 23 Tolugaviavo ma
yadi nuasako i 'ive'avini i nikenikei wata
veviga bwaikina i veleni.
- 24 Siwe kebu tamu sai'afo i da vetoketoke,
Yaubada toketokeotogina Iakobo 'ana
wauma 'wainega nimana i
kiavetoketokei,
Taunina 'adi To'isave'avina, me Isileli yadi
Kileu.
- 25 A vevelu'ui faifaimi,
nuanuaku tamami yana Yaubada i na
'ivaisemi wata Yaubada Toketokeotogina i
na vesauluva 'atumaina 'waimie. I na
vesauluva
'atumaina abame,
ufanina i na ve'atumai
wata ovu manamanawedi i na ve'atumai.
- 26 Basenadiotoga tubumiavo i
vevesauluva 'atumaina Iosefa 'waineye, we'e
tutuya de'e tubumiavo 'ifwaidi taiadi i
miamia, nuanuaku Yaubada i na
vesauluva 'atumaina Iosefa 'waineye.

Nuanuaku tamana yana vesauluva 'atumaina
'wainega ma yawaina i na vevesauluva
'atumaina 'waimuye,
'ai'aiwabunidi i vebwaika-'iawedi.

²⁷ Beniamina 'wa da vo 'ou'ou kasikasisina,
'awa'awaiogose
i na 'ivekokovidi we'e lavilavi 'waineye
'aisaya i na veutadi.”

²⁸ Tomotoganidi matatabudi me Isileli wauma
12 'waidiega. Side bani'odi tamadi i veifufu
'waidie tutuyanina i 'alanuai natunavo 'waidie, i
velu'ui-nuakalikali 'aitamogana 'aitamogana
'waidie yana vona-nuakalikali 'ana 'asete
bani'odi.

Iakobo Yaubada yana wafa wata yana ve'ufai

²⁹ Mulieta Iakobo i velu'ase'asedi i vo, Sai'afoga a
na wafa a na nago tamakwavo 'waidie. 'U na
ve'ufaku tamaku wata tubukwavo lilivadie,
vatu'ai 'waineye, tomogo Aiti 'ana wagava Efiloni
yana tanoga 'waineye.

³⁰ Ovunina basenadi Ebelamo i kimwanei me
Isileli yadi fwayafwaya 'wainega. 'Awalawanina i
'eno'eno Makifela 'waineye, 'atamana Mamile
lilivaneye 'awalawa Kenani nageneye. Vonanina
Ebelamo i kimwanei Efiloni tomogo Aiti 'wainega
bega fwayafwayanina 'ana taumata i na ve'ufai.

³¹ 'Awalawanina 'waineye Ebelamo ma yana
vavine Sela i ve'ufai, 'waineye Aisake ma yana
vavine Libeka i ve'ufai, wata 'waineye yau Lea a
ve'ufai.

³² Basenadiotoga tubuku Ebelamo fwayafwaya i kimwanei me Isileli 'waidiega."

³³ Tutuyanina Iakobo yana velu'ase'ase natunavo matatabuna 'waidie i 'a'avana, 'agena i silakavedi 'ana 'ivie, nika yawaina i 'a'ava bega tubunavo mulidie i nago.

50

¹ Iosefa tamana 'waineye i lumata'afufu i 'we'wela.

² Mulieta to'ive'atumai 'adi to'idewadewa i vonedi tamana tomogona nageneye matatabuna i 'ewadi nika lalana i na 'eno'eno tutuya manamanawena, nika mogitana kamokamona i 'ewadi.

³ Folovanina i 'idewaiga, 'ana 'etoava i na 'eno'eno 'aiata 40 nagedie, we'e me Itifita i vevemogai tomogonina faifaina 'aiata 70 nagedie.

⁴ Tutuyanina vemogai 'ana tutuya i 'a'ava, Iosefa i nago Felo yana vanuga 'ana to'isave'avinavo i vonedi i vo, 'Wa da 'isanuakalikalieku, nuanuaku tamu nani faifaina 'wa da veifufu Felo 'waineye faifaiku.

⁵ Wata 'u na voneni 'u na vo, Tamaku i vona'awaufaufa 'waikuye i vo, Sai'afoga a na wafa. Nuanuaku vovoku 'wa na vileni 'awalawa Kenani tauniku 'aku taumata a 'idewa-vagaseniga 'waineye, 'wa na ve'ufaku.' Begaidi a vevelu'ui-nuakalikali 'waimuye, nuanuaku 'u da tauyeku a da nago tamaku a da ve'ufai, mulieta a da vilaku."

⁶ Felo Iosefa yana velu'ui i awave'atumaieni i vo, 'U na nago tamamu 'u na ve'ufai, fai basenadi i vona'awaufaufa 'waimuye 'u na vematayakeyakeni.”

⁷ Begaidi Iosefa i laka tamana i ve'ufai. Yana nagonina 'waineye, tofolovavo fueri taiadi i nagoi, Felo yana to'edakumetavo bwaikidi, yana vanuga 'ana to'edakumetavo wata me Itifita yadi to'edakumetavo bwaikidi.

⁸ Wata Iosefa bani'odi, yana vanuga 'ana tomia wata enavo taiadi, yadi vanuga 'adi tomia matatabudi taiadi i nagoi. We'e natudiavo siasiaidi, yadi sifi wata yadi bulumakau i miamiani 'atamana Goseni 'waineye.

⁹ Fwayafwaya 'ana waka yo'eyo'e fueri wata osi 'adi tokiavetovetonova Iosefa i 'weabuya taiadi i nagoi.

¹⁰ Tutuyanina i le'wai 'atamana Atadi 'waineye, 'atamananina Ufa Iolidani lilivaneye, me Isileli ma yadi nuavita i toke i vevemogai 'aiata 7 nagedie, we'e Iosefa taiadi i miamia tamana i mogamogaia.

¹¹ 'Awalawanina 'waineye me Kenani i miamiani, 'isedi i vevemogai 'atamana Atadi 'waineye. Begaidi 'atamananina i goleni Ebeli-Misilemi, fai i vo, De'e 'atamananina vemogai 'ana 'atamana, fai bei me Itifita i vemogai.”

¹² Bega Iakobo natunavo 'adi veimea i velediga, i vematayakeyakeni.

¹³ Natunavo vovona i evai i naweni 'awalawa Kenani, bei i ve'ufai 'ana taumata 'waineye fwayafwaya Makifela, 'atamana Mamile

lilivaneye. De'e taumatanina tututula-vagaina
Ebelamo i kimwanei Efiloni tomogo Aiti
'wainega, bei towafa i na veve'ufadi.

¹⁴ Iakobo 'ana ve'ufa i 'a'ava, Iosefa i vilai i nago
Itifita, enavo wata 'ana to'weabu taiadi.

Iosefa tatanavo i 'ivenuaagiagidi

¹⁵ Tutuyanina Iosefa tatanavo i 'iseni tamadi
'akonadi yawaina i 'a'ava, 'aise'avadi i veifufu i
vo, Voke 'awaie Iosefa vita ta veleniga i na
nuanuani, nika ma yana nuasako i na tutula.”

¹⁶⁻¹⁷ Bega yadi nuanuananina i vetunei Iosefa
'waineye i vo, Tamada bola ma yawaineye i
vonema yana nuanua 'a na lu'ivoneyeni
'waimuye i vo, Avinodi tatamwavo sakona
bwaikaotogina i 'idewai 'waimuye, siwe a
vevelu'uiemu yadi sauluvanina 'u da nuatavuni.
'Ima 'asa'aiana tamamu yana Yaubada yana
tofolovavo, bega 'a velu'ui-nuakalikali 'u da
nuatavunima.” Tutuyanina valanina i nogai nika
Iosefa i 'we'wela.

¹⁸ Mulieta tatanavo matatabudi i maia i 'odu
'waineye i voneni i vo, 'Ima yamu
tofolova-maimaiga.”

¹⁹ Iosefa tatanavo i vonedi i vo, Kebu 'wa na
kolologa, yau kebu Yaubadaga. Kebu 'ana fata a
na vematavulogimi.

²⁰ 'Omi nuanuami sauluva sakoina 'wa na
'idewai 'waikuye siwe Yaubada yami nuanuanina
i sivilai nani 'atumaina i 'idewai bega 'asiau
tomotoga fueda ma yawaida ta miamia.”

²¹ Iosefa bonana bikanega tatanavo i
'ivenua'agi'agidi i vo, Kebu 'wa na kolologa, 'omi
wata natumiavo taiadi a na 'isave'avinimi.”

Iosefa yawaina i 'a'ava

²² Iosefa wata tamana natunavo taiadi i miamia 'awalawa Itifita malamala 110.

²³ Tutuyanina i miamia i 'iseni natuna Ifeleimi natunavo 'adi 'ailuga i tubuga wata tutuyanina i miamia i 'iseni Manasa natuna Makili natunavo i tubuga, kumanidiavo i vo, Yau natukwavo.”

²⁴ Mulieta Iosefa enavo i vonedi i vo, Yau sai'afoga a na wafa siwe Yaubada i na 'ivaisemi i na vagavaimi Itifita 'wainega i na nawemi tamu 'awalawa 'waineye, fai basenadiotoga i vona'awaufaufa Ebelamo, Aisake wata Iakobo 'waidie i na veledi.”

²⁵ Bega Iosefa me Isileli 'waidie i vona'awaufaufa i vo, Yaubada i na 'ivaisemi bega i na vevilami, mulieta a na wafaga luluku taiadi 'wa na nawedi.”

²⁶ Bega Iosefa 'ana malamala 110 i veluagai, nika yawaina i 'a'ava. Mulieta me Itifita vovona 'idewadewai Itifita 'awalawa 'waineye, i'a'ava i dodogi wafa 'ana didiwaka nageneye.

Yaubada Yana Vona'awaufaufa 'Ivauna
The New Testament in the Iamalele dialect of the
Ubuvala Language of Papua New Guinea
Nupela Testamen long tokples Ubuvala long Niugini

copyright © 1984, 1988, 2025 Wycliffe Bible Translators, Inc. and SIL
Papua New Guinea

Language: Ubuvala (Iamalele)

Dialect: Iamalele

Translation by: SIL PNG

Contributor: Wycliffe Bible Translators

This translation is made available to you under the terms of the Creative
Commons Attribution-Noncommercial-No Derivatives license 4.0.

You may share and redistribute this Bible translation or extracts from it in
any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

2026-09-01

PDF generated using Haiola and XeLaTeX on 5 Sep 2026 from source files
dated 1 Sep 2026

db771331-f438-5051-a7d5-80ea6197c078